



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>

~~1500~~

CAVSA SPIRITVS SANCTI,

Personæ divinæ, ejusdem cum
Patre & Filio essentiaë,


contra C.C.S. Problema Paradoxum,

*An non per Sp. Sanctum Sanctorum Ange-
lorum genus intelligi possit?*

asserta & defensa

à

CHRISTOPHORO WITTICHIO



LUGDUNI BATAVORUM, .

Apud ARNOLDUM DOUDE. 1678.4

A7 6832

R003113495

Don 51414

PRÆFATIO

A D

LECTOREM.



dogmata illa,
quibus fides
Christiana
nititur, flo-
ret & auge-
tur, ex solis
sacris literis
esse haurien-
da, inter Christianos extra o-
mnem

* 2

mnem

Præfatio

mñem dubitationis aleam positum esse debere reor. Modum enim, quo Deus miseris voluit succurrere peccatoribus, nemo nosse potest, nisi qui ex revelatâ ejus voluntate didicerit. Nemo enim illi à consiliis fuit, nec proin eorum rationes à priori reddere potest. Quòd Pater cum Filio habuerit ab æterno consilium pacis, quo Filius constitutus sit Sponsor & Mediator eorum, qui in Christo sunt electi, & in quo Sp. Sanctus voluerit intervenire, tanquam eorum Paracletus & arrhabe salutis illis conferendæ futurus, frustra in Naturâ quæsi-
veris, frustra exspectes ab hominibus divino lumine destituta.

Di-

ad Lectorem.

Discendus ergo est ex sacris divini Testamenti tabulis Pater ab æterno generans Filium, & Filius unâ cum Patre spirans Sp. Sanctum, qui proin ab utroque æternâ processione procedit, modo qui superat omnium creaturarum captum, quippe infinitus, incomprehensibilis & ineffabilis. Hic simplicitas Fidei requiritur, in solo nutu & placito divino acquiescens, non ultra ea, quæ scripta sunt, se superbè & ineptè jactitans & efferens. Cogitandum est, nos omnes esse admodum finitos, Deum solum infinitâ Omniscientiâ omnia præstare, nec propterea neganda, quæ ab ipso sunt profecta, quia

*

3

finitâ

Præfatio

finitâ nostræ rationis decempedâ
ea metiri non possumus. Nec
mirari debemus, quædam hujus
commatis nos legere in divino
Verbo, quin è contrario miran-
dum foret, si omnia, quæ in il-
lo reperimus, intellectui nostro
essent pervia, quòd sic suspicio
queat subesse, ab humano & fi-
nito Spiritu illa omnia potuisse
proficisci. De illis, quæ sunt vel
Patris vel Filii, nunc agere non
constituimus, sed tantùm de iis,
quæ ad Spir. Sanctum attinent,
quæ, uti illum eandem cum Pa-
tre & Filio habere divinitatem
testantur, ita quædam obtinere
sibi propria; quibus à Patre &
Filio tanquam diversa ab iis per-
sona.

ad Lectorem.

sona discernitur, docent quoque. Hic sanctè inhærebimus revelatis, nihil indulgentes nostris ratiociniis solo lumine naturæ suffultis. Visus est his diebus Tractatus, qui Spiritui Sancto movit quæstionem Status, tentavitque, an non ille, in censum creaturarum, angelorum nempe bonorum & sanctorum, redigi posset. Indigna res illa mihi visa fuit Christiano nomine, & quam maxime in dignitatem infinitam Spiritus S. injuriosa, nec potui à me impetrare, ut cum silentio ferrem tam indignè læsam ejus majestatem. Etiam urebat me, quod tanti momenti argumentum tam imbecillis committeretur

*

4

tur

Præfatio

tur tribicinibus; quamvis enim Auctor illius sententiam suam pro conjecturâ tantùm haberi velle aliquando videretur, satis tamen ex toto opere apparet, reverâ sibi valdè probabilem esse visam. Videbatur quidem hæc structura, tam infirmis nixa fulcris mole suâ ruitura, ut ita nullâ refutatione indigeret, cum non esset metuendum, ut iis, qui solidis assueti essent ratiociniis, persuaderetur; varia tamen alia me moverunt ad hunc suscipiendum laborem. Rogabat Scriptor, ut, si quis sua argumenta refellere posset & meliora docere id faceret, promittebatque, se docilem futurum. Jussit ergo
cha-

ad Lectorem.

charitas, quæ omnia sperat, ut
tentarem, num forte divina gra-
tia Spiritus Sancti meis conati-
bus benedicere, & illuminatâ
mente illius Viri, eam meliori-
bus cogitationibus, de suâ digui-
tate & excellentiâ adorandâ, im-
prægnare dignaretur. Metuebam
etiam, ne leviora quædam in-
genia, quæ quovis vento doctri-
næ solent agitari, moverentur his
qualibuscunque ejus argutiis,
præsertim cum viderent tantam
argumentorum copiam addu-
ctam, tot Ecclesiæ antiquæ Do-
ctorum testimoniis corroborato-
rum; nisi quis esset, qui solidio-
ra opponeret argumenta, & ne-
bulas

* 5

Præfatio

bulas veritati objectas discuteret. Tandem me incitabat quoque ad scribendum, quòd occasionem mihi suppeditatam animadverterem in sensum genuinum variorum Scripturæ locorum ab illo allatorum inquirendi, eosque ita explicandi, ut cum scopo Sp. Sancti, antecedentibus ac consequentibus, & vi atque valore verborum ista interpretatio conveniret. Sic igitur *Causam Spiritus Sancti* suscepì defendendam, quod putabam à fidei ejus servo postulari. Quamvis enim ille suâ omnipotenti virtute sibi non sit defuturus, hoc tamen ipsum inter alia media ordinavit, ut viri Dei

ad Lectorem.

Dei se præstarent potentes in Scripturis, ad os iis omnibus obstruendum, qui veritati salutari contradicunt. Quibus lustratis, deprehendi omnia, quæ de se nobis in illis revelavit, clarè testari de illius Æternitate, de Omnipræsentia, de Omniscientia, quæ ex futurorum prædictione, ex cordium inspectione, & imprimis, quòd profunditates Dei suâ infinitâ scientiâ planè comprehendat & exæquet, plenissimè patescit, ut & de vi Omnipotentis & Omnisufficiëntiâ ejusdem, nec non de operationibus efficacissimis vim omnipotentem & independentem e-

vi-

Præfatio

videnter evincentibus, cujusmodi conspiciuntur in potentissimâ omnium rerum Conservatione, & in formatione cordium atque efficacissimâ in ea operatione; quæ omnia manifestè patefaciunt, non posse illum in ordinem creaturarum, inter quas sunt Angeli, redigi, sed horum potius esse Creatorem & Conservatorem omnipotentem. Quibus adde quæ docent, illum esse Veritatem ipsam illuminantem fideles, quod divinum est axioma, esse Patrem luminum, quia Deus est, supremum legislatorem, Dominum suæ Ecclesiæ, in quâ habitet tanquam in
tem-

ad Lectorem.

templo , à quâ velit coli cultu
& honore divino. Vel ergo Scri-
pturæ divinitas abneganda no-
bis erit , quod non credo fa-
cturum hunc Scriptorem , vel
agnoscendus ille Sp. Sanctus &
celebrandus tanquam æternum &
supremum Numen. Præsertim
cùm expressè distinguatur in
Scripturâ ab angelis tanquam il-
lorum Dominus , cui non mi-
nus quàm Patri & Filio gloriam
omnem , quam creaturæ suæ
Creatori debent, exhibent; nec
possit pro Angelorum Sancto-
rum genere haberi , cùm ejus-
modi unitas ei assignetur , non,
quæ in corpus collectione unum
cadit,

Præfatio

cadit, sed quæ ejusdem est planè rationis & ordinis cum eâ, quæ Patrem & Filium unum constituit. Nolo sollicitè inquirere, quis sit istius Opusculi scriptor. Voluit latere suum nomen, quod initialibus tantùm literis expressit, unde conjicere liceret, esse *Christophorum Christophori Sandium*, qui *Nucleum Historiæ Ecclesiasticæ* in historiâ Arrianorum antehâc exhibuit; sed cùm conjectura illa fallax esse possit, malui illum nomine *Auctoris Problematis* circumscribere. Sufficiat lectori rem cum re, argumenta cum argumentis conferre, neque ex personis vel invidiam vel

ad Lectorem.

vel auctoritatem scriptis conciliare, quas causas ab eo, qui sincerè veritatem inquit, procul abesse velim. Unde nec admodum probare possum, quòd Scriptor ille tanti fecerit in hoc negotio Auctoritatem Patrum Ante-Nicænorum, ut ex illis præcipuè putaverit esse discendum, quid de Spiritu Sancto sit statuendum, de quo ex solis sacris literis nos informari debere censeo, quamvis nec illos ipsi favere ex meo commentario possit esse manifestum. Hæc sunt, Benevole Lector, quæ de meo scopo te volui scire; tu his utere ad Dei gloriam, & mecum laudam.

Præfatio.

**summam ejus majestatem, cui ho-
nor sit & gloria in omnia secula.
Amen.**

CAVSA

C A V S A

SPIRITVS SANCTI.

I. **P**rodiit non ita pridem *Problema Paradoxum de Spiritu Sancto, An non per illum Sanctorum Angelorum genus intelligi possit?* cujus Auctor petit, ut, si quis in toto Orbe eruditorum forte sit, qui doctrinâ magis polleat, quàm quibuscum hactenus sit collocutus, ea legat, quæ à se pro affirmativâ sententiâ publicè sint edita argumenta, seque errare moneat, ac rectius sentire doceat. Quinam sint illi, cum quibus de hoc problemate fuit collocutus, meâ nihil refert inquirere; tenuitatis meæ conscius de meâ eruditione & doctrinâ moderatè sentire didici; quia tamen persuasus sum, me ex Sacris literis, ex quibus solis de Spiritus Sancti naturâ & personâ possumus informari, ea posse proferre argumenta, ex quibus constet, per Sp. Sanctum, quando à Patre & Filio distinguitur, intelligi personam planè divinam ejusdem omninò naturæ & essentiæ divinæ, cujus sit Pater & Filius, judicavi, nihil me à meo munere alienum facturum, si ad istud propositum problema respondeam, cum divinâ allucenet

A

mco

meo labori gratiâ, contingere queat, ut Problematis Auctor Deo det gloriam & veritati ex sacris literis demonstratæ cedat, modò ex sincero animi proposito doceri velit, quod, quamdiu contrarium non fuerit aperte testatus, de illo me sperare charitas Christiana jubet.

II. Miror verò non parum, quòd cùm non ignoraverit, Theologos varios, quando cum Socinianis congregiuntur, diversa Scripturæ testimonia adduxisse ad Sp. S. summam & æternam divinitatem probandam, nullum ab ipsis allatorum argumentorum conatus fuerit in hoc ipso tractatu refutare; cùm facile esset exinde colligere, non posse per Spiritum Sanctum, prout in Scripturis Sacris cum Patre & Filio comparatur, & ab illis distinguitur, genus Angelorum intelligi. Non enim potest summus Deus cum Angelis, qui meræ sunt creaturæ confundi. Si igitur Sp. S. sit Deus summus, si sit ejusdem divinæ naturæ & essentiæ cum Patre & Filio, non potest ullâ sub rationis specie in numerum Angelorum à Deo Summo creatorum, & ejus ministrorum, referri.

III. Non nego, varia illam vocem *Spiritus* in Scripturâ admittere significata; plura quam ipsemet recitavit p. 5. & seqq. videre

Causa Spiritus Sancti. 3

dere licet apud Ravanellum & alios; sunt tamen non pauci loci ab ipso adducti in significatione non verâ, quos brevibus examinemus. Pag. 5. putat Gen. I. 2. *designari corpus subtilissimum, quale est aër.*

Verba sunt: והארץ היתה תהו ובהו וחשך על

פני תהום ורוח אלהים מרחפת על פני המים

Terra dicitur tunc fuisse תהו ובהו. Sentus

istarum vocum patet ex Et. XXXIV. 11. קו

תהו ואבני בהו. Linea, קו, ducitur ad or-

dinandum & distinguendum, hic dicitur

linea תהו, quæ nihil ad ordinem & orna-

tum conferre potest. Perpendicularum, quod

voce אבני exprimitur, demittitur ad diri-

gendam structuram; at hic dicitur בהו,

quod nihil ad ædificandum conferre possit.

Est εἰρημωσις. Significatur desolatio, quâ

omnia quæ cohærent dissolvuntur; & om-

nis ornatus, pulchritudo atque ordo tolli-

tur. Dum ergo Terra dicitur fuisse תהו

והים, significatur, caruisse omni ordine &

ornatu, neque fundatam fuisse & exorna-

tam, quemadmodum postea seqq. diebus,

secundo & tertio factum, quando aquæ

quædam superius sunt elevatæ, aliæ verò in

receptacula sua separatæ, ut reliqua terra

sicca foret, quæ herbis, plantis & arboribus

postea decorata fuit. Atque ad istam con-

fusionem & deformitatem quoque facie-

A 2

bar,

bat, quod tota terra tecta tunc esset aquis, quod clarè nos docet Ps. CIV. 6. *Abyssum superinjeceras terra tanquam indumentum, supra montes stabant aqua*, sic enim commodissimè mihi videntur verti posse Hebræa:

תהו ובהו. De hac autem abyssu dicit Moyses, quod super ejus superficie fuerint tenebræ, quum Lux postea demum facta fuisse dicatur. His jam subjunguntur verba illa, de quibus est quæstio; ubi notandum id dici factum, quando terra erat תהו ובהו, & quando abyssus aquarum terram obtexerat. Tunc dicitur Spiritus Dei על פני המים, ubi מרחפת על פני המים idem significare, quod על פני תהום, videtur ex dictis supra colligi posse. Vox illa רחה bis præter hunc locum occurrit in scripturis. Jer. XXI. 9. רחפוכל עצמותי, quod sic verti potest: *commoventur* hinc inde, sive palpitant *omnia ossa mea*. De Deo usurpatur Deut. XXX. 11. *Ut aquila excitat nidum suum*, על גוזליו ירחף *super pullis suis se movet, pandebat alas suas, suscipiebat ipsum, ferebat eum super pennâ suâ*, quibus significatur, Deum Israëlitas servitute Ægyptiacâ graviter afflictos excitâsse verbo suo, ut sequerentur Moſen libertatis vindicem à se constitutum, eosque fovisse & protexisse gratiâ suâ, sicque ex Ægypto eduxisse; similitudine de-

desumtâ ab actione aquilarum, quæ pullos clangore suo solent provocare ad volatum, & super illos se motitant alis expansis. Ex quorum collatione intelligi potest, qualis actio per verbum מרחפת hîc Spiritui Dei assignetur, actio nempe fovendi, tuendi, conservandi, perficiendi id quod factum erat. Dicitur se commovisse super facie aquarum sive abyssi, quæ tunc adhuc terram tegebant, adeoque super terrâ, quæ sub istis aquis latebat. Quid jam hic per Spiritum Dei intelligemus? aërem ne sive ventum? an Spiritum illum Sanctum, qui uti est distincta persona à Patre & Filio, ita ejusdem divinæ essentiae est particeps? Non putem tertium hîc quid dari posse, cum quid illud sit non possit exprimi, & proinplanè debeat fingi, atque adeò eâdem facilitate, quâ asseritur, rejici possit. Nec id Auctor problematis dicere posset, cum per Spiritum Dei hîc intelligat aërem; unde probato, non posse per Spiritum Dei hoc in loco denotari aërem, & actionem, quæ hîc Spiritui Dei attribuitur ejusmodi esse, ut apprimè conveniat illi Spiritui, qui est tertia S. S. Trinitatis persona, nihil restabit, quo minus per illum Spiritum De istam tertiam Trinitatis personam intelligamus. Fateor equidem, non repugnare

vento sive aëri commotionem & agitationem, sed nondum eo usque processerat opus Creationis, ut aër jam posset dici conditus. Terra primitus creata destituta erat omni ordine, omni ornatu, nondum fundata erat, nondum erat expansum, quod distinguebat aquas superiores ab inferioribus, quod expansum secundo die demum fuit factum, quod expansum erat aër. Aër ergo conditus fuit demum secundo die, adcoque primo die nondum fuit. Non potuit igitur primo die commoveri vel agitari super aquarum superficie, ac propterea non potest per Spiritum Dei intelligi aër. At hæc actio Spiritui S. qui unà cum Patre & Filio æternus est Deus, rectè appropriatur, & in sensu metaphorico commodè potest applicari. Spiritus Sancti est fovere, tueri & conservare ea, quæ condita erant, sicquæ ea præparare ad ulteriorem perfectionem & novas formas recipiendas, quæ seqq. diebus fuerunt introductæ. Quid quæso convenientius, quàm hoc cogitari potest? Quid magis cohæret cum antecedentibus & consequentibus? Quid magis convenit scopo Moïsis, qui est, ostendere, à Deo summè potenti omnia, quæ sunt in mundo, per æternum ejus Verbum & Spiritus divini virtutem fuisse producta, quo nos ducit

Pf.

PS. XXXIII. 6. *Verbo Iehova facti sunt cæli
& Spiritu oris ejus omnis exercitus eorum.*
Erravit ergo Auctor Problematis; dum
per Spiritum Dei aërem intelligit, cum
hinc potius sit colligendum, Spiritum Dei
esse summum & æternum Deum.

IV. Non satis capio, quid sibi velit
Auctor, dum inquit p. 6. *Imprimis verò
cùm prædicati loco ponitur, denotat spiritua-*
lem essentiam prædicamentaliter, ut Iob. 4: 24.
Deus est Spiritus, & 2 Cor. 3: 18. Dominus
est Spiritus. Quid enim quæso est *denotare*
spiritualem essentiam prædicamentaliter? quid
huc faciunt prædicamenta? si hoc voluit,
denotare essentiam spiritualem, quæ sit
substantialis adeoque pertineat ad prædi-
camentum substantiæ, non ad prædicamen-
tum qualitatæ, quò pertineat, si Spiritus
Sanctus pro donis Spir. Sancti accipiatur,
non usus est phrasi convenienti ad hoc ex-
primendum; tunc enim potius dicendum
fuisset: *denotat spiritualem essentiam in prædi-*
camento substantia, cum inter prædicamen-
ta æquè qualitas ac substantia soleat re-
ferri; forte verò dicere voluit, vocem
Spiritus, quando sic prædicati loco poni-
tur, de Deo tanquam subjecto, Logicè sic
dicto, prædicari. Sed hoc leviusculum vi-
detur; malè verò judicat, dum existimat,

Spiritum Sanctum *designare mentem hominis sanctificatam* Rom. 14: 17. c. 15. 13. Iuda, 20. Rom. xiv: 17. sic legimus: οὐ γὰρ ἐστὶν ἡ βασιλεία τοῦ Θεοῦ βρωμα καὶ πόσις, ἀλλὰ δικαιοσύνη, καὶ εἰρήνη, καὶ χαρὰ ἐν πνεύματι ἁγίῳ. Quænam quæso est necessitas, ut per Sp. S. hîc intelligamus mentem sanctificatam? Quidni intelligamus personam Sp. S. à Patre & Filio distinctam? Non ignorat credo Auctor particulam ἐν sæpissimè idem esse quod *per*. Quid obstat, quo minus hîc sic interpretemur? Quid requirit tota ἀλλοιολογία hîc aliud, quàm ut consideremus Sp. Sanctum tanquam auctorem istorum bonorum, quæ sunt δικαιοσύνη καὶ εἰρήνη, καὶ χαρὰ? Quid facit ad amplitudinem sensus, si dicatur, ista dona residere in mente hominis sanctificatâ? Nonne major erit verborum emphasis, si Spiritum S. auctorem illorum donorum intelligamus, ut sic ostendatur, nos ea non habere nisi per gratiam Spiritus Sancti? Simile iudicium formandum de cap. xv: 13. Ὁ δὲ Θεὸς τὸ ἐλπίδῃ παραρῶσαι ὑμᾶς πάντας χαρᾶς καὶ εἰρήνης εἰς τὸ αἰετοῦν ἐν τῇ ἐλπίδι, ἐν δυνάμει πνεύματος ἁγίου. Sanè intelligi non potest, quomodo ibi per δύναμιν Sp. Sancti denoteretur mens hominis sanctificata, cùm modus loquendi & phrasibus adhibeatur similis illis locutionibus, qui-

quibus passim in Scripturis œconomica operatio vel Patris vel Filii vel utriusque simul solet significari. Conferatur Eph. III. 16. Ἰνα δώῃ ὑμῖν καὶ τὸν πλῆρον τῆς δόξης αὐτοῦ δουλεύειν κατελευθέρωναι διὰ τοῦ πνεύματος αὐτοῦ οἷς τὸν ἴσον ἄνθρωπον, ubi sanè per Sp. S. non potest intelligi mens hominis sanctificata, cum ab eâ expressè distinguatur, & ab illo corroboratio interioris hominis expectetur. Et χαρὰ καὶ εἰρήνη fructus Spiritus expressè dicuntur Gal. V. 22. Nulla quoque necessitas nos urget, ut comma Judæ 20. sic exponamus. Ὑμῖς ὅ, ἀγαπῶντες, τὴν ἀγοράν τῶν ὁμῶν οἷσιν ἰσοικοδομῶντες ἑαυτοὺς, ἐν πνεύματι ἀγίῳ σεσωσμένοι; potius, si hunc locum cum aliis conferamus, ubi Sp. Sanctus dicitur auctor precum, qui efficit & operatur preces, & hoc etiam modo mentem nostram sanctificat, quæ propterea tanquam effectus à suâ causâ debent distingui, judicabimus, per Spiritum sanctum, qui nos facit orare, intelligi illam personam, quæ à Patre & Filio distincta ejusdem tamen cum iis est essentiae numericae & individuae. Ita Rom. VIII. 26. Sp. Sanctus auctor precum à nobis precantibus adeoque à mente sanctificatâ planè distinguitur. Τὸ γὰρ τί προσευχόμεθα καθὼς δεῖ ἐκ οἶδαμεν, ἀλλ' αὐτὸ τὸ πνεῦμα ὑποσχετοὶ ὑμῶν ὑποτάσσεται ἀλλήλοις.

V. Locum Gen. VI. 3. *Non permanebit Spiritus meus in istis hominibus in perpetuum, quia caro sancti patat p. 6. & 7. fortassis huc quoque applicari posse, nempe, ut designet mentem hominis sanctificatam, nisi malimus id, ut alias saepe, intelligere de animâ nostrâ, quâ vivimus & ratiocinamur.* Verba Hebræa sic habent: **לֹא יִדּוֹן רוּחִי בָאָדָם לְעוֹלָם בְּשֶׁנֶם הוּא בָשָׂר וְהָיָה יָמָיו מֵאָה שָׁנָה**, nec ullam ex his ab Auctore conjectis interpretationibus admittunt. Scio equidem Græcos interpretes & Vulg. Lat. aliasque quæ Lxx. sequuntur, illud **יִדּוֹן** exponere *permanebit*; an quia legerunt **יָלֹן**, an quia **יִדּוֹן** pro **יָלֹן** acceperunt, quòd **ד** & **ל** sint literæ ejusdem organi, quæ inter se invicem permutari solent, an aliam ob causam, ut inquiram parum ad rem facere puto, sunt enim etiam inter Judæos, quibus **יִדּוֹן** derivatur à **נִדְנָה**, quod thecam, vaginam gladii significat. Verbum **יִדּוֹן** hîc commodissimè verti potest per *judicabit*, vel potius *disceptabit*, *contendet*. Ita in Niphal **נִדְוֹן** est disceptans 2 Sam. XIX. 10. **וְיָדְוּ כָל הָעָם נִדְוֹן** *Et erat totus populus disceptans in omnibus tribubus Israelis, dicendo, quid cessatis reducere regem?* sic in Hiphil Eccl. VI. 10. **וְלֹא**

מטו ולא זכר לדן עם שהתקף מטו *Et non potest disceptare cum eo, qui validior ipso est.* Deus indicat præsenti in loco, se non amplius sic acturum cum hominibus illis, qui caro sint, homines corrupti, *ὁ πρῶτος ἐκ ἔχθρας* Jud. vers. 19, nisi per 120. annos, quos adhuc vult impendere & concedere ipsis ad pœnitentiam, non *verò* ultra terminum istum suâ longanimitate erga eos usurum. Sic igitur ille est Spiritus non hominis, sed Spiritus Christi, qui idem est & Patris, quem Filius mittit à Patre, qui ut persona differt à Patre & Filio, unius tamen & ejusdem essentiz cum Patre & Filio existit.

VI. Parum nunc faciet ad præsentem rem, *an vox Sp. Sanctus aut Spiritus Domini quandoque unum denotet individuum, aliquando individuum vagum*, quod ipse conatur ex Patrum testimoniis evincere p. 7. & seqq. Et si enim generatim loquendo nolimus negare, quin vox Spiritus sumi possit pro angelo, & sic vox Spiritus Sancti aut Spiritus Domini, possit designare angelum sanctum & angelum Domini, non sequetur, quòd in omnibus locis Scripturæ, in quibus Spiritus Domini, aut Spiritus Sancti sit mentio, debeant intelligi angeli, cum è contrario non pauci sint loci Scripturæ, quorum quos-

quosdam suo loco exhibebimus, in quibus vox illa designat eam personam, quæ ratione suæ personalitatis à Patre & Filio distinguitur, ratione verò essentiae divinæ nullo modo ab iis differt, cùm eandem habeat essentiam divinam, quam Pater & Filius habent. Dicta quædam Patrum ab auctore citata probant, ab iis angelos appellari Sp. Sanctos in numero pluralivo, non tamen omnia, sed cùm id parum faciat ad negotium nostrum, nolumus abuti otio nostro ad ea examinandum.

VII. Progredimur ad illud quod p. 12. & 13. proponit, nempe *ut videamus, an cum aliquâ verisimilitudine dici possit, angelos actu ipso Spiritum Sanctum vocari*, quod in ipso titulo commodius hoc modo exprimitur? *An non per illum Spiritum Sanctum Sanctorum Angelorum Genus intelligi possit?* Agnoscit ille, Spirit. Sanctum esse personam, non nudam qualitatem, idque contra Socinianos propugnat negantes, Sp. S. esse personam, quorum argumenta in contrarium adducta etiam refutat ipsius socius *Auctor Addendorum* p. 53. & seqq. sicque fatetur Sp. S. à Patre & Filio distinguui, tanquam personam ab ipsis diversam. Si ergo evidenter possit probari, Sp. S. in illis locis, in quibus, ut persona distincta à Pa-

Pa-

Causa Spiritus Sancti. 13

Patre & à Filio introducitur, describi ut Deum Summum, ejusdem cum Patre & Filio dignitatis & essentiae, cadet utique paradoxa illa sententia per Sp. S. genus Angelorum, adeoque plures easque creatas personas, intelligens. Non ibimus per singula Scripturae loca, in quibus de Sp. S. tanquam de personâ à Patre & à Filio distinctâ est sermo, id enim prolixum nimis foret; præcipua tantum quædam considerabimus, secuti ordinem temporis, quo se sub diversâ œconomiâ manifestavit.

VII. Antequam fœdus gratiæ Deus cum homine pepigisset, statim in opere Creationis Spir. S. introducitur, tanquam distincta persona à Patre Creante per Filium, sive Verbum, quo dixit & facta sunt, quo vocavit ea quæ non sunt, ac si essent, Gen. I. 2. de quo loco §. 3. jam egimus in antecessum. Exinde patet, per Spiritum Dei non intelligi aërem aut ventum, sed Deum, ea quæ creavit etiam conservantem & foventem, atque ad ulterius perficiendum commodè præparantem. At Conservatio sic appropriata Spiritui Dei, sicut Patri Creatio, denotat actionem personalem distinctam ab actione personali Patris. Eadem tamen non minus divinam potentiam adeoque essentiam arguit ac Creatio, cum
non

non sit facilius efficere ut res porro existat, quàm ut existat primùm. Eadem voluntas potentissima ad utramque actionem requiritur; vide Apoc. IV. 11. ubi Creatio & Conservatio pari loco habentur, & tanquam divinæ actiones considerantur: Ἀξιος εἶ. κύριε λαβειν τὸ δόξαν καὶ τὴ τιμὴν καὶ τὴ δύναμιν, ὅτι οὐ ἐκλίσας τὰ πάντα, καὶ διὰ τὸ θείλημά σου εἰσὶ καὶ ἐκτίσθαι.

IX. Post fœdus gratiæ pactum post lapsum in Paradiso per insignem illam promissionem, quam legere licet Gen. III. 15. prima expressa mentio Spiritus Dei occurrit Gen. VI. 3. ad quod Scripturæ testimonium jam superius §. 5. animum advertimus. Evicimus ibi, Spiritum illum Dei non esse mentem hominis sanctificatam, nec animam nostram, quâ vivimus & ratiocinamur, sed esse Spiritum Christi, ut & Spiritum Patris, qui idem est, adeoque à Patre & à Filio distingui tanquam personam diversam. At Spiritus ille Christi Deus cognoscitur passim ex N. T. de quo suo loco videbimus, & hoc ipso in loco, quæ tribuitur ei actio, planè est divina. Dicitur disceptasse cum hominibus peccatoribus per Noachum, hoc est, inspirasse Noacho sanctum zelum pro gloriâ Dei, eique revelasse diluvii pœnam secuturam impœ-

ni-

Causa Spiritus Sancti. 15

nitentes. Hæc actio cor Noachi spectabat, quod sic ab illo Sp. movebatur, quod immutabatur, in quo operabatur Spiritus ille, suggerendo vel formando ejus cogitationes. Formator ergo cordis istius Spiritus ille Dei, quæ actio Ps. xxxiii, 15. Deo assignatur; ex quâ formatione oritur cordis inspectio, quam actionem soli Deo competere patet ex 1 Reg. vii, 39. Atque ita ille Spiritus Dei ab ipso Deo distinctus personalitèr, ex actione divinâ ut Deus agnoscitur. Similis est ratio Num. xi, ubi vers. 25, *Deum seposuisse de Spiritu, qui erat super Moysen, eumque resedisse super septuaginta Seniores, ut prophetarent*, qui Spiritus Spiritus Dei dicitur vers. 29. Cùm dicatur ille Spiritus Dei utique ab ipso Deo distinguatur, non ut divinum effectum; qui enim agit & inspirat Prophetas ipsemet est causa Efficiens illuminationis Prophetiæ, quod ex antea dictis potest patere; nec ut divinum attributum, quod itidem ex phraseos naturâ cognoscitur, nec fortè Auctor problematis diceret; Ergo ut persona, quæ, cùm Deus sit, divina persona erit dicenda. Operatio enim illa, quâ prophetare illos fecit, divina omnino est, uti jam superius est evictum. Idem ille Spiritus Propheticus etiam animasse dicitur Bileamum Num.

xxiv,

XXIV, 2. *Et sustulit Bileam oculos suos, & vidit Israël commorantem juxta tribus suas, & fuit super illo Spiritus Dei.* Nec in cognitus fuit Spiritus Jehovæ Jobo & amicis ejus, prout patet Jobi xxvi, 13. c. xxxii, 8. c. xxxiii, 4. Post Mosem in historiâ Judicum mentio fit aliquoties Spiritus Jehovæ, tanquam animantis robore illos Judices, qui à Deo populo Israëlítico fuerunt præfecti. Sic de Othniele dicitur Jud. III, 10. *Et fuit super eo Spiritus Iehovæ & judicavit Israël.* Jud. VI, 34. *Spiritus Iehovæ dicitur induisse Gideanem.* Jud. XI. 29. *Et fuit Spiritus Iehovæ super Iephtah & pertransiit Gileadem & Manassæm.* Ita Simsonem cepit agere Spiritus Iehovæ in castris Danis Jud. XIII, 25. Similia de Simsone dicuntur Jud. XIV, 6. 9. c. XV, 14. In historiâ Samuelis iterum fit mentio Spiritus Iehovæ, qui, quos animavit, prophetare facit. Id prædixit Samuel eventurum esse Sauli 1 Sam. X, 6. & impletum dicitur vers. 10. Postea & Spiritus Dei invasit legatos Saulis 1 Sam. XIX, 20. & iterum ipsum Saulem vers. 23. Etiam irruit super ipsum Spiritus Dei fortitudinem animi conferens 1 Sam. XI. 6.

X. Sed properemus ad Davidis tempora. Insigne de Spiritu Sancto testimonium

oc-

occurrit 2 Sam. xxi: 2, 3. Davidis hoc in loco continetur prophetia postrema, postquam nullam aliam edidit David, ea-que vaticinium complectitur de Messîâ & tempore ejus adventus, simulque edocet spem illam, quam David in illo semine benedicto ex suis lumbis prôdituro, posuerit. Ut autem eam prophetiam commendet, argumentum desumit ab illius auctore, Spiritu illo veritatis, qui fallere & falli est nescius: **רוח יהוה דבר בי**. Appellat illum Spiritum Jehovæ, eo sensu, quo Gen. vi: 3. Spiritus Dei appellatur, qui etiam est Spiritus Christi, uti vidimus §. 5. De eo dicit **דבר בי**, quod possumus exponere, *locutus est ad me*, vel, *locutus est in me*. Utrovis modo acceptum denotat illam operationem, quæ non potest aliunde quàm à Deo proficisci, uti præced. §. ostensum fuit. Dicitur porro de illo Spiritu: **וַיְמַלְאוּ עָלַי רוּחַ**, quo significatur, illud ipsum, quod in teqq. est pronuntiaturus, esse verbum Spiritus Sancti, quod ipse posuerit super linguâ suâ. Eodem igitur argumentandi genere utendum est nobis hoc in loco, quo antea præced. §. fuimus usi. Versu 3. subjungit **אמר אלהי ישראל** *Dixit Deus Israël*. Continet imphralis, quâ Deus dicitur Deus Israël, formulam fœderis gratiæ, quod Deus cum

Israële pepigit, juxta Gen. XVII: 7. *Stabilio autem fœdus meum inter me & te, ac semen tuum post te per atates tuas, ut fœdus sit perpetuum, me esse tibi Deum & semini tuo post te, quo sensu Deus tempore Vet. Testam. erat Judæorum tantum Deus, cum quibus solis fœdus pepigerat, separatis illis sibi in peculium, quando sinebat omnes gentes ire viis suis. Sequitur לִי דָבָר צוֹר יִשְׂרָאֵל mihi dixit rupes Israël, vel, de me, quia illa, quæ immediatè subsequuntur, ipsum Davidem spectant. Rupes Israël non potest esse, nisi ad quem tuto confugere potest omnis verus Israëlita, ut sic super illâ collocatus servetur ab irâ. Quòd si nunc verba ista sic interpretemur, ut de eodem Sp. Dei dictum censeamus, quòd sit Deus Israël, quòd sit rupes Israël, manifestum utique erit, per illum Spiritum non angelum vel angelos, sed summum Deum esse intelligendum. Non potest sanè æstimari, fœdus gratiæ pangere Angelum vel angelos creatos cum homine peccatore; in fœdere enim illo talia sunt, quæ creaturæ nullo modo possunt adscribi. Promittitur in illo fœdere justitia & vita æterna danda à fœderis auctore. Est hæc justitia, quâ peccator coram Deo potest consistere, quæ appellatur justitia Dei*

Dei Rom. 111: 22. Ea non potest esse propria peccatoris iustitia, quæ nulla est; cùm simus omnes ut immundi, & omnes iustitia nostra ut vestis sordida Es. LXIV: 5. Hanc non possunt præstare angeli, sed Deus præstare potest. Per illud fœdus promittitur circumcisio cordis, & vera hominis sanctificatio; quæ sanè non nisi à Deo exhiberi potest, prout & passim in Scripturis hoc opus Deo tribuitur. Et ponit illa cordis nostri immutationem ejusmodi, quæ Creationis nomine in Scripturâ exprimi solet, quæ operatio non procedere potest, nisi à potentiâ infinitâ. Vita æterna verò proficisci non potest, nisi ab eo, apud quem est fons vitæ, qui est solus Deus Ps. xxxvi: 10. Postulatur in hoc fœdere fides ponenda in auctore illius fœderis. At eam negat Scriptura collocandam esse in creaturâ, & maledictum pronunciat eum, qui fiduciam ponit in homine, & ponit carnem brachium suum, & cujus cor recedit à Iehovâ Jer. xvii: 5. Rupes quoque Israël non potest esse alius, nisi qui Deus est Ps. xviii: 32. Nam quis est Deus, nisi Iehova; & quis est rupes, præterquam Deus noster? Id quod & natura rei suadet; nam in hoc metaphorico sensu Rupes Israël non potest esse alius, nisi in quo firmitèr queat niti ad sa-

lutem, per quem ab omnibus hostibus possit defendi, qui profecto nemo potest esse alius, quàm Deus. Si igitur Sp. Sanctus est Deus Israël, si est rupes ejusdem, cui tutò & firmitèr inniti possit, omninò summus erit Deus, neque potest per Sp. Sanctum Angelus vel unus vel tota angelorum multitudo intelligi. Si verò verba Davidis hunc in modum accipiamus, ut de tribus personis S. S. Trinitatis censeamus illum locutum, adhuc tamen efficax manebit pro Sp. S. divinitate argumentum. Possunt autem verba illa commodissimè hunc admittere sensum. Pater enim is est, qui elegit Israël, ut cum illo fœdus faceret, in Christo Salvatore, qui adjurat peccatorem, ut credat sibi, se futurum esse ipsi in Deum. Atque hoc passim appropriatur Patri tanquam illi, qui ex amore dedit nobis Filium & mittit Sp. Sanctum paracletum. Filius Dei verò est petra illa, ex quâ aquas biberunt Israëlita in deserto, quod expressè docetur à Paulo 1 Cor. X. 4. Sed sic tamen adhuc evinci potest, Sp. Sanctum esse summum & verum Deum. Collocatur enim in eodem ordine cum Patre & Filio, & ut auctor istius prophetiæ consideratur. At futura è longinquo, quæ nondum sunt in causis secundis, si prædicantur certò, & in-

Causa Spiritus Sancti. 21

infallibili cum eventu, indicant auctorem istius prædictionis primum, hoc est, qui ea ex semetipso novit, nullâ alterius revelatione interveniente, esse solum Deum. Id ipsemet Deus testatur Es. xli. 23. *Indicate quæ eventura sunt in posterum, ut cognoscamus, vos esse Deos, & vers. 26. Quis indicavit à principio, ut cognosceremus, aut ab antiquitate, ut diceremus, iustus est?* Nec potest intelligi, quomodo illa possint cognosci aliter quàm ex divinâ omni sufficientiâ & æterno consilio Dei, quo Deus certo tempore & certo ordine facere ea constituit. Tale erat vaticinium de adventu Messiae cum particulari circumstantiâ istius temporis, quo domus sive familia Davidis non erat germinatura, omni splendore regio sublato; quod cum demum post multa secula eveniret, non poterat ullius creaturæ sagacitate ex causis secundis, in quibus tum nondum erat, cognosci. Dein opus redemptionis, quod in hac prophetiâ peragendum innuitur, ejusmodi est, ut illud auctorem habeat Patrem, qui dedit ex amore erga mundum suum Filium, ut carne assumptâ Patri fieret obediens usque ad mortem crucis, Filius vero Dei hâc veniat considerandus, ut qui semetipsum dedit pretium redemptionis pro multis, & Sp. S.

tanquam is, qui efficaciam suam omnipotentem in cordibus nostris redemptionem à Filio Dei hic nobis paratam applicat; ad quæ omnia peragenda virtus & potentia infinita adeoque divina requiritur.

XI. Aliud Davidis dictum, ex quo æquè pateat Spiritus Dei divinitas, subjungamus, quod est Ps. cxxxix. 7, 8, 9, 10. *Quò ibo à Spiritu tuo, & quò à facie tuâ fugiam? si ascendam cælum ibi es; & sub sternam sepulchrum, Ecce te. Accipiam alas aurora, habitem in extremo maris, Etiam eò manus tua duceret me & teneret me dextra tua.* Totus in eo est Psalmista, ut magnitudinem divinam extollat, quam supponit tanquam fundamentum suæ petitionis. Ad illam magnitudinem divinam inter alia refert Omnipræsentiam, cui simul implicata est illa divina perfectio, quâ fit, ut omnia ab ipso in omnibus adeoque etiam homo dependeat, quæ Omnisufficientia appellari potest, quam citatis verbis ita adscribit Deo, ut tandem assignet Spiritui Dei. De Spiritu Dei inquit vers. 7. *Quo ibo à Spiritu tuo?* quasi diceret, nullus est locus in mundo, in quo me ab illo sic possim occultare, ut non mihi sit ita præsens, ut totus ab ipso dependeam, mecumque is possit agere quod voluerit. Spiritus autem ille Dei à Deo distin-

tingui censendus est eâdem ratione, quâ
 antea, juxta modum loquendi in Scripturâ
 receptum. At in antecedd. eum considera-
 vimus ut distinctam à Patre personam, ne-
 que id negaverit Auctor problematis, cu-
 jus socius, Sp. S. esse personam, contra So-
 cinianos in hoc ipso tractatu propugnat.
 Tantum ergo ostendendum nobis est, il-
 lum Dei Spiritum esse verum & summum
 Deum. Sane vix dubitari posse puto, illa,
 quæ de Deo in seqq. dicuntur etiam de
 Spiritu Dei intelligenda. Id enim ἀλληλουργία
 verborum videtur postulare. Quod vers. 7.
 negavit de Spiritu Dei, negat eodem versu
 verbis seqq. etiam de Deo, dicens, nullum
 esse locum in mundo, in quo se sic possit à
 Deo occultare, ut non adsit ipsi Deus. Fa-
 cies Dei est Deus præsens & intuens, cum
 ergo doceat, nuspiam se posse fugere, quin
 sit Deo præsens, & Deus vicissim sibi, pa-
 tet, nullum esse locum in mundo, in quo
 sic se possit occultare, ut Deus non sit ipsi
 sic præsens, quin totus ab illo dependeat.
 At cum sic ea, quæ vers. 7. dicta sunt de
 Spiritu Dei, quoque dicantur de Deo, etiam
 reliqua, quibus ista Omnipræsentia Dei in
 seqq. explicatur, Spiritui Sancto sunt adscri-
 benda. Versu 8. opponit loca quàm lon-
 gissimè inter se invicem remota, cælum &

24 *Causa Spiritus Sancti.*

internum sive interiora terræ, atque docet, Deum in istis locis esse, adeoque sic ad 7 corp̃ est dicendum, Spiritum in cœlo & inferno sive in inferioribus terræ esse. Pergit & vers. 9. opponit extrema terræ sibi invicem opposita, auroram nempe ubi sol oritur, & maris extremum. Notum autem est, mare respectu terræ Canaan situm esse ad Occidentem, ut ita Oriens & Occidens sibi invicem opponantur. Dicit, *si summat alus aurora*, h. e. si ad locum, ubi sol oritur, ita cito posset pervenire, sicut aurora ad se pervenit, vel, *si sibi substernat sepulchrum* etiam Dei manum se ibi ducere & dexteram ejus se ibi tenere, adeoque, & Deum illis omnibus in locis ita esse præsentem, ut in quocunque eorum sit, totus à Deo dependeat; ergo etiam de Spiritu Dei idem est intelligendum, eritque ille Omnipræseus, atque ita Omnipræsens, ut ab ipso David & quilibet homo, imò omnis creatura (par enim omnium est ratio) tota & omnino dependeat. Hæc autem planè divinæ sunt proprietates, & cui illæ conveniunt illi divina essentia non potest denegari. Possumus his addere ex Ps. LI. 13, 14. ubi petit *Spir. Sanctum Dei à se non auferri, & Spiritum ingenuitatis se sustentare*. In historiâ Regum Israël & Judæ etiam mentio

tio

tio fit Spiritus Dei agitantis prophetas, ut
2 Chron. XV. 1. cap. XX. 14. cap. XXIV.
20.

XII. Sæpe etiam memoratur Spiritus Sanctus à Prophetis, qui temporibus istorum Regum prophetarunt. De Christo sic prophetat Elaias cap. XI. 2. *Et quiescet super illo Spiritus Jehovæ, Spiritus Sapientia & intelligentia, Spiritus consilii & roboris, Spiritus scientia & timoris Jehovæ.* Sermo iterum est de Spiritu Jehovæ, qui à Jehovâ distinguitur ut persona, (eodem modo enim vox ista accipienda, quo passim in Scripturâ sumitur, nullâ exstante causâ, ob quam aliter hîc accipere oporteat) ita tamen ut sit idem numero & essentiâ Deus. Est enim Spiritus Jehovæ, qui est in ipso: nihil autem in Deo est, quin sit ipse Deus. Spiritus ille dicitur super Messîâ quiescere, hoc est, venire super illum, ut super eo maneat, quod sanè est intelligendum de ejus humanâ naturâ, cum divina non possit quid aliunde accipere. In illâ naturâ sic quiescit, ut habitet tanquam in templo, quod vel ipsum est manifestum signum divinitatis Sp. Sancti, quod suo loco plenius deducemus. Epitheta, quæ hîc Spiritui illi attribuantur, intelligenda sanè sunt respectu operationum & effectuum, quos in humanâ

Christi naturâ producit. Dicitur primum *Spiritus Sapientia*, quia operatur in Christo eam sapientiam, quâ cognoscit Deum secundum suam sufficientiam & voluntatem, adeoque consilium divinum de manifestatione gratiæ & justitiæ suæ in hominis salute, quod sic cognitum etiam promissimè exsecutus fuit. Dein appellatur *Spiritus prudentia*, quam in humanâ Christi naturâ ita produxit Sp. Sanctus, ut posset verum bonum & utile à falso dignoscere, & nosceret media optima, quorum usu finis consecutionem rectè obtinere posset. Sequitur aliud epitheton, juxta quod vocatur *Spiritus consilii*, dum nimirum in Christo effecit, ut post cognita media ea quoque legitimo modo & ordine ad obtinendum finem propositum adhiberet. Quoniam autem consilium istud executioni mandari nequit absque fortitudine, etiam nominatur *Spiritus fortitudinis*, quam imprimis exseruit Christus, dum nullis obstaculis passus est se averti, quin curaret ea, quæ essent Patris sui, ejusque voluntatem plenissimè exsequeretur, tum totâ suâ vitâ, tum imprimis in vitæ extremo, dum non refugit subire cum summâ patientiâ ignominiam, probra & contumelias qualvis, injurias, plagas, vulnera, mortem ipsam eamque
ignoro

ignominiosam quam maximè & acerbissimam in cruce. Tandem denominat illum Spiritum à cognitione & timore Domini, ut sit *Spiritus cognitionis & timoris Domini*. *Spiritus cognitionis* est intelligendus cum distinctione à *Spiritu sapientia*, ut ea cognitio referatur ad homines, ad membra Christi; sicque Spiritus Sanctus in Christo id effecerit, ut sciret *suprañon*, tentatus in omnibus absque peccato, ut accommodaret quoque se illorum infirmitatibus. *Spiritus timoris Domini* in humanâ Christi naturâ operatus est, ut ritè æstimaret gloriam & magnitudinem Dei, item sanctitatem ipsius & iram adversus peccata, & peccata detestaretur tanquam Deo adversa, è contrario verò omnia conferre anniteretur, quæ facerent ad nominis Dei sanctificationem. Hæc autem dum sic potuit operari in animâ Christi Sp. Sanctus, utique habuit eo ipso vim & potentiam planè divinam, adeoque & divinæ fuit essentia, juxta illa, quæ in superioribus fuerunt probata. Eundem illum Spiritum super se esse proficitur Christus apud Elai. LXI. 1. quod Christo applicatur testimonium in historiâ Evangelicâ Luc. IV. 1. Sic habent verba ad rem nostram præsentem facientia. *Spiritus Domini Iehova est super me, propterea quia un-*
xit

xit Iehova me ad evangelizandum mansuetis &c. Unctio enim illa nihil aliud est, quàm quòd Deus Pater Filio in humanâ naturâ dederit Sp. S., qui ea operaretur in ipso, quæ ad functionem Mediatorii officii fuerunt requisita, de quibus statim diximus. Michæas de Spiritu prophetico, sibi tanquam prophetæ concessio, ita loquitur cap. III. 8. *Sed ego plenus sum virtute à Spiritu Dei & iudicio ac fortitudine, ad indicandum Iacobo defectionem suam & Israël peccatum suum; quæ quomodo divinitatem Spiritus probent, in antecedentibus declaratum fuit.*

XIII. Insignis est locus Haggæi II. 4, 5. Sic Deus alloquitur Sorobabelem & Iehosua & omnem populum terræ, ut *forti animo eos esse jubeat in ædificatione templi, ratione hâc adductâ: Nam ego vobiscum sum, ait Iehova Deus exercituum cum Verbo, quod promisi vobis, cum exiretis ex Egypto, & Spiritus meus stat in medio vestri ne timeatis.* Sic enim Spiritui Dei, qui manifestè distinguitur eadem ratione, ut antea, ab illâ personâ, quæ hîc dicitur Iehova Deus exercituum, tum à Verbo, quod λόγος à Johanne appellatur, tribuitur vis omnipotens, quâ, sit defensor ædificatores templi, iis benedicturus, ut

per-

perficiant ea quæ suscepserint, id quod phrasis illa עמדת בתוככם satis evincit.

Potest illa phrasis commodè sic accipi, ut designet permanentiam & perseverantiam, sicut de Timore Dei dicitur Ps. xix: 10.

Timor Iehovæ purus לעד עמדת manens in æternum, & de justitiâ Dei Ps. cx: 3. עדרתו

לעד עמדת *iustitia ejus manet in æternum*; cum autem hinc desumatur argumentum ad expellendum timorem, idque firmum & solidum, necessario debet per illud stare in medio ipsorum talis permanentia inter ipsos intelligi, quæ conjunctam habeat promptitudinem & sufficientiam ad auxiliandum & benedicendum, eaque non potest esse nisi divina, cum omnis potentia creaturæ evanida sit admodum & fragilis, adeoque non sufficiat ad deponendum omnem metum. Ita quoque vis istiusmodi summè efficax & omnipotens tribuitur Spiritui Dei Zach. iv: 6. *Hoc est verbum Iehovæ ad Zorobabelem, dicendo: Non strenuitate, neque vi, sed per Spiritum meum, inquit Iehovæ Deus exercituum.* Hæc verba continent summariam explicationem emblematis, quod exhibitum fuit videndum prophetæ, vers. 2. & 3. dum vidit candel-

labrum aureum & duas oleas juxta illud;
 quo candelabro procul dubio id significatum fuit, quod designatum est per candelabrum aureum in tabernaculo & templo, nimirum Ecclesia & in illâ imprimis Prophetæ, Apostoli, omnesque Doctores V. & N. T. qui lucem verbi & Sp. Sancti omnibus exhibent, qui pertinent ad Ecclesiam. Cum autem duæ oleæ juxta candelabrum stantes exhibeantur, repræsentatum fuit, Spiritum Dei esse auctorem omnis istius lucis, adeoque opificem omnium, quæ ad templi mystici & spiritualis constitutionem pertinent. Ab his oleis possunt distinguī duæ spicæ olei, de quibus est sermo vers. 12. quæ dicuntur vers. 14. *duo illi filii olei qui stant juxta dominum totius terre.* Oleæ enim ipsæ sunt arbores, sicque designant Sp. Sanctum, prout in Ecclesiâ tum V. tum N. T. auctor est omnis gratiæ; sed spicæ illæ sunt arborum istarum fructus, denotantque eos, qui singulari ratione unctionis Sp. S. fiunt participes, suntque testes gratiæ illius sub utroque Testamento, cujusmodi sunt Prophetæ & Apostoli. Sic autem iterum vis omnipotens & omnisufficientia Sp. Sancto adscribitur. Quod denuo suppeditat nobis argumentum ad demonstrandum, Sp. S. esse Deum : fluit enim

enim ista omnipotentia & omnisufficiencia ex infinitâ illâ & divinâ essentiâ, sive, eadem planè est cum illâ divinâ essentiâ. Deus ergo summus est Sp. Sanctus, neque potest per eum vel Angelus vel cœtus angelorum denotari.

XIV. Atque sic constantè libri V. T. de Spiritu Sancto loquuntur, eumque describunt tanquam personam distinctam à Patre & Filio, quæ tamen eandem habeat cum illis divinam essentiam. Clariora adhuc sunt testimonia, quæ suppeditantur à libris N. T. quorum primum nobis exhibet caput xii. Matthæi. Sanaverat Jesus Nazarenus vers. 22. hominem, *qui obsessus à Diabolo cæcus & mutus pariter erat, ita ut ille videret & loqueretur.* Unde colligitur, à diabolo impeditos fuisse ipsius oculos & linguam, ut loqui & videre non valeret, & ejecto diabolo officium & oculos & linguam rectè fecisse. Collegerat inde populus, quamvis cum dubitatione aliqua, vers. 23. eum esse Messiam sive Christum, (quem dicebat filium Davidis, quòd Davidi singularitè promissum esset, ex ejus lumbis Messiam esse proditurum) quod fundabatur in eo, quòd de Messia prædictum fuerat, *ipsum contriturum caput serpentis*, Gen. III, 15, & *quòd captivitas* for-

fortis sit accipienaa & captura violentia-
 sara El. xlix, 25. & quòd par sit futurus
 propheta Mofi Deut. xviii, 15. qui suis
 miraculis, in quibus Dei digitus conspicie-
 batur, pudefecit magos & ipsorum præsi-
 dem Diabolum. Id quod sic colligebat po-
 pulus rectius poterant colligere Pharisei in
 lege magis versati, & collegisse videntur;
 unde contra conscientiam & repugnantes
 veritati dixisse arguuntur à Christo, ipsum
 Diabolos ejicere per Beelzebul principem
 dæmoniorum. Cùm enim omnia, quæ
 à Christo fierent & docerentur, tende-
 rent ad Diaboli potestatem destruendam,
 fieri non poterat, ut per collusionem cum
 ipso ageret. Ostendit igitur, se per Spiri-
 tum Dei, qui super se quiescebat, & qui
 unà cum iplo mittendus erat, ejicere dæ-
 monia & potestatem principis diabolorum
 destruere, regnumque Dei inter Judæos
 stabilire velle verſ. 28. Εἰ γὰρ ἐγὼ ἐκ πνεύματος
 Θεοῦ ἐκβάλλω τὰ δαιμόνια, ἀπὸ ἰσχυροῦ εἰς ὑμᾶς
 ἡ βασιλεία τῆς Θεοῦ. Spiritus igitur Dei erat,
 per quem ejiciebat dæmones Christus; &
 blasphemantes illum Spiritum Dei, dum o-
 pera ipsius nomine operum diaboli traduc-
 cerent, se reos faciebant peccati istius, quod
 non sit remittendum, sive, quod non sit remit-
 tendum, nec in hoc seculo nec in futuro. Matth.

XII. 31, 32. Spiritus ille Dei iterum, ut in antecedentibus, à Deo distinguitur, & tamen docetur, ita graviter posse in illum peccari, ut peccatum istud nunquam sit remittendum. Si igitur in Spiritum S. peccari possit tam gravi peccato, ut illud non sit remittendum, oportet Sp. S. esse verum Legislatorem, *qui solus potest servare & perdere* Jac. IV. 12. Neque potest dici, hoc peccatum propterea tam grave censeretur, eò quòd, quamvis directè contra creaturam sit commissum, redundet tamen in injuriam adversus Deum; nam peccata talia, quæ à creaturâ redundant in Deum pro remissibilibus habentur; quin imò expressè Christus docet, *omne peccatum & omnem blasphemiam remissum iri*, etiam, *si quis verbum dixerit contra Filium hominis id ei remissum iri*, sed *qui dixerit contra Spiritum Sanctum non remissum illi iri*, neque in hoc seculo neque in futuro, quamvis etiam illud peccatum, quod commissum fuerit contra *Filium hominis*, redundet in Deum. Quod si igitur Sp. S. sit legislator, qui potest servare & perdere, est ergo Deus summus, est Deus omnipotens, & per consequens nec pro angelo nec universitate angelorum potest hoc in loco accipi. Si quis dixerit, gravitatem istius peccati non pendere à dignita-

C

te

te objecti, quod possit esse creatura, sed ab evidentiâ operationis, & illuminationis, is opponit quæ sunt conjungenda, & contradicit verbis Christi, qui *omne peccatum remittendum* dicit, *etiam si quis verbum dixerit contra Filium hominis*, adeoque multò magis peccatum contra Angelum vel Angelos commissum; & eo ipso suppeditat argumentum pro Sp. S. divinitate, cùm ista illuminatio, ista mutatio mentis non possit proficisci nisi ab eo, qui est formator cordis hominum, quem solum Deum esse superius est evictum.

XV. Alium ex Matthæo adjiciamus locum, qui legitur Matth. XXVIII. 19. ubi Christus docet, in cujus nomine sit baptizandum: Μαθητεύσατε πάντα τὰ ἔθνη, βαπτίζοντες αὐτοὺς εἰς τὸ ὄνομα ᾧ πατρὸς καὶ υἱοῦ καὶ ἁγίου πνεύματος. Dicit Auctor Problematis p. 3. *Neque enim poteram impetrare à me ut crederem, non esse personam cum, in cujus nomen, non secus ac in nomen Patris & Filii baptizaremur. Constat ergo inter nos, Sp. S. à Patre & Filio distingui, uti persona à personâ distinguitur. Utinam verò accuratius attendisset ad illam phrasin, in nomen alicujus baptizari, potuisset ex illâ æquè inferre, Sp. S. esse summum Deum, atque ex eâ collegit, Sp. S. esse distinctam personam à Pa-*

à Patre & Filio. Baptismum utique suscipere debemus *tanquam lavacrum regenerationis & renovationis Spiritus Sancti* Tit. III. 5. *tanquam inoperta & alyabris ouvidh-otis*; 1 Pet. III. 21; significat igitur Baptismus & obsignat nobis, nos regeneratum & renovatum iri à Spiritu Sancto, & nos acquisituros illud jus, ut possimus in fide à Deo petere & postulare, ut ipse sit perpetuò noster Deus, & nos simus ipsi in perpetuum populum; adeoque, dum Baptismum petimus, petimus nos regenerari & renovari per Sp. S. volumus censerì in populo Dei, postulamus, ut ille sit noster Deus nosque omni prosequatur benignitate in vitam æternam. Dum autem illum suscipimus *in nomen* alicujus, suscipimus illum ejusdem auctoritate, credimus ipsi, fiduciam ponimus in ipso tanquam tali, qui, quæ per Baptismum significantur, sit collaturus bona & beneficia, quòd sit futurus noster Deus & nos suscepturus in suum populum; suscipimus in nomen ipsius, ut ab illo nominemur tanquam sui, tanquam eum agnoscentes pro nostro Domino, pro Sanctificatore nostro. Hoc enim est in nomen vel in romine alicujus (æquipollere enim hæc duo patet ex Act. 2: 38, ubi legitur, *baptizetur unusquisque*

in nomine I. Christi) aliquid agere aut admittere vel suscipere. Contare id potest ex iis, quæ legimus 1 Cor. I. 12, 13. ubi negat, Corinthios in nomen Pauli esse Baptizatos. *Hoc autem dico, quod unusquisque vestrum dicat; Ego quidem sum Pauli, ego verò Apollo, ego verò Cepha, ego verò Christi. Divisusne est Christus? an Paulus crucifixus est pro vobis, aut in nomen Pauli baptizati estis? Ex quibus patet, eum, in cuius nomen baptizati sumus, nos agnoscere pro fidei nostræ magistro, ab eo nos denominari velle & haberi pro ipsius servis & ipsi addictis. Quod adhuc clarius liquet, si conteramus ea, quæ de eo negotio iterum dicit cap III. 4. Quum enim quis dicat, Ego quidem sum Pauli, aliter verò, Ego Apollo, an non carnales estis? Quis igitur est Paulus, quis verò Apollos, nisi ministri, per quos credidistis & ut cuique Dominus dedit? Inde enim apparet, in nomen alicujus baptizari, & esse ministrum, per quem credidimus, ut cuique Dominus dedit, esse planè opposita, adeoque, eum, in cuius nomen baptizamur, esse Dominum nostrum, esse Dominum nostræ fidei, eum nos agnoscere pro nostro Deo, nos totos ei consecrare in ipsius servitium & cultum, nos illi subicere quoad animam &*
quo-

quoad corpus, quod utique est eum habere pro summo Deo. Cum ergo dicimur baptizari in nomen Sp. S. non possumus eum censere ministrum Dei, adeoque non possumus eum habere pro angelo vel cætu Angelorum. Hi enim omnes sunt *πνεύματα λειτουργικά εἰς διακονίαν ἀποσταλλόμενα διὰ τῶν μέλλοντα κληρονομεῖν σωτηρίαν* Heb. I, 14. Omnes illi sunt *σύνδουλοι* Johannis Apostoli, adeoque & Pauli, qui ejusdem dignitatis fuit, & *fratrum ejus qui habent testimonium Iesu*, id ipsis angelis testantibus Apoc. xix. 10. & c. xxii. 9. Pugnant ergo inter se invicem esse ministrum Domini & esse ipsum Dominum, addici Domino in servitium & per ministrum adduci ad illum Dominum. Et sanè, impossibile est hîc cogitare de distinctione essentiali inter illos, in quorum nomen sic baptizatur, cum pari illi omnes habeantur loco. Æquè phrasis & eodem modo adhibetur de Spiritu Sancto atque de Patre & de Filio, Scriptura nullam differentiam inter eos ponit, & phrasis est talis naturæ, ut inferat relationem ad Deum supremum. Quidni ergo Auctor problematis eodem jure dixit: *Non possum à me impetrare ut crederem, non esse Deum eum in cujus nomen non secus ac in nomen Patris & Filii*

baptizaremur, ac dixit, se non potuisse impetrare, ut crederet, non esse personam eum, *in cujus nomen non secus ac nomen Patris & Filii baptizaremur?* Adde, quod baptizari in nomen alicujus est per ipsum servari, quod & ex dictis patet, & ex Act. 17. 12. ubi de Christo dicitur: *Et non est in alio ullo salus, neque enim nomen datum est aliud sub cælo, per quod nos oporteat servari*, quàm in nomine Jesu. At quod hîc dicitur de Christo non potest intelligi cum exclusione Patris, adeoque nec cum exclusione Sp. S. Pater nos servat dando nobis Filium, Filius nos servat, tradendo semetipsum hostiam piacularem pro nobis, Sp. S. nos servat nos inferendo Christo, qui est fons salutis, & nos participes faciendo beneficiorum Christi. Est ergo Pater, Filius & Spir. Sanctus nomen illud, quod nos oportet profiteri, si servari velimus, hoc profiteamur dum in illud baptizamur; tunc testamur, nos illum, in cujus nomen baptizamur, habere pro fonte salutis & omnium bonorum adeoque pro datore omnium bonorum, pro patre Lumini, pro summo & Omnipotente Deo. Lightfootus non malè ad hunc locum: *Baptizabant Judæi proselytos In nomen Patris, id est, professionem Dei, quem no-*
mine

mine Patris insignierunt: Apostoli Judæos in nomen Jesu, filii; Gentes In nomen Patris Filii & Sp. Sancti. Revelaverat se Pater in Veteri fœdere; Filius in novo in carne humana, miraculis, doctrinâ, resurrectione, ascensione; Spiritus Sanctus in donis & miraculis suis: ad summam ita maturitatem accreverat doctrina de Sacrosanctâ Trinitate, ad assequendam cujus agnitionem incubuit omnibus, verum Deum Trin-Unum profitentibus, ut in istius nomen baptizarentur.

XVI. Adjungamus his locum ex Johanne Evangelistâ c. XIV: 26. Ο' δὲ πνεύματι μου, ἐκεῖν ὑμᾶς διδάξει πάντα, καὶ ὑπομνήσει ὑμᾶς πάντα ἃ εἶπον ὑμῖν. Confer cap. XIV. 17. ubi appellatur τὸ πνεύμα τ' ἀληθείας & c. XV. 26. Ο' τὴν ἥ ἐλθὼν ὁ παράκλητος, ὃν ἐγὼ πέμψω ὑμῖν παρὰ τὸ πατρός, τὸ πνεύμα τ' ἀληθείας, ὃ παρὰ τὸ Πατρός ἐκπορεύεται, ἐκεῖν μνησθήσεται περὶ ἐμοῦ. c. XVI. 13. 14. Ο' τὴν ἥ ἐλθὼν ἐκείνη, τὸ πνεύμα τ' ἀληθείας, ὃ δὴγήσει ὑμᾶς εἰς πᾶσαν τ' ἀλήθειαν· ἐγὼ λαλήσει ἀφ' ἐαυτοῦ, ὅσα αὐτὸς ἀκούσῃ, λαλήσει, καὶ τὰ ἐρχόμενα ἀναγγελεῖ ὑμῖν. Εἰκεῖν ὑμῶς δοξάσει, ὅτι ἐκ τῶ ἐμοῦ λήψεται, καὶ ἀναγγελεῖ ὑμῖν. Sp. S. dicitur in illis locis I. ὁ παράκλητος, qui opponitur τῷ κατηγορῶν accusatori. Et sic tunc inter Judæos lumbatur vox illa. Intercedit ille pro nobis,

quatenus habet φρόνημα studium pro nobis,
 & ὑπερβυγχανει ὑπὲρ ἡμῶν συναγωγῆς ἀλαλήτοις
 Rom. v 111. 26. Auctor ergo est precum
 nostrarum tanquam Spiritus precum, eas-
 que in nobis operatur, quod non posse fie-
 ri nisi per operationem divinam, quæ æqui-
 polleat Creationi, superius est demonstra-
 tum. Neque enim ullâ specie rationis dici
 potest, istos gemitus esse ipsius Sp. Sancti,
 cum ne quidem in angelum Beatum id ca-
 dere possit, cum isti gemitus non possint
 fieri absque aliquo dolore & tristitiâ, quæ
 cum ipsorum felicitate consistere nequit.
 Et superius vers. 23. illi gemitus nostri esse
 dicuntur, qui habemus illum Spiritum:
 Ἀλλὰ καὶ αὐτοὶ τὸ ἀπαρχὴν τοῦ πνεύματος ἔχοντες,
 καὶ ἡμῖν αὐτοὶ ἐν ἑαυτοῖς συνάζομεν: non ergo alio
 sensu pro nobis intercedere dicitur per illos
 gemitus, nisi quatenus illos in nobis opera-
 tur & tanquam advocatus libellum suppli-
 cem nobis præformat, quo nos utentes
 eum nostrum facimus. 2. Vocatur τὸ πνεῦμα
 καὶ ἀληθεία, eodem sensu procul dubio, quo
 Christus est veritas, auctor nempe omnis
 veri, quod divinum planè est ὁσιότημα.
 Ita cap. xvi. 14. dicit Christus: *Ex meo
 accipiet & renunciabit vobis:* subjungitur
 autem vers. 15. *Omnia, quæ habet Pater, mea
 sunt. Ideò dixi: Ex meo accipiet & renun-
 ciabit*

ciabit vobis. Pater enim procul omni dubio est auctor omnis veri, adeoque omnis veritas apud ipsum est: at illa veritas est etiam Christi, & eadem est Sp. Sancti. Et quamvis hæc speciali quodam sensu hîc dicantur, quòd veritas ista fundamentalis, quam Christus & Sp. S. docet per Apostolos, in Evangelio, eadem sit cum illâ, quam & Pater ante adventum Christi docuit per Moïsem & Prophetas, non tamen specialis ille sensus excludit generalem, cum nihil sit in scripturis, quod ei repugnet, sed consensus scripturæ cum eo quàm maximè conveniat. Sed his verbis denotatur arctissima illa unio, quæ est inter Patrem, Filium & Sp. S. quâ uti est unica & eadem eorum voluntas, ita unica & eadem essentia omnium istorum trium. Unde etiam est, ut dicatur *ἐκ τοῦ πατρὸς καὶ τοῦ υἱοῦ καὶ τοῦ πνεύματος*, sicut & Filius ipsum dicitur mittere à Patre. Hæc in angelos creatos nullâ ratione cadere possunt.

XVII. Ab Evangelistis progrediamur ad Acta Apostolorum, & quidem ad cap. V. in quo insigne testimonium occurrit pro supremâ divinitate Sp. S. Ananias & Sapphira uxor ejus, qui erant ex conversis ad Christum per Evangelii annunciationem, vendiderant possessionem suam, & præ se ferentes, ac si integrum pretium
ad

ad pedes Apostolorum posuissent, partem pretii defraudârant, sicque conati fuerant decipere Apostolos iisque mentiti erant. Petrus docet vers. 3. illos mentitos esse Spiritui Sancto. Phrasis enim illa ψεύσατο τὸ πνῶμα τὸ ἅγιον hîc idem significat, quod ψεύσατο τῷ πνῶματι τῷ ἁγίῳ. Etenim vocabulum ψεύσατο constructum cum Accusativo significat fallere Spiritum Sanctum, quod est fallendi causâ falsum dicere: non enim actu falli potest, sed potest tamen falli quoad intentionem, dum ei mentiris. Aristoph. in Nub. Μὰ τὴν Δι' εἰ ψεύσῃς γέ με *Per Iovem non fallas me.* Aratus ubi de Syrio loquitur: ἐκ ἐπ' αὐτὸν αἶψ' ἡελίῳ ἀνιόντα φυγαλαῖ ψεύσῃ *Non amplius illum cum sole exorientem arbores fallunt.* Euripides in Iphigeniâ in Tauris, Ἡμεῖς δ' Ἀπόλλων μάντις εἰν ἐψεύσατο *Nos verò Apollo vates decepit.* Et sic Græci quoque habent Interpretes Esai. LVII. 11. καὶ ἐψεύσατο με, ὅτι ἐκ ἐμνήδης ἐδὲ ἔλαβες με εἰς ἔξοχον, quorum stylum sæpe imitantur N. Test. Scriptores. Sic ergo hîc dicit Petrus ad Ananiam: *Quare implevit Satanâs cor tuum, ut falleres Spiritum Sanctum & interverteres ex pretio agri?* Sciebat Ananias & Sapphira, Apostolos in festo Pencerostes impletos fuisse Sp. Sancto; non enim poterat latere ei, qui discipulus erat.

erat Hierosolymis, solemne illud factum, quod totam Hierosolymam commoverat. Dum ergo voluit fallere Apostolos, id interpretatur Petrus quasi voluisset fallere ipsum Sp. S., eoque nomine istum acculat vers. 3. quâtenus sic voluerit experimentum capere, an reverâ Spiritus Dei habitaret in Apostolis. Non malè hîc Grotius: *Mentiri Deo aut Spiritui Sancto dicitur is, qui sperat, se Apostolos fallere posse Spiritu S. instructos.* Et quoniam videri poterat tantum voluisse fallere homines, huic Objectioni occurrit Petrus vers. 4. dicendo; non tantum voluisse fallere homines, sed omninò voluisse fallere alium, quem hîc vocat Deum, quem tamen vers. 3. appellaverat Sp. Sanctum. Opponuntur ergo homines Sp. Sancto, opponuntur etiam Deo, adeoque Sp. S. est Deus. Cui enim primario mentitus fuit Ananias, sive, quem primario conatus est fallere Ananias, ille est Deus vers. 4. Atqui Sp. S. est is, quem primariò voluit fallere Ananias, sive, cui mentitus est vers. 3. Sequitur ergo, Spiritum Sanctum esse Deum. Illa verò interpretatio vers. 3. quâ utitur Bidellus Anglicus ille, cujus mentionem facit Auctor Problematis, quod *ἡ ἀπολογία* cum *Accusativo* apud *Græcos auctores idem sit, quod ἀπαλογία, hoc est, simul-*

simulare & fingere, quali dixerit Petrus, *Ananiam ex suggestione Spiritus immundi voluisse istam pecuniam intervertere, & tamen obtrusisse se Apostolis, pariter ut reliquos id fecisse motu Spiritus Sancti impulsum*, jam concidit; primum tanquam non necessaria, quia ostendimus, *ὅτι ψεύσας* cum Accusativo contructum etiam significare, decipere, fallere aliquem; deinde tanquam inepta, cum tollat nexum inter vers. 3. & 4. quem ostendimus; qui tanè nullus esse potest, si *ψεύσας* cum Accusativo vers. 3. planè aliud significet, quàm *ὁ ψεύσας* cum Dativo vers. 4. Et tanè, si Spiritus Sanctus non sit Deus, sed tantùm Dei legatus, angelus nempe vel angelorum chorus, & mens Petri sit, prout vult Bidellus; (mendacium, quod commisisti in Apostolos redundat in Deum, quia sunt ejus legati) non minus Deo debuit opponi Sp. Sanctus, quàm illi opponuntur homines: *non mentitus es hominibus, sed Deo*, sicque non magis debuisset accusari eo nomine, quòd voluisset fallere Sp. S. quàm quòd voluerit fallere homines, atque eadem ratione dicere Apostolus, *non mentitus es Sp. Sancto, sed Deo mentitus es*, cujus planè contrarium ille hìc dicit. Deus igitur est Spiritus Sanctus, & quidem legislator, contra quem tam
gra-

gravitèr potest peccari, juxta eà, quæ superius fuerunt dicta, imò Deus summus, oppositus hominibus adeoque & angelis aliisque creaturis.

XVIII Non puto, prætereundum nobis esse capitis Act. XIII. verbum 2. *Λειτουργούντων αὐτῷ τῷ κυρίῳ ὡς ὑποτάκοντες εἰς τὸ πνεῦμα π αῖμον*, Ἀποδείσαντες δὲ ἡμοι τί τε Βαρνάβαν καὶ τὸν Σαῦλον εἰς τὸ ἔργον ὃ παρατετακίμαται αὐτοῖς. Spiritus sanctus jubet non *Domino* sed *sibi* separari Barnabam & Saulum, quo significatur, eandem esse virtutem & potestatem Domini & Spiritus Sancti, qui si minor esset Domino, dicturus fuisset: *Separate Domino vel Deo Barnabam & Saulum*. Præcipit ut sibi separentur, ad quod ipse eos vocaverit. Constituit ergo illos ministros sibi, servos suos vocat: at sicut non possumus esse servi hominum in iis, quæ spectant ad religionem & conscientiam, ita nec possumus esse servi angelorum, eadem enim ratio contra utramque servitutem militat, quam adducit Paulus 1 Cor. VII. 23. *Τιμίς ἡγοράδιτε. μὴ γίνεσθε δούλοι ἀνθρώπων. Δούλος ἀνθρώπων* opponitur τῷ εἶναι δούλον Χριστοῦ. Servus Christi is est, qui se ipsi totum subijcit quoad animam & corpus: nos enim pretio sanguinis sui redemit & addixit sibi in servitutem, quod idem est ac esse servos justitiæ. Qui sic est ser-

rituum. converſis ex gentibus conceſſâ, dicunt: *Viſum eſt Spiritui Sancto & nobis, non majus vobis imponere onus præter iſta neceſſaria, Ut abſtineatis ab idolothymiis & ſanguine & ſuffocato & ſcortatione, à quibus ſi voſmet ipſos ſervaveritis bene facietis.* Ita poſtea Sp. S. certos limites determinavit prædicationis Euangelii Apoſtolis eorumque adjutoribus: Paulus & Silas prohibiti ſunt à Spiritu S. loqui ſermonem Dei in Aſiâ. Cum veniſſent in Myſiam, tentabant verſus Bithyniam, ſed non ſivit eos ire Spiritus Jeſu, Act. xvi. 6, 7. Conſtrinxit iſ Paulum, ut Hieroſolymam tenderet, & coram ſacerdotibus & ſenioribus populi prædicaret Chriſtum, quem antea fuerat perſecutus. Ita enim ipſe Act. XX. 22. inquit: *Ego vincſus Spiritu proficiſcor Hieroſolymam & verſ. 23. Sp. Sanctus oppidatim teſtatur, dicens: vincula & afflictiones me exſpectare.* Ille etiam Sp. Sanctus eſt, qui in Eccleſiâ conſtituit Episcopos, prout docet Paulus Act. XX. 28. ex quibus omnibus apparet, illum habere curam Eccleſiæ tanquam ſuæ domus, quæ ipſum ut Dominum debeat agnoſcere & per conſequens ut Summum Deum venerari, quam reverentiam nulli Angelo, nulli creaturæ, licet exhibere. Qui enim ſic eſt

Do-

Dominus Ecclesiæ, eam regit & gubernat, ille est Dominus fidei ejus, quam habet Ecclesia.

XX. Quo imprimis facit illa Scripturæ phrasis, quâ dicitur Sp. S. habitare in nobis tanquam in templo suo, & nos esse templum Sp. Sancti Rom. VIII. II. *Si vero Spiritus ejus, qui suscitavit Iesum ex mortuis habitat in vobis, is qui resuscitavit Christum ex mortuis vivificabit & corpora vestra mortalia per Spiritum suum habitantem in vobis.* I Cor. III. 16. *Nonne nôstis, quod templum Dei estis, & quod Spiritus Dei habitat in vobis?* vers. 17. *Si quis templum Dei corrumpit, corrumpet ipsum Deus: templum enim Dei sanctum est, quod estis vos.* I Cor. VI. 19, 20. *Aut nonne nôstis, quod corpus vestrum templum est Spiritus Sancti, quem habetis à Deo, & non estis vestri: Etsi estis pretio. Glorificate igitur Deum in corpore vestro & in Spiritu vestro; quæ sunt Dei.* Dicuntur his in locis fideles templa Spiritus Sancti, quod vel solum & absolutè consideratum præbet nobis solidum pro Sp. Sancti divinitate argumentum. Respicitur per illam phrasin ad templum Hierosolymitanum, quod Deo Israël, ut ab ipso habitaretur, exstructum fuit; id quod ex historiâ inaugurationis &

D

de-

dedicationis istius templi, quæ 1 Reg. viii. describitur, manifestum. Dicitur vers. 11. quòd impleverit gloria Iehovæ domum Iehovæ, vers. 16. 20. *adificata dicitur domus, ubi esset nomen Iehovæ.* Cum autem vers. 27. doceatur, *Deum non reverà habitare in terrâ, nec cælos ipsos nec cælos cælorum capere Deum, adeoque tanto minus hanc domum, quam edificaverit Salomon, & postea constantèr petatur à Deo, ut auscultet in loco habitationis suæ in cælis, ut audiat è cælis* vers. 30. 32. 34. 36. 39. 43. 45. 49. videtur indicari, hoc templum tantum esse typum & umbram veri Dei templi, quod est Christus mysticus, caput cum suis membris. Ita de Christo dicitur Col. I. 18, 19. *Et ipse (Filius dilectus Dei) est caput corporis Ecclesiæ quoniam in ipso placuit omnem plenitudinem habitare. & cap. II. 9. Quoniam in ipso habitat omnis plenitudo Deitatis corporaliter;* de fidelibus verò id, quod supra laudavimus 1 Cor. III. & VI. Cùm autem templum sit destinatum ad cultum ejus, qui in eo vel typicè vel reverà dicitur habitare, manifestum est, fideles destinatos esse ad cultum Sp. S. qui in ipsis habitat. Dein, fideles sunt Θεὸς οἰκοδομὴν Dei *edificatio* 1 Cor. III. 9. sunt *templum Dei* vers. 16. *ædificatum nempe, ut Deus in ipsis habitet: at ex*
Act.

Act. xiii. xv. xvi. xx. quæ vidimus §. 18. & 19. plane apparet, fideles, sive Ecclesiam, esse structarum Sp. Sancti, & ex 1 Cor. VI. 19, eos esse templum Spiritus Sancti; unde colligitur, Sp. Sanctum esse Deum: non enim possunt esse structura non-Dei, qui omnilufficiant illâ & efficaciam caret, quæ ad ejusmodi structuram est necessaria, nec possunt esse ad honorem & ad gloriam ejus, qui sit non-Deus. Ecclesia sub N. T. ædificanda dicitur **הכל יהוה** Zach. VI. 12. cujus ergo templum sunt fideles ille verus est Jehova, supremus & æternus Deus. Sunt autem ad honorem & ad usum ejus, qui in ipsis habitat, adeoque sunt ad honorem & ad usum Spir. Sancti, qui in illis habitare dicitur, sicut domus est ad honorem & ad usum Patrisfamilias, qui illam incolit. Præterea, Ecclesia est *templum Dei Sanctum* 1 Cor. III. 17. Sanctum dicebatur sub V. T. id quod soli Deo erat separatum, sicque sanctum erat templum, quia in eo solus Deus debebat coli. Hinc Jer. xix. 4. dicuntur Judæi *alienasse locum hunc, quando in eo adoleverunt Diis aliis, quos non norunt ipsi & Patres ipsorum & reges Judæ.* Multo magis ergo alienaretur Ecclesia Dei, verum ejus templum, si alii sanctificaretur, si alii sanctum esset, quàm

summo & æterno Deo; concludendum ergo omnino est, Sp. S., cujus templum sanctum sumus, non esse angelorum cætum, sed supremum & æternum Deum, ejusdem cum Patre & Filio naturæ & essentiæ. His omnibus adde, quod sic sumus templum Sp. S. ut illi emti sumus pretio. Sumus ergo sic ejus templum, ut ipsius planè sumus, ipsi addicti per emtionem factam pretio. Habebat nos Spiritus Sanctus per Creationem, unà cum Patre & Filio: sic eramus ipsius jure Creationis, adeoque debebamus esse ad usum ipsius, hoc est, ad ipsius gloriam. Per peccatum facti sumus illi inutiles, inepti ad ejus gloriam. Per redemptionem Christi effectum est, ut possit nobis uti, quia *is nobis factus est à Deo sapientia, justitia, sanctificatio & redemptio* 1 Cor. I. 30.

XXI. Consideratione nostrâ dignus etiam est locus 1 Cor. II. 10. 11. ubi Spiritui Sancto Omniscientia adscribitur. *Spiritus enim scrutatur omnia, etiam profunditates Dei. Quis enim hominum novit ea, quæ sunt hominis, nisi Spiritus hominis, qui est in ipso: ita quæ sunt Dei nemo novit, nisi Spiritus Dei.* Dum Spiritus Dei hîc dicitur scrutari omnia, non debet hoc ita accipi, ac si à noto progrediatur ad ignotum, eo modo, qui

qui in scrutinio propriè dicto solet obtinere, non magis, quàm quando de Deo dicitur, Jer. xvii, 10. *Ego Iehova חוקר לב qui scrutatur cor*, h. e. intimè & accuratè cognoscens. Sumitur ergo illud metonymicè, ut ponatur antecedens & intelligatur consequens. Nemo autem potest cognoscere profunditates Dei, nisi qui sit ipse Deus. Id docet Tzophar apud Jobum cap. xi. 7, 8, 9. *Numquid pervestigationem Dei assequeris? an usque ad finem Omnipotentis pertinges? Altitudine cæli quid facies? profundius inferno quid nosces? Longior terrâ est mensura ejus & latior mari.* Quod homo, quod Angelus, quod creatura non potest, potest Sp. Sanctus. Pervestigationem Dei non potest assequi creatura, quia Deus est infinitus & vim omnium creaturarum longè superat. Qui ergo pervestigationem Dei potest assequi, qui profunditates Dei potest penetrare, illum ipsum infinitum esse oportet, eum oportet esse omniscium. Dein *Spiritus hominis novisse dicitur ea, quæ sunt hominis*, quod non potest intelligi de iis, quæ sunt in hominis corpore; multa enim horum planè ignorat, quæ nimirum planè pendent à motibus corporeis; sæpe corpus hominis morbis

infestatur, quorum naturam non intelligit. Necessario igitur verba ista sunt intelligenda de hominis animâ, quatenus scilicet Spiritus hominis, qui idem est cum animâ hominis, conscius est eorum quæ sunt in se, cogitationum nempe suarum, eo ipso temporis momento, quo sunt in ipso. Ita igitur quoque Spiritus Dei dicitur novisse ea, quæ sunt Dei, quia est in ipso Deo, & sic cum Deo est idem quoad naturam sive essentiam. Neque potest intelligi, quomodo quid possit esse in Deo, nisi quod sit ipse Deus; cum inter divina attributa etiam veniat censenda summa ejus simplicitas, cui tamen non ob stare personarum Trinitatem ex Scripturâ discimus.

XXII. Adjungamus locum, in quo de omnipotente Sp. Sancti operatione est sermo, cujusmodi occurrit 1 Cor. xii. 8. & seqq. *Huic enim datur per Spiritum sermo sapientia, alii verò sermo cognitionis per eundem Spiritum vers. 9. Alii verò fides per eundem Spiritum, alii verò charismata sanationum per eundem Spiritum vers. 10. Alii verò operationes virtutum, alii verò prophetia, alii verò discretiones Spirituum, alii verò genera linguarum, alii verò interpretatio linguarum vers. 11. Omnia autem hæc opera-*

55

Causa Spiritus Sancti.

operatur unus ille & idem Spiritus, distribuens unicuique sicut vult. Continentur his omnia charismata, tum ordinaria tum extraordinaria, quæcunque nempe ad Ecclesiæ ædificationem sunt necessaria. Dona illa talia sunt, ut sint effecta in mente humanâ, eamque afficiant, varient & mutent. Illa dicitur operari unus ille & idem Spiritus, qui propterea mentem afficit, in eâ operatur, eamque immutat, prout vult; quam operationem ostendimus in antecedentibus esse divinam. Qui igitur operationem divinam edit, is non potest non esse Deus. Sed & Jacobus docet cap. I. 17. quod omnis bona donatio & omne donum perfectum sit superius, descendens à Patre luminum, apud quem non est mutatio aut conversionis adumbratio. Spiritus Sanctus igitur, à quo sunt ista omnia bona dona & perfecta, est Pater luminum & per consequens supremus & æternus Deus. Id quod etiam potest confici ex collatione vers. 6. ubi illæ ipsæ operationes Deo attribuantur, quæ hic Sp. Sancto assignantur. Hic enim de Spiritu dicitur: Πάντα δὲ ταῦτα ἐργεῖ τὸ ἐν ἡμῖν τὸ αὐτὸ πνεῦμα Omnia verò operatur unus ille & idem Spiritus, at vers. 6. legitur: Καὶ διαρίσεις ἐργημάτων εἰσὶν· ὁ ὃς αὐτὸς ἐστὶ Θεός, ὁ ἐργῶν τὰ πάντα ἐν ἡμῖν. Et divisiones

D 4

Ope-

Operationum sunt, est verò idem ipse Deus, qui operatur omnia in omnibus. Est quidem ille Deus, cui ea verl. 6. adscribuntur, Deus Pater, quod requirit connexio cum versu 4. & 5. atque adeo Pater nomine *Deus* ita simpliciter posito intelligitur, quia ille est fons & origo S. S. Trinitatis, tanquam is, qui generat Filium, & à quo, ut & à Filio, procedit Spiritus Sanctus; operatio tamen illa ipsa communis est Patri cum Sp. Sancto, quamvis modus operandi sit diversus (quatenus Pater operatur à semetipso, Filius à Patre, & Sp. S. à Patre & Filio) sicque operatio illa Sp. Sancti, quæ etiam est operatio Patris, est operatio Dei, adeoque inde evincitur, Sp. S. esse Deum. Quod eò magis confirmatur & manifestum fit, quia ista omnia vers. 11. Spiritus Sanctus dicitur operari & *distribuere sicut vult*, non secus ac etiam Deus Pater verl. 18. dicitur *disposuisse membrorum unumquodlibet sicut voluit*, qui modus loquendi infert supremam Sp. Sancti & independentem potestatem & potentiam: creatura enim quæcunque agit, quantumcunque sit excellens, omnia agit dependentèr à Deo, & Deus omnia agit per istam creaturam, sicut ipse vult Deus, non sicut vult creatura, quæ, quod vult, velle debet

bet subordinatè ad voluntatem divinam. Neque ullâ ratione conveniens est, ut, ubi Deus dicitur agere sicut vult, etiam Sp. S. dicatur agere sicut vult cum Deo collatus, si esset creatura & non ipse Deus. Agit ergo creatura omnis, prout vult Deus, non prout ipsa vult, nisi quâtenus hujus voluntas est subordinata voluntati divinæ. At ejus, qui operatur omnia sicut vult, voluntas est independens & absolutè divina, eademque planè cum voluntate Patris & Filii.

XXIII. Claudat agmen 1 Joh. V. 7. ὅτι πάντες εἰσιν οἱ μάρτυρες ἐν τῷ ἔργῳ, ὁ πατήρ, ὁ λόγος, καὶ τὸ ἄγιον πνεῦμα, καὶ οἱ τοῦτο εἰσὶν. Non ignoro equidem, hunc locum abesse à variis codicibus antiquis & recentioribus, certum tamen est in aliis codicibus reperiri. Vel ergo dicendum, eum in illis codicibus, in quibus reperitur, suppositum esse & intrusum, vel ex illis codicibus, à quibus abest, fuisse erasum. Prius dici nullo jure potest; si enim suppositivus foret, intrusus esset dicendus ab Arrianorum adversariis, quod verum esse nequit, cùm legatur à Cypriano, qui ante exortum illud certamen vixit, libro de simplicitate prælatorum seu Unitate Ecclesiæ: *Dicit Dominus, Ego & Pater unum sumus. Et iterum*

rum de Patre & Filio & Spiritu Sancto scriptum est; & tres unum sunt. Dicendum ergo est, testimonium illud ex iis codicibus antiquis, à quibus abest, fuisse erasum, & sic defectum istum derivatum in codices recentiores, inde descriptos & in versiones inde derivatas. Et sanè totus contextus & ἀλλυξία verborum planè istud testimonium requirit, quod ut manifestum fiat brevem analyfin antecedentium instituiamus. Dixerat Apostolus verl. 3. *Præcepta Dei non esse gravia* fidelibus sive regenitis, *quia illi vicerunt mundum*, quod quid sit, & in quo consistat, oportet ut intelligamus ex 1 Joh. II. 14. 15, 16. Versu 14. hæc duo conjunguntur; *ut sermo Dei in aliquo maneat*, &, *ut vicerit malum*. In quibus ergo sermo Dei manet illi vicerunt malum. In quibus autem sermo Dei manet, illi sunt geniti ex Deo. Joh. xv. 7. sic dicit Christus discipulis suis: *Si manseritis in me & verba mea manserint in vobis, quicquid voveritis petetis & erit vobis*. Joh. viii. 31. *Si manseritis in sermone meo, verè discipuli mei estis*; qui autem manet in sermone Christi, in illis etiam vicissim sermo Dei manet. Atque sic è contrario Christus de Judæis irrogenitis dicit: *Sermonem ejus non habetis manentem in vobis*. Joh. v. 38. Constat ergo

go, genitos ex Deo vicisse malum, qui est Diabolus, qui est princeps mundi. Hunc igitur qui vicerunt, vicerunt mundum. Qui autem vicerunt mundum, etiam vicerunt ea, quæ sunt in mundo, cujusmodi est *concupiscentia carnis, concupiscentia oculorum & superbia vite, quæ non sunt ex Patre, sed ex mundo.* Patet lic, non posse præcepta Dei esse gravia illis, qui vicerunt istas concupiscentias, quæ, dum & quatenus belligerantur in membris nostris, observationem præceptorum divinorum nobis reddunt difficilem plus vel minus, prout plus vel minus sunt subactæ. Sic autem rectè subjungitur in loco præsentis, 1 Joh. v. 4, quod mundus vincatur per fidem, per quam purgantur corda Act. xv. 9. à pravis procul dubio concupiscentiis, à quibus immunda sunt reddita. Probat autem Johannes id, quod dixerat, quod *fides sit victoria nostra per quam vincimus mundum*, duobus argumentis, quæ vers. 6. continentur, quorum prius est; quoniam fides est, quæ recipit Christum, *qui venit cum aquâ & sanguine*; alterum, quoniam qui credit, credit per Sp. Sanctum, *qui testatur, quod Spiritus sit veritas*, h. e. quod ea, quæ prædixit per prophetas, sint vera. Etiam testatur, quod Spiritus sit ἡ ἀλήθεια, scilicet, quod *illa ve-*
ritas

ritas sit impleta, quòd Spiritus Sanctus sit effusus in omnem carnem citra discrimen gentis, Spiritus nempe fidei. Subjungitur vers. 7. tertium argumentum, quo probatur, quòd per fidem vincatur mundus, desumptum à tribus testibus, qui testantur, fidem vicisse mundum, qui sunt Pater, Verbum & Spiritus, qui dicuntur testari id in cœlo, quoniam, juxta modum loquendi in scriptura receptum, habitant in cœlis tres illæ personæ S. S. Trinitatis. Pater id testatus est sub V. Test. in quo locutus est & promisit semen benedictum & per illud vitam & salutem per fidem consequendam. Filius testatus est sub N. T. dum venit in carnem, & verba Dei, quæ adhuc dicenda erant, locutus fuit, & prædicavit fidem & resipiscentiam. Sp. Sanctus id testatur, quatenus *συμμαρτυρεῖ* Spiritui nostro, quòd simus filii Dei. Horum trium testimonium eo nomine commendatur, quod sit unum propter unitatem naturæ, unde eadem voluntas. At vers. 8. tres testes prioribus adjunguntur, per quos illi priores testes testantur in terrâ; ne quis possit excipere, illorum testimonium, qui sunt in cœlis, sibi esse ignotum. Sic in terrâ testatur Pater per Spiritum fidei, quem effudit in credentes, Verbum testatur in terrâ per aquam,

quam, obedientiam nempe suam, quâ usque ad mortem crucis se subjecit Patri in carne assumptâ, Sp. S. testatur in terrâ per sanguinem martyrum, qui magnâ copiâ in terrâ propter testimonium Jesu fuit effusus; atque hi tres testes in terrâ dicuntur habere unum testimonium, quia in testando consentiunt. Hoc testimonium vers. 9. dicitur testimonium Dei, quod cum testimonio humano comparatur eique longè antefertur; quibus verbis manifestè respicitur ad vers. 7. neque posset intelligi, quomodo testimonium divinum hîc commendetur, si vers. 7. abesset, cum non posset dici, ubinam de testimonio divino in antecedd. esset actum, si id non sit factum vers. 7. Sic verò ex hoc versu 7. collegimus primum, illos tres testes esse tres distinctas personas, quod & clarum est ex diversis illis nominibus, quæ personas divinas in scripturis solent designare, & ex actione personali *testari*, quæ tribus illis distinctè adscribitur, nec credo negaturum Auctorem problematis, qui Sp. Sanctum personam dicit. Dein colligimus, illos tres esse unum & verum essentiâ Deum, adeoque Sp. S. non minus esse supremum, æternum & verum Deum, ac est Pater. Quomodo illi tres dicantur unum, nemo melius doce-

re

re potest, quam ipse ille Johannes, qui cap. x, 30. sic Christum loquentem introducit: *Ego & Pater unum sumus*; neque ulla est ratio, quare hi tres non debeant esse unum eodem sensu, quo cap. x. Pater & Filius unum esse dicuntur: at illo in loco Pater & Filius unum esse dicuntur non tantum consensu, sed etiam & quidem præcipue essentiâ; prius enim nititur altero tanquam fundamento. Dixerat vers. 28. *oves suas non esse perituras, nec rapturum quenquam esse eas ex manu sua*, quæ ita possunt censerî esse connexa, ut posterius contineat rationem prioris; propterea non peribunt oves Christi, quia adeò fortis est Christi manus sive potentia, ut nemo eas ipsi eripere possit; quâ ratione ostendit, se valere eâ potentiâ, quæ superior sit potentiâ omnium rerum, omnium creaturarum, quarum quædam genera recensentur in loco. parallelo Rom. VIII. 38, 39. *Persuasus enim sum, quod neque mors, neque vita, neque angeli, neque principatus, neque potestates, neque presentia, neque futura, neque altitudo, neque profunditas, neque ulla alia creatura, nos poterit separare à charitate Dei, quæ est in Christo Iesu Domino nostro.* Pergit autem & confirmat illud argumentum vers. 29. & 30. hoc modo, quòd potentia Patris sit major omnibus,

bus, quæ eadem sit cum potentiâ suâ, adeoque cum suâ voluntate & essentiâ; unde sequitur, impossibile esse, ut quis suas oves rapiat è manibus suis. Vel hoc agnoscendum est, vel si aliud quid hîcingas, enervabis argumentum Christi. Neque enim est, quòd dicas, propterea oves Christi non posse eripi ex manu Christi, non quòd adeò fortis sit Christi manus, sed quòd voluntas Patris velit, ut à Filio custodiantur, adeoque eas Pater suâ potentiâ conservet; hæc enim ratio, quòd Pater istas oves suâ manu conservet, postea demùm sequitur, tanquam confirmatio prioris, hîc autem argumentatur Christus à suâ manu, à suâ propriâ potentiâ. Quòd si igitur hoc *unum esse* eodem modo sit sumendum 1 Joh. V. 7. ac sumitur Joh. X. 30, quando de se & Patre dicit Christus: *Ego & Pater unum sumus*; omninò dicendum erit, hos tres esse unum essentiâ, & per consequens, cùm Pater sit Deus, dicendum quoque erit, Verbum & Sp. S. esse Deum. Sed & ipse hic textus requirit, ut intelligatur unitas voluntatis, quæ etiam sit unitas essentiæ, sive in unitate essentiæ habeat fundamentum. Si enim hîc tantum locum habeat unitas consensus & voluntatis, ut interea sit diversa essentia; adeoque si unitas consensus & voluntatis

non

non habeat ortum ex unitate essentiae, id inde orietur, quòd voluntas Verbi & Sp. S. dependeat à voluntate Patris, adeoque voluntas horum erit dependens & limitata, non absoluta & infinita. At ex superioribus patet, voluntatem Sp. S. omnia operari sicut vult; (ut nunc de *Verbo* non agamus, de quo idem facile posset probari, si id requireret præsens institutum.) Est ergo voluntas Sp. S. divina, adeoque & divina est ejus essentia.

XXIV. Atque ex his deductis manifestè apparet, Scripturas V. & N. T. quando de Sp. Sancto eam faciunt mentionem, ut per illum personam intelligant, sic Sp. Sanctum describere, ut ex illis descriptionibus constet, eum esse supremum & æternum Deum. Hæc vellem Auctorem problematis absque affectibus & præjudiciis ad animum advertere, quemadmodum ad ea Scripturæ loca attendit, quibus solent nostri Theologi personalitatem Sp. Sancti probare. Non enim dubitem, non minus efficacibus argumentis demonstratam esse ex S. literis Sp. S. æternam & supremam divinitatem, ac ex iisdem evicta est Sp. Sancti personalitas. Et mirabor, si argumenta illa à nobis in superioribus adducta sic possit enervare, ut in nullo eorum quicquam
ro-

roboris esse clarè evincat. Velim autem, ut sicut socius ipsius, *Auctor addendorum*, comparavit illa, quæ à Socinianis ex Scripturis adducuntur contra personalitatem Sp. S. cum iis, quibus Orthodoxi Sp. S. personalitatem demonstrant, & , quemadmodum illâ comparatione institutâ deprehendit, loca Scripturæ, quæ videntur pugnare cum Sp. Sancti personalitate, sic posse explicari & conciliari, ut ne umbra quidem contradictionis supersit; ita ambo illi etiam comparent loca Scripturæ, quæ ab Orthodoxis pro divinitate Sp. Sancti afferuntur, cum iis quæ ab eorum adversariis in contrarium urgentur; sic non dubito, quin loca illa, quibus Orthodoxi utuntur, quorum quædam in superioribus ursumus, tantâ luce radiant, ut, modò oculos claudere nolint, sint deprehensuri Sp. S. divinitatem æternam & supremam in illis ita stabilitam, ut ad reliqua concilianda facilis sese sit apertura via. Certissimum enim est Sp. Sancti æternam divinitatem ita Solis radiis in istis locis esse descriptam, ut vel agnoscendum sit, unicam & eandem numero essentiam esse divinam Patris & Sp. S., vel fingendum sit, plures esse Deos essentiâ & numero inter se invicem differentes, quorum posterius &

E

cum

cum Scripturâ & cum ipsâ ratione evidentissimè pugnat. Scripturam si audias leges Deut. VI. 4. *Audi Israël, Iehova Deus noster Iehova unus est.* Insignis imprimis & clarus est locus, qui legitur Es. XLV. 5. & seqq. *Ego Iehova & non est alius, prater me non est Deus Ego Iehova & non est alius: Formans lucem & creans tenebras, faciens pacem & creans malum: ego Iehova faciens omnia ista.* vers. 21. *Nonne ego Iehova? & non est amplius Deus prater me, Deus iustus & servans non est prater me. Respiciite ad me & salvemini omnes fines terra. nam ego sum Deus & nullus est prater ea.* Similia leguntur Es. XLVI. 9. *Recordamini priorum à seculo. Nam ego sum Deus fortis, & nullus est prater ea Deus & non est ut ego.* Ipsum lumen rationis unum tantum agnoscit Deum, & in pluralitate Deorum manifestam deprehendit contradictionem. Per Deum enim intelligimus Supremum omnium, qui omnes omnino habet perfectiones, & à quo nihil perfectionum potest abesse: at non potest esse nisi unus Supremus & Maximus. Si enim duos ponas Deos æquales, neuter erit omnium supremus, adeoque neuter erit Deus. Si verò alterum ponas minorem altero, ille qui minor est non

non erit Deus, propter dicta; non erit Independentens, sed dependens, quia à Deo omnia alia dependent; nec potest concipi summè perfectum, nisi id, à quo omnia alia dependent, quia id perfectius est, à quo omnia dependent, quàm illud, à quo non dependent omnia. Omnis ergo, qui sic dependet ab altero, Creatura erit, non Deus. Sed nolo in istis probandis esse magis prolixus.

XXV. Adjungam hisce argumentis, quæ à naturâ *Spiritus Sancti* desumpta fuerunt, juxta ea, quæ nobis in S. Scripturâ revelantur, duo alia, quæ suppedi-
tat descriptio *Angelorum*, prout ea in sacris occurrit. Prius formo ex iis locis, quæ minorem puritatem & sanctitatem angelis assignant, quàm Deo. Huc facit locus Jobi IV. 18. ubi Eliphaz sic loquitur: *Ecce servis suis non fidit, & in angelis suis* **יְשִׁים תְּהִלָּה**, quod vertunt alii, *ponit stultitiam*, alii, *ponit lucem*, verbis diversis non parum, quæ quoad rem sensum eundem inferunt: nempe, quod angeli cum Deo comparati non possint adæquare puritatem & sanctitatem divinam. Magis tamen arridet illa interpretatio, quæ vocem **תְּהִלָּה** vertit *lucem*, ita ut sit sensus,

sus, Deum, quoties suis angelis utitur, ad exsequendum sua mandata, non eos reperire adeò perfectos, ut non indigeant novâ luce, quam continuò iis tenetur conferre, siquidem velit, ut perfectè exsequantur suam voluntatem. Si igitur Spiritus Sanctus designat genus angelorum, omnia illa, quæ hîc dicuntur de Angelis, poterunt de Spiritu Sancto enunciari. Confer & Jobi XV. 15. cujus idem est sensus. An verò diceret Auctor problematis, *Deum non fidere Spiritui Sancto, & in illo ponere stultitiam?* an hæc possent excusari à blasphemiâ? an diceret potius, Deum in illo ponere lucem, quasi non sufficientem habeat in se, qui est ipsa lux & veritas, atque Spiritus veritatis, verbo, qui est unus cum Patre & Filio supremus & æternus Deus.

XXVI. Aliud adhuc depromo argumentum ex Es. 41. collato cum Joh. XII. & Aët. XXVIII. Es. VI. introducitur *Dominus sedens super throno* vers. 1. qui est *Iehova exercituum*, vers. 3. adeoque & angelorum, qui nomine exercitus Dei solent venire in sacris; *coram eo* dicuntur *stare Seraphim*, Sancti nempe angeli, *clamantes alter ad alterum Sanctus, Sanctus, Sanctus est Iehova Deus exercituum, tota terra plena est gloria eius.* Is vers. 9. & 10. mit-

mittit Prophetam Elaiam, ut dicat populo Israëlítico: *Audite audiendo & non intelligite, & videndo videte & non cognoscite. Pinguefac cor hujus populi & aures ejus aggrava, & oculos ejus transversos age, ne videat oculis suis & auribus suis audiat, & cor eorum intelligat, & revertatur, & sanem illum.* Ex quibus apparet, eum, qui hæc loquitur ad Prophetam, planè distingui ab illis Seraphim, qui stabant coram throno & Sanctitatem Dei celebrabant. Sedens autem super throno dicitur fuisse Filius Dei Joh. xii. 39, 40, 41. *Propterea non poterant credere, quia iterum dixit Esaias: Excacavit oculos eorum & obthuravit eorum cor, ut non videant oculis & intelligant corde, & convertantur, & sanem eos. Hæc dixit Esaias cum vidit gloriam ejus & locutus est de ipso.* Idem autem dicitur à Paulo fuisse Spiritus Sanctus Act. xxviii. 25, 26, 27. *Benè locutus est Spiritus Sanctus per Esaiam Prophetam ad Patres nostros, dicens: Abi ad populum istum & dic: Auditum audietis & non intelligetis, & videntes videbitis & non cognoscetis. Aggravatum enim est cor hujus populi &c.* Neque tamen dubitari potest, quin etiam Pater in hac visione revelaverit suam gloriam, adeò ut Pater, Filius & Sp. Sanctus fuerint representati

per eum, qui sedit super illo throno, coram quo stabant Seraphim, Sancti angeli, sanctitatem ipsius summam omnibus laudibus deprædicantes. Quòd si sententia Auctoris problematis obtineat, ut per Spiritum Sanctum sit intelligendum genus angelorum, debet necessario per Seraphim designari, adeoque Sp. Sanctus erit dicendus & is, qui sedebat super throno, cujus gloria revelabatur, quòd accinctus esset Angelis ejus laudes indefinenter deprædicantibus, & illi ipsi angeli, qui laudes ejus Sanctitatis ebuccinabant; quæ planè esse *divina*, & manifestam implicare contradictionem nemo est, qui non videat.

XXVII. Non videtur Auctor Problematis cogitasse, posse suæ conjecturæ vel opinionioni opponi omnia illa argumenta, quibus Orthodoxi probant, Sp. S. esse supremum & æternum ejusdem cum Patre & Filio essentiæ Deum, cum nullam eorum in suo tractatu fecerit mentionem; tria tantum adducit, *quæ videntur conjecturam suam evertere* p. 48. de quibus ibidem dicit, *sibi non tanti roboris apparere, ut per ea omnes adducti scrupuli ex mente sua ejiciantur, quæ qualiacunque tandem sint, ob oculos censet ponenda, & quæ ad singula respondeat explicandum; quæ nos nunc quoque considerabimus, & an ab*
iis

iis rectè se expediat, examinabimus. Primò sibi objicit, quod Vigilus in Disputatione contra Arium ex personâ Athanasii scribat: *Virtutes calorum Angelos esse nemo dubitat. Qui etiam secundum Apostoli testimonium in hunc Spiritum tanquam in suæ originis autorem reverentissime desiderant aspicere. Dicit enim ita: Ea quæ sunt vobis à Spiritu Sancto missa de calis, in quem concupiscunt Angeli prospicere.* Hæc postquam sic per modum Objectionis sibi proposuisset, varia ad ea respondet. P. 49. dicit: *Quòd Vigilus sic prodat, autorem disputationis hujus esse Latinum, quia locum allegatum ex I Pet. I. 12. legat ut Vulgata, cùm in Græco longè alio sensu legatur.* Quæ observatio cui rei inserviat non ego assequor: non enim opus erat hoc inde colligere, cùm Vigilus, sive quisquis auctor est librorum contra Eutychem lib. 5. apertè fateatur, se libros adversus Sabellium, Photium & Arium idcirco sub nomine Athanasii scripsisse, ut præsentibus cum præsentibus viderentur agere. Ipsemet verò Auctor problematis fatetur in seqq. *difficultatem sic non tolli; nam, inquit, & sic Spiritus Sanctus distinguitur ab Angelis, qui concupiscunt prospicere in ea, quæ in Spiritu Sancto vel per Spiritum Sanctum annunciata sunt homi-*

nibus fidelibus, in qua sanè Spiritus Sanctus, tanquam quæ ipse euangelizavit, non opus habet, ut prospicere concupiscat. Manet ergo difficultas ipso fatente; quæ adhuc major reddi potest, si cogitetur, eum, qui agitavit Apostolos, non potuisse esse Angelum vel Angelos, sed debuisse esse ipsum Deum supremum & æternum. Conatur tamen eam tollere p. 50. sed hæsitabundus admodum, quæ nos expendemus. Dicit, *considerandum esse, an sufficiens sit responsio seu solutio petita ex Origene, qui tomo II. in Matth. scribit eis ἄγγελοι παρὰ κύψαι. ἵνα ἐν ὁρίαι πάντες ἄγγελοι* Legimus: in quæ desiderant angeli prospicere, ibi non dictum est, omnes angeli. Inde probat Origenes, homines in Christo salvandos quibusdam angelis, quibus non tradita est administratio discernendi malos à justis iisdemque non omnibus, præstantiores esse. Confer Tom. 17. in Matth. 22. 24. Ego verò existimo illam responsionem planè esse insufficientem. Pro nobis enim stat indefinita locutio, quæ pro universali habetur, quamdiu nulla est restrictionis causa: Quin è contrario tantum abest, ut hîc possit esse ulla restrictionis causa, ut potius res ipsa, de quâ agitur, suadeat, parem hîc esse omnium angelorum rationem. Extollitur
gra-

gratia illa salutaris, quæ nobis sub N. T. obvenit. Docetur, prophetas, quæ prædixerunt de passionibus Christi & super-venturâ posthæc gloriâ, non administrâsse sibi, sed nobis, adeoque non vidisse ea, quæ nos sub N. T. videmus & audimus; quo facit locus Matth. xii. 17. *Amen dico vobis*, inquit, *Christus, quod multi propheta & iusti desideraverint videre, quæ videtis, & non viderunt: & audire, quæ auditis & non audiverunt.* Ad eam extollendam quoque hoc adducit Apostolus, quod etiam *angeli desiderent prospicere in ea, quæ annunciata sunt ab Apostolis*, adeoque quæ visa & audita sunt ab Apostolis. Hæc verò Eph. III. 9. dicuntur *mysterium absconditum ab ævo in Deo*, quod Apostolus dicitur in lucem produxisse, vers. 10. *ut notificetur nunc imperiis & potestatibus in cælestibus per Ecclesiam multifaria sapientia Dei*; sicque ostenditur, angelos per Ecclesiam demùm intelligere illam multifariam sapientiam Dei, quæ manifestatur in Ecclesiâ N. T. quatenus illis Deus manifestat, quæ in Ecclesiâ illa agit, eo demum tempore, quo illa agit. Si igitur quidam hîc angeli sint excipiendi, vel dicendum erit, quod ex eorum numero quidam sint, qui citra revelationem Dei mysterium divinum & ejus absconditum

consilium penetrant, quod in creaturam cadere non posse ex superius dictis satis potest patere, vel, quòd quidam angeli non sint proclives ad ea cognoscenda; unde sequetur, quosdam angelos non gaudere celebratione nominis Dei & gloriæ ipsius, quâ si gauderent, cuperent quoque cognoscere ea, ex quibus gloria sapientiæ Dei multifariæ patescit, quod in sanctos & bonos angelos utique cadere non potest, de quibus hæc verba intelligi oportere manifestum puto. Video equidem annotatum in illo tractatu per asteriscum * *Fortasse nodus iste minus duriter solvetur, si per Angelos impuros spiritus intelligamus. Quâ significatione eos appellatos invenias Rom. 8. 38. 1 Cor. 4. 9. nec non 2 Pet. 2. 4. Iud. vers. 6. Et sic in eo cum authoris responsione convenient, quòd vocem Angeli non de omnibus in universum Angelis, sed de certo tantum eorum genere, malorum puta, accipiamus; sed qui hæc annotavit vix videtur intellexisse quid scriberet. An enim ea, quæ hîc dicuntur, possunt cadere in malos angelos? Mali angeli cum in sacris literis describantur tanquam adversarii regni Dei, tantum abest ut cupiant cognoscere multifariam sapientiam Dei, quæ manifestatur in Ecclesiâ per regni divini promotionem, ut potius ni-*

nihil ingratius sit illis istâ cognitione, potestque de illâ idem dici, quod dicit Apostolus Jacobus de cognitione Dei, quam habent Diaboli Jac. II. 19. *Tu credis, quod Deus unus sit: etiam Diaboli credunt & horrent.* At hi angeli, de quibus loquitur Petrus, delectantur cognitione istius sapientiæ divinæ, cupiunt introspicere in eam, gaudent, si à Deo adhibeantur ut ministri, qui illi sapientiæ divinæ multifariæ intervant, quod faciunt, dum ministerium suum exsequuntur circa eos, qui sunt hæreditaturi salutem, aliisque modis nobis ignotis.

XXVIII. Sequitur alterum, quod sibi objici posse putat I Cor. 12. *unum dici Spiritum*, ad quod responderi posse censet I. *Collectivè ibi sumi vocabulum Spiritus. Quale enim est corpus, talis est Spiritus. Ita tota civitas vel gens aut Respub. una dicitur, vel quia ab uno eodemque capite regitur, vel quia concordia una est, de quâ unitate alias multa disseruimus. Sicut itaque civitas, quæ ex multis personis subsistentibus constans unum totum constituit, non immerito unum corpus dici potest, quid itaque vetet, quo minus majori etiam jure civitas cælestis Hierosolyma, quæ est Spirituum Sanctorum catus vel Ecclesia, unus Spiritus dicatur.*
Ve-

Verum ex his, ut & aliis istius auctoris apparet, non didicisse ipsum distinguere operationes creaturarum ab operatione Dei, nec fortè distinctam unquam habuisse cogitationem de operatione Dei, quam si formare discat, videbit tales operationes non posse cadere in angelos, qui sunt mæ creaturæ. Operationes autem illæ, de quibus illo in loco est sermo, tales sunt, ut sint efficacix planè divinæ, uti §. 22. & alibi ostendimus. Non possunt ergo isto in loco per Spiritum intelligi angeli. Quod etiam ex collatione vers. 4, 5 & 6. cum vers. 11. apparet. Nam quæ vers. 4, 5, & 6. nomine *χαρισμάτων* assignantur Sp. Sancto, nomine *διακονιών* Domino, nempe J. Christo, qui in oppositione reliquarum personarum solet sub N. Test. voce *κυρίου* Domini denotari, nomine *ἐνδυνάμεων* Deo, scilicet Patri, ea omnia vers. 11. adscribuntur Spiritui Sancto, ut sic ostendatur, Sp. Sanctum esse Deum, cujus operatio adeoque essentia eadem sit cum essentiâ Patris & Filii. Similitudines adductæ parum juvare possunt ejus causam. Quando gens, Respublica, civitas una dicitur, cum vocabula ista suâ naturâ & vi sint collectiva, res loquitur ipsa, unitatem istam non debere aliter explicari, quàm ut conveniat corpori, quod

ex

ex multis membris congregatis constat, cujusmodi est, quod ab uno capite regatur, vel quia concordia una est, sed vocabulum *spiritus* per se & suâ naturâ non magis est collectivum quàm *homo*, *Sol*, *Rex*. Sicut ergo, si dicatur varias esse generationes in terrâ, aliam quâ producuntur plantæ, aliam quâ arbores, aliam quâ vermes &c. sed istas omnes producere unum solem, nemo putabit, hîc vocem solis collectivè accipi, sed unicum & singulare illud splendidissimum fidus intelliget, quod nomine solis venire solet; & sicut, si dicatur, varia esse in regno collegia, aliud Medicorum, aliud Pastorum, aliud consiliariorum &c. sed tamen omnia illa gubernare unum Regem, nemo putabit, vocabulum Regis collectivè posse accipi, quia vocabula ista suâ naturâ & valore non sunt collectiva, ita nec hîc istiusmodi sententia circa vocem Spiritus locum habere potest. Si vox Spiritus vel hominis aliquando collectivè accipiatur, hoc non fit ex naturâ vocis ejusque proprietate, sed ea tunc à propriâ significatione transfertur ad impropriam, quod circumstantiæ locutionis requirunt; quales hîc nullæ sunt, quæ id suadeant, quin è contrario sunt, quæ id planè dissuadent. Si in antecedentibus sermo esset de *Spirituum Sanctorum* h.e. *sanctorum*

rum angelorum cœtu vel Ecclesiâ, prout ipse hîc amat loqui, & postea subjungere-
tur, *banc esse unum spiritum*, possemus con-
cedere, vocabulum spiritus improprie, ad-
eoque in sensu colectivo debere accipi;
cujus rei ne γρὺ quidem in hoc capite repe-
ritur, sed omnia contraria. 2. inquit: *Red-
dit Apostolus rationem, cur nemo loquens per
Spiritus Sanctum Iesum possit dicere anathe-
ma, quia scilicet Spiritus sibi non sit contra-
rius.* Quid verò inde vult conficere? an
hinc sequitur, vocabulum *Spiritus* in isto
loco sumi collectivè? an non potius inde
colligendum, Spiritum Sanctum esse unam
eandemque personam divinam, quæ sibi
ipsi non potest esse contraria; cùm absolutè
non repugnet, ut angeli sibi sint contrarii,
sicut ex contrarietate malorum & bono-
rum angelorum apparet, repugnet verò ab-
solutè, ut persona divina sibi sit contraria.
3. *Resp. cum verbis Ignatii in fine cap. sequ.
allegandis, quæ mox videbimus.*

XXIX. Tertium, quod sibi objici pos-
se existimat *ex eodem capite est: at sunt divi-
siones donorum; putat verò, ad hoc respondere
Apostolum, pro se nempe & suâ Opinione,
non dari sapientiam per unum, fidem per al-
ium, gratiam sanitatum per alium, sed unum
eundemque Spiritum vel angelum efficere hac
omnia,*

omnia, quorum tamen numero plures sunt, sicut nec corpus est unum membrum, sed multa. Confer. Ephes. 4. ubi uti unitas in corpore intelligitur mystica, sic etiam unitas Spiritus. Nos verò mentem Apostoli planè aliam esse in superioribus ostendimus, & probavimus, per Spiritum isto in loco non intelligi angelum, nec posse vocabulum Spiritus in sensu colectivo accipi, cùm circumstantiæ textus id non requirant, imò nequidem permittant. Ad Eph. 4: 4. fatemur, unitatem in corpore intelligi mysticam, non repugnamus etiam, quin unitas Spiritus sit mystica; sed inde non sequitur, Spiritus vocabulum designare multitudinem angelorum. Corpus Christi dicitur mysticum, quatenus non est existimandum, omnes eos qui externè profitentur veram fidem, esse verè fideles, sed eos demum esse tales, qui intrinsecus fide salutari sunt animati, quæ per externum adspectum non potest cognosci; & propterea dicitur unitas fidei esse mystica, quia ista fides in occulto later, nec cognoscitur, nisi à spiritu hominis & spiritu Dei, qui in corde later, & operatur fidem salvificam in omnibus verè credentibus. Subjungit his testimonium Ignatii ante promissum. Concludo cum Ignatio ad Philadelph. qui ait: Quemadmodum Pseudoprophetæ
 &

& Pseudoapostoli unum & eundem Spiritum malum, fallacem & populi seductorem acceperunt: sic & Prophetæ & Apostoli unum & eundem Spiritum Sanctum, bonum, eximium, verum, & doctorem, & rectum acceperunt. *Quia itaque nihil obstat maxima multitudo Spirituum malorum, fallacium & populi seductorum, quo minus omnes illi dicantur unus & idem Spiritus malus, fallax & populi seductor: eadem vel majori certè ratione unus idemque dici potest Spiritus S. bonus, eximius, verus, doctor, rectus non obstante maximâ multitudine Spirituum Sanctorum, bonorum, eximiorum, doctorum & rectorum.* Nolo hîc controversiam movere de Ignatii epistolis, de quibus ultro citroque à viris doctis disputatum fuit, tantum dico, locum illum citatum ex Ignatio pro Auctore Problematis nihil facere posse. Nam primum non est necesse, ut per Spiritum malum intelligamus multitudinem Spirituum malorum; possumus per illum intelligere principem dæmoniorum, qui & ipse varios Pseudo-Prophetas & Pseudo-Apostolos potuit agitare, & quod non fecit ipse, potest fecisse per suos angelos tanquam satellites. Dein, etsi antecedens intelligeremus collectivè, id requirente forte naturâ rei, non tamen similiter

etèr consequens est accipiendum, quòd oppositio possit consistere, si unus Sp. Sanctus quoad personalitatem opponatur pluribus angelis malis. Quòd autem Ignatius per Sp. S. unam intellexerit personam, docent planè seqq. apud Ignatium: *Unus enim Deus Veteris & N. Testamenti; Unus & Mediator Dei & hominum Unus quoque & Paracletus, qui operabatur in Moyse & Prophetis & Apostolis.* Unde æquo saltem jure, si non majori, ac ille, potero colligere: si nihil obstat, imò si necessarium est, ut per unum Deum V. & N. Testamenti intelligam unam personam, & per unum Mediatorem similiter unam personam, eadem ratione paracletus poterit dici una persona. Sic ergo vel Ignatius obest auctori nostro, vel saltem nihil prodest. Atque ex his apparet, argumenta, quæ sibi proposuit Auctor problematis refutanda, firmo stare adhuc talo, quibus si adjungat ea, quibus probatum est, Spiritum Dei, qui persona est, constantè ex stylo Scripturæ designare Deum supremum & æternum, apparebit, non Angelum nec Angelicum cœtum, per Spiritum Sanctum posse designari.

XXX. Possunt hæc sufficere cuilibet, qui fidem suam non in auctoritate humarâ, sed in solâ divinâ stabilitam velit. Si Scri-

F

ptura

ptura repugnet huic paradoxo, nihil juvabit illud consentiens omnium & singulorum Patrum auctoritas. Cadunt errores etiam in eos, qui proximi sunt Apostolis. Papias Hierapolitanus Episcopus, qui Eusebio lib. 2. Johannis Apostoli dicitur fuisse auditor, eodem Eusebio lib. 3. c. 36. Eccl. hist. narratur, *tanquam ex vivâ traditione ad se relatâ, & peregrinas quasdam Servatoris parabolas, & doctrinas cum aliis nonnullis fabulosis adjecisse.* Consensus Patrum etiam Ante-Nicænorum potest in errore esse. Id jam sæpius à nostris probatum est, nos actum agere nolumus. Sic de millenario regno, quo Christus corporaliter in his terris sit regnaturus, maximus fuit Patrum consensus; consenserunt item quamplurimi ex Patribus in illâ sententiâ, quòd justorum animæ ante diem judicii Dei visione non fruantur, & sic de aliis, de quibus videri potest Riveti Criticus sacer & Dalæus de Ulu Patrum, Blondellus de Sibyllis, aliique. Quia tamen petiit Auctor, sibi ostendi Patres Ante-Nicænos, qui senserunt Sp. S. esse unam personam, volui in ipsius gratiam quosdam adducere. Clemens Romanus in epistolâ ad Corinthios pag. 60. *Cur inter nos sunt contentiones, ira, similitates, schismata & bellum? Nonne unum Deum & unum Chri-*

Christum habemus? nonne unus est Sp. gratia, qui super nos effusus est, & una vocatio in Christo? Dicit hîc, *unum Spiritum gratia* nos habere, sicut habemus *unum Deum & unum Christum*: atqui unus Deus, Pater nempe, est una persona, unus Christus est una persona: sic igitur etiam una persona est dicenda unus Spiritus. Et cùm discipulus Pauli Apostoli fuerit, non dubitari potest, quin unum Spiritum intelligat eodem sensu, quo illum intelligi ab Apostolo Paulo ostendimus I Corinth. xii, hoc est, unam personam divinam, quæ ejusdem sit dignitatis & potentia, cujus est Pater & Filius. Appellatio etiam *Spiritus gratia* prohibet, ne per eum intelligamus angelos. Spiritus enim gratia est auctor fidei, qui est effectus primus vocationis in Christo: at fides est Dei donum, estque ideo auctor fidei Deus; quod etiam liquet, quoniam illud donum pertinet ad Creationem secundam, quam à divinâ potentiâ fieri non minus docet scriptura, quàm de Creatione primâ. Et cùm ab illâ unitate argumentum sumat ad tollendum dissidium, quod erat exortum inter Corinthios, non potuit per Spiritum gratia intelligere angelos; sit enim nervus huic argumento plane esset incifus, cùm dici posset à Corinthiis, se à diver-

sis angelis ductos & rectos non posse in uñ
 nam eandemque voluntatem consentire;
 qui nervus firmissimus est, si per unum
 Spiritum intelligamus unam personam,
 sicut per unum Deum & unum Christum
 unam personam significari est necessum.
 Manifestus valdè est locus contra hanc
 Auctoris opinionem apud Justinum Apo-
 logiâ 2. pag. mihi editionis nempe Come-
 lianæ 34. καὶ ὁμολογῶμεν τὸ τοιούτων νομιζομένων
 θεῶν ἄθεοι εἶναι, ἀλλ' ἔχει τὸ ἀληθεύειν καὶ πατρὸς
 δικαιοσύνης καὶ σωφροσύνης, καὶ τὸ ἄλλων ἀρετῶν, ἀνε-
 πιμίκτη τε κακίας Θεῷ. ἀλλ' ἐκείνόν τε καὶ τὸν παρ'
 αὐτοῦ ἔχον ἐλθόντα, καὶ διδάξαντα ἡμᾶς πῶτα καὶ τὸ
 ἄλλων ἐπομένων καὶ ἐξομοιωμένων ἀγαθῶν χάριν,
 πνεῦμα τε τὸ πνευματικὸν σιτόμεθα καὶ πνευματικῶν,
 λόγῳ καὶ ἀληθείᾳ πρῶτον, καὶ παντὶ βυλομένῳ μαθεῖν,
 ὡς ἐδιδάχθημεν, ἀφθῶνως παραδιδόντες. *Et pro-*
fitemur quidem, nos talium, qui habentur,
deorum expertes esse, & atheos, sed non veris-
simi illius Dei, Patris videlicet iustitia &
castitatis, & virtutum aliarum, & ab omni
vitiositatis & labis mixtione alieni, expertes.
Verum hunc ipsum, & qui ab eo venit, atque
ista nos, & aliorum obsequentium exaquat-
orumque bonorum angelorum exercitum do-
cuit, Filium & Spiritum propheticum col-
imus & adoramus; cum ratione & veritate
venerantes, atque unicuique discere atque nosse

*volenti, pro eo atque edocti sumus, candidè
hæc tradentes. Ubi angeli boni cum fide-
libus conjunguntur, atque opponuntur u-
trique Deo Patri, Filio & Spiritui prophe-
tico, tanquam ab ipso edocti; unde Spiri-
tus S. qui est Spiritus propheticus, non est
angelorum chorus; quod & inde manife-
stum, quia fideles dicuntur æquè colere &
adorare Filium & Spiritum propheticum,
ac Patrem; qui propterea cum Patre ejus-
dem dignitatis & essentix sunt censendi.
Cum his conveniunt quæ legimus pag. 24.
*Super eo, qui renascendum sibi esse statuerit,
atque per pœnitentiam ab admisis delictis re-
sipuerit, Parentis rerum omnium & Domini
Dei nomen nominatur, atque id ipsum solum
lavaturum istum ad lavacrum ducentes invo-
camus. In nomine autem etiam Iesu
Christi crucifixi sub Pontio Pilato, atque in
nomine Sp. Sancti, qui per sacros vates præ-
nunciavit res Christi omnes, abluitur is, qui
illuminatur. Ex quibus apparet sub nomi-
ne Parentis rerum omnium & Domini Dei
etiam comprehendi Jesum Christum & Sp.
Sanctum. Jungamus Athenagoræ dictum
in Apologiâ ad Antoninum Imperatorem,
non multum ab initio, ubi postquam o-
stendisset, Christianos prædicare unum
Deum, Dei Filium, qui sit in Patre & Pa-**

ter in Filio, per unionem & potentiam Spiritus, de illo Spiritu porrò dicit: *Quantum & ipsum Spiritum Sanctum, agentem in illis, qui Propheticos sermones fundunt, ita à Deo emanare ab ipsoque reflecti dicimus, ut missi à sole radii reciprocant.* His jam subjungit: *Quis igitur non miretur, nos qui Deum Patrem predicamus, & Deum Filium, & Spiritum Sanctum, ita ut & unionis eorum vim, & ordinis distinctionem exponamus, impios & sine Deo homines vocari? Neque tamen intra hunc finem nostra de divinis essentiis professio continetur: sed etiam magnum numerum Angelorum & ministrorum Dei esse fatemur: quos opifex & architectus mundi Deus verbo suo tanquam in classes ordinavit, ut elementa, cælos, mundum, & quæ in mundo sunt, vicesque & ordinem moderarentur.* Postea ultra medium Apologiæ: *Quippe ut Deum asserimus, & Filium ipsius Verbum, & Spiritum Sanctum, unita quidem secundum potentiam, Patrem Filium & Spiritum. Filius enim Patris mens, Verbum & Sapientia est, & Spiritus eius emanatio & ipsa, ut lumen ab igne. Sic & alias quasdam potestates esse cognoscimus, quæ vel circa materiam vel intra eam versantur.* Ex quibus omnibus clarè satis apparet, eum Patrem, Filium & Sp. Sanctum in digni-

gnitate & potentiâ planè conjungere & à potentiis sive angelis creatis distinguere.

XXXI. Sequatur Irenæus lib. 1. cap. 2. adversus hæreses Valentini, ubi confessio- nem fidei Catholicæ Ecclesiæ edit. *Eccle- sia enim per universum orbem usque ad fines terra seminata, & ab Apostolis, & à discipulis eorum accepit eam fidem, quæ est in unum Deum Patrem Omnipotentem, qui fecit cælum & terram, mare & omnia quæ in eis sunt, & in unum I Christum filium Dei, incarnatum pro nostrâ salute, & in Sp. S., qui per prophetas prædicavit dispositiones Dei & adventum &c.* Equidem non du- bito, quin hic Sanctus Martyr eodem sen- su acceperit hanc fidem in Sp. Sanctum, quo sumitur in Symbolo, quod Aposto- lorum vocatur, ubi dùm dicimur credere in Spiritum Sanctum, nemo unquam ante hos homines natos per illum cœtum An- gelorum intellexit. Nec potuit aliud quid intelligere per Spiritum Sanctum Irenæus, quàm personam unicam divinam, quæ Objectum fidei nostræ esse potest, cum in Angelos non jubeamur credere, imò è contrario graviter nobis prohibeatur, ne fiduciam in ullâ creaturâ ponamus Jer. xvii., prout in superioribus plenius ostendimus. Audiamus etiam Clement.

Alexandrinum lib. 3. pædagogi cap. 12, in fine, ubi sic precatur: *Ut laudemus solum Patrem & Filium, Filium & Patrem pædagogum & magistrum, unâ cum Sancto Spiritu, qui unus est omnia, in quo omnia, per quem omnia unum, per quem est quod semper est, cujus membra sunt omnes, cujus sunt gloria & secula, qui est undiquâque bonus, undiquâque pulcher, undiquâque sapiens, undiquâque justus, cui gloria nunc & in secula, Amen.* Vides Filium & Sp. Sanctum Patri adæquatos in omnibus, eâdem gloriâ dignos, easdem perfectiones obtinentes, & per consequens, Sp. Sanctum æternum Deum esse, non angelum nec angelorum chorum. Tertullianus quoque ea dicit de Spiritu Sancto, quæ evincunt illum esse Deum. Ita in libro de præscriptionibus adversus hæreticos cap. 13. *Regula est autem fidei, ut jam hinc quid credamus profiteamur, illa scilicet quâ creditur: Unum omnino Deum esse, nec alium præter mundi conditorem, qui universa de nihilo produxerit per verbum suum primò omnium emissum: Id Verbum filium ejus appellatum, in nomine Dei variè visum Patriarchis, in Prophetis semper auditum, postremo delatum ex Spiritu Dei Patris & virtute in virginem Mariam, carnem factum*

*Etum in utero eius, & ex eâ natum hominem
& esse I. Christum. Dum enim dicit Ver-
bum, Filium Dei, delatum ex Spiritu Dei
Patris & virtute in virginem Mariam, si-
gnificat, Spiritum Dei suâ virtute univisse
illud Verbum in Virginis Mariæ utero
cum carne sive humanâ naturâ, & sic
natum ex Mariâ hominem, quod procul
dubio opus ejusmodi est, ut virtutem &
vim creaturæ planè superet; unde per Sp.
S. non angelos sed Deum necesse est intel-
lexisse. Quis enim sibi persuadeat, à volun-
tate angeli vel angelorum pependisse, ut Fi-
lius Dei fieret homo, quod hîc à Tertullia-
no virtuti adeoque voluntati Sp. S. adscri-
bitur. Et paulò post: J. Christum in cœlos
ereptum sedere ad dexteram Patris: misisse vi-
cariam vim Spiritus Sancti, qui credentes a-
gat; quibus verbis manifestè respicit ad hi-
storiam festi Pentecostes, in quo sanè non
angeli, sed Spiritus, qui est Deus, implevit
Apostolos, & corda ipsorum formavit at-
que immutavit. Idem adversus Praxean
cap. 2. Sed salvâ istâ præscriptione, utique ta-
men propter instructionem & munitionem quo-
rundam, dandus est etiam retractatibus locus:
Del ne videatur unaquaque perversitas, non
examinata, sed predicata damnari, maxime
hac, qua se existimat meram veritatem possi-
dere,*

dere, dum unicum Deum non aliàs putat credendum, quàm si ipsum, eundemque & Patrem & Filium & Sp. Sanctum dicat: quasi non sic quoque unus sit omnia, per substantia unitatem & nihilominus custodiatur oīanovīas Sacramentum, quæ unitatem in Trinitatem disponit, tres dirigens, Patrem & Filium & Spiritum Sanctum. Tres autem non statu, sed gradu: nec substantiâ, sed formâ: nec potestate, sed specie: unius autem substantia & unius status, & unius potestatis: quia unus Deus, ex quo & gradus isti, & forma, & species, in nomine Patris, Filii & Sp. Sancti deputantur. Ubi dum docet, Patrem, Filium & Sp. Sanctum esse unius substantiæ, quia sine unus Deus, satis patet, eum Sp. S. non pro angelo vel angelis, sed pro vero & supremo Deo agnovisse. Item cap. 8. Protulit Deus sermonem, quemadmodum etiam Paracletus docet: sicut radix fruticem, & fons fluvium & sol radium. Nam & ista species probolæ sunt earum substantiarum, ex quibus procedunt. Nec dubitaverim filium dicere, & radicis fruticem, & fontis fluvium & solis radium: quia omnis origo parens est: & omne, quod ex origine profertur, pragenies est: multo magis sermo Dei, qui etiam propriè nomen filii accepit: nec frutex tamen à radice, nec fluvius à fonte, nec radius à sole discernitur, sic-
ut

ut nec à Deo sermo. Igitur secundum horum exemplorum formam profiteor me duos dicere, Deum & sermonem ejus, Patrem & Filium ipsius. Nam & radix & frutex duæ res sunt, sed conjunctæ. Et fons & flumen duæ species sunt, sed indivisæ. Et sol & radius duæ formæ sunt, sed coherentes. Omne quod prodit ex aliquo, secundum sit ejus necesse est, de quo prodit, non ideo tamen est separatum. Secundus autem ubi est, duo sunt. Et tertius ubi est, tres sunt. Tertius enim est Spiritus à Deo & Filio, sicut tertius à radice fructus ex frutice. Et tertius à fonte rivus ex flumine. Et tertius à sole, apex ex radio. Nihil tamen à matrice alienatur, à quâ proprietates suas ducit. Ita trinitas per consertos & connexos gradus à Patre decurrens & monarchia nihil obstrepat; & oïxonoµia statum protegit. Ex quibus apparet iterum, Spiritum Sanctum ita ab ipso censerî prodire ex Patre, ut non alienetur ab ipso, sed ut eandem essentiam possideat; at angeli plane alieni sunt à divinâ essentiâ, habentes essentiam creatam & dependentem, cum divina sit infinita & independens.

XXXII. Origenes in hanc rem clarus est homil. 8. in Exodum: Sciendum tamen est, quod cum decreveris præcepti ejus servare mandatum, & omnes ceteros deos & dominos repudiare, & præter unum Deum

& Dominum neminem habere vel Deum vel
 Dominum, hoc est bellum sine fœdere denun-
 ciâsse omnibus ceteris. Cum ergo venimus ad
 gratiam baptismi universis aliis diis & do-
 minis renunciantes solum confitemur Deum
 Patrem & Filium & Sp. Sanctum. Sed hoc
 confitentes nisi toto corde diligamus Domi-
 num Deum nostrum, & totâ animâ & totâ
 virtute adhareamus ipsi, non sumus effecti pars
 Domini. Sed velut in confinio quodam positi,
 & illos offensos patimur, quos refugimus, &
 Dominum, ad quem confugimus, propitium non
 efficimus, quem non ex toto & integro corde
 diligimus. Opponit enim ibi Sp. S. dictis
 diis gentilium, in quorum numero erant
 angeli, habet illum unâ cum Patre & Filio
 pro uno Deo & Domino, huic applicat
 præceptum legis de diligendo Deum ex to-
 tâ animâ & ex toto corde. Idem in epist. ad
 Romanos lib. 7. initio: sicut enim multi sunt
 filii Dei, ut Scriptura dicit: ego dixi dii estis,
 & filii excelsi omnes: unus tamen est naturâ
 Filius & unigenitus de Patre, per quem o-
 mnes Filii appellantur: ita & spiritus quidem
 sunt multi, sed unus est, qui verè ex ipso Deo
 procedit, & ceteris omnibus vocatuli ac san-
 ctificationis suæ gratiam donat. Quod autem
 plures sunt spiritus, declarat idem Apostolus
 ad Hebraeos scribens & dicens: Non omnes
 sunt

*sunt ministeriales Spiritus ad ministerium missi propter eos, qui hereditatem capiunt salutis? Ubi Spiritum Sanctum ab angelis manifestè distinguit, non secus ac filii Dei ex gratiâ ab illo, qui naturâ est Filius Dei, distinguuntur; illum ex Deo procedere, & his donare sanctificationis suæ gratiam; illum ergo pro independenti habet, hos pro dependentibus; illum ut Dominum considerat, hos ut ministros: negat ergo apertissimè, Sp. S. esse habendum pro angelorum universitate. Eodem lib. 7. in cap. 9. ad Rom. Trinitatem in Deo, in Christo, in Sp. Sancto consistentem ab angelis capi posse negat, quod utique fieri posset, si angeli essent Sp. Sanctus; sic enim ipsam Trinitatem tanquam tertia persona comple-
rent: *Vide tamen magnitudinem pectoris apostolici, à Dei charitate non potest separari. Quod loquor, in Christo loquor: quod in conscientia habet, in Sp. S. continetur. Qui quæso cæli, qui throni, quæ amplissima virtutum cælestium mentes, tam amplis sedibus totam poterunt capere trinitatem? Et paulo post: Et miror, quomodo quidam legentes, quod idem Apostolus in aliis dicit: Unus Deus Pater, ex quo omnia, & unus Dominus I. Christus per quem omnia, negent Filium Dei Deum debere profiteri, ne duos Deos dicere*
vi-*

videantur. Et quid de hoc loco Apostoli facient, in quo aperte Christus super omnia Deus esse perscribitur? Sed non advertunt, qui hac ita sentiunt, quod sicut Dominum Iesum Christum non ita unum esse Deum dixit, ut ex hoc Deus Pater non Dominus dicatur, ita & Deum Patrem non dixit ita esse unum Deum, ut Deus Filius non credatur. Vera est enim Scriptura, quæ dicit: Scitote quoniam Dominus ipse est Deus. Unus autem uterque est Deus, quia non est aliud Filio divinitatis initium, quam Pater: sed ipsius unius paterni fontis (sicut sapientia dicit) purissima est emanatio filius. Est ergo Christus Deus super omnia. Quæ omnia? illa sine dubio, quæ & paulo ante diximus: super principatus, & potestates, & virtutes, & omne nomen quod nominatur, non solum in hoc seculo, sed etiam in futuro. Qui autem super omnes est, super se neminem habet. Non enim post Patrem ipse, sed de Patre. Hoc autem (id est sapientia Dei) etiam de Sancto Spiritu intelligi debet, ubi dicit: Spiritus Domini replevit orbem terrarum. Et qui continet omnia scientiam habet vocis. Si ergo Filius Dei super omnes dicitur, & Spiritus Sanctus continere omnia memoratur, Deus autem Pater est, ex quo omnia, evidenter ostenditur natura Trinitatis, & substantia una, quæ est super omnia.

Ex

Ex quibus iterum manifestè patet, Origenem habuisse Spiritum S. pro summo Deo. Nam de Filio dicit, quòd sit super omnia, super principatus & potestates & virtutes, hoc est, super angelos etiam; item quod super se neminem habet. Idem dicit, de Spiritu Sancto intelligendum: Ergo ipsi Sp. Sanctus est super omnia, adeoque super angelos, & Spiritus Sanctus super se neminem habet. Non ergo habuit Sp. S. pro angelorum universitate, sed pro summo Deo, quod quoque in seqq. clarius asserit, dum Trinitatis, quam in Patre, Filio & Spiritu Sancto constituit, unam dicit substantiam. Sed non opus est multis. Quid Ecclesia Vetus ante Concilium Nicænum de Sp. Sancto crediderit discere licet ex formulâ in gratiarum actionibus receptâ, de quâ tanquam suis temporibus antiquiori testatur Dionysius Alexandrinus apud Basilium lib. de Spiritu Sancto cap. 29. his verbis: *His omnibus consequenter & nos formâ sanè ac regulâ à presbyteris, qui ante nos fuerunt, transsumptâ, & concordibus cum ipsis vocibus gratias agere, & nunc etiam vobis scribere desinemus, Deo Patri & Filio Domino nostro I. Christo cum Sancto Spiritu gloria & imperium in secula seculorum Amen.* Quæ sanè manifestè evid-

vincunt, Ecclesiam antiquam non Sp. Sanctum pro cœtu angelorum, sed pro æterno Deo ejusdem cum Patre & Filio dignitatis & essentiae agnovisse.

XXXIII. Sed antequam hinc discedamus operæ pretium videtur conferre, quæ Auctor problematis §. x i x. ex antiquitate adduxit ad suam sententiam stabiliendam. Primum petit ex Ignatio, quando scribit ep. ad Philadelph. *Bona sunt administratoria virtutes Dei Spiritus ille Sanctus*. Quæ ex quâ editione citet non addit, dubito enim an sic legerit citra interpunctionem; saltem in exemplari edito à Vossio aliter legitur: Κα-
λοι μὲν οἱ ἱερεῖς, καὶ οἱ ἑὶς λόγος διάκονοι κρείων ὁ
ἀρχιερεὺς, ὁ πιστεύων τὰ ἅμα ἡμῶν ἄγλων, ὁ
μὲν πιστεύει τὰ κρυπὰ τῆς Θεοῦ καὶ αἱ λειτουργ-
ικαὶ τῆς Θεοῦ δυνάμεις. Ἀγὼς ὁ προσκλητὸς, καὶ
ἁγὸς ὁ λόγος, ὁ τῆς Πατρὸς υἱὸς, δι' οὗ ὁ πατὴρ
τὰ πάντα ποιεῖται, καὶ ἡμεῖς ὅλων σωτοὶ. Ve-
tus Latina Versio, quam adjecit Vossius,
sic habet: *Boni enim sunt sacerdotes & ser-
monis ministri: melior autem est Pontifex,
cui credita sancta sanctorum; cui soli commissa
sunt secreta Dei. Bona sunt etiam officia vir-
tutis Dei; bonus quoque Spiritus Sanctus, qui
est super omnia sancta sanctissimus & verbi
minister*. Aliter planè habent & Græca &
Latina, quàm citata ab auctore. Utrunque
distin-

diffinguitur Sp. Sanctus, in Latinâ versione ab officiis virtutis Dei, in Græco à potestatibus ministratoriis Dei. Eadem inter punctio etiam observatur in versione, quæ à Vedelio est adjecta : *Bonæ sunt ministratoria illa virtutes Dei, Sanctus est Paraclæsus, & Sanctum illud Verbum filius Patris, per quem Pater fecit omnia, omnibusque providet.* Tantum ergo abest, ut hoc testimonium causam Auctoris juvare queat, ut potius oblit eidem quàm maximè. Et quid quæso, supposito jam, quòd Ignatius scripserit istas epistolas, certi dicemus de ipsius mente, ubi tantoperè variant, quæ sunt nomine ipsius edita? Vellem verò ut in reliquis auctoribus citandis designasset loca, ubi hæc scripta habeantur. Ait Justinum Martyrem dicere Dial. cum Tryph. *Spiritus virtutes requieturas super eo.* Sic Dialogus totus perlegendus ei, qui judicare velit, an & quomodo id dixerit Justinus. Crediderim Auctorem respicere verba, quæ edit. Commelinianæ p. 245. réperio, quando Tryphon citatis verbis Es. XI 2. quæ superius vidimus §. 11. sic interrogat : *Cum Deum ipsum prius fuisse affirmes ac de consilio & voluntate Dei incarnatum, ex virgine hominem natum esse asseras: quomodo probari potest eum prius fuisse, qui per virtutes*

tutes Sp. S., quas Verbum per Esaiam dinumerat, complatur, perinde atque eis indiguisset? Respondet ad eam quaestionem Justinus: Virtutes Spiritus, quae recensitae sunt, Verbum non ita super eum venisse ait, quasi indigus earum fuerit: sed quod acquirere in illo essent, hoc est, in eo finem factura, ita ut in genere vestro non amplius more veteri propheta futuri essent. Ex quibus planè apparet, non voluisse Justinum asserere, Spiritum esse Angelos, sed per virtutes Spiritus intelligere diversas operationes ejusdem Sp. Sancti, quamvis una numero persona sit Sp. Sanctus; varia enim operationum Sp. S. & respectu istarum variarum operationum variae *divinae* Spiritui Sancto assignantur, prout didicimus ex 1 Cor. XII. superius §. 22. explicato. Ista variae virtutes sunt apud Esaiam *Sapientia & Intelligentia, Consilium & Robur, scientia & Timor Iehovae*, quae sunt effecta Spiritus S., demonstratio ejusdem virtutum, sive *divinarum*, quae omnes in Sp. S. una eademque sunt virtus & *divinae*, quae ratione operationum sic variè distinguitur.

XXXIV. Tertius testis, quem pro sua sententiâ adducit Auctor Problematis, est Clemens Alexandrinus, sed ex libro, de quo dubitari potest, an sit genuinus, cum
ejus

eius nec Eusebius nec Hieronymus ullam fecerint mentionem. Liber ille dicitur *Adumbrationes sive scholia* in epistolas Canonicas, quæ ex versione Cassiodori Latine tantum exstant in Bibliothecâ Patrum. Verba quæ citantur sic habent: *Beati*, inquit, *quoniam qui est ejus honoris & virtutis Dei Spiritus super vos requiescit. Hoc possessivum ejus & angelicum Spiritum significat*: ibidem: *Sicut enim apud Patrem consolator est pro nobis Dominus, sic etiam consolator est, quem Christus post assumptionem dignatus est mittere. Hæ namque primitivæ virtutes, ac primò creatæ, immobiles existentes secundum substantiam, & cum subjectis angelis & archangelis, cum quibus vocantur æquivocè, diversas operationes efficiunt, sic etiam & Moyses Michaël Angeli virtutem, per vicinum sibi & infimum angelum vocat &c.* Ex quibus tamen ad summum hoc tantum conficitur, scriptorem illum, quicumque fuerit, aliquando per Sp. intelligere angelos, sicque unum habebit testem eumque valdè dubium pro suâ sententiâ. Cui nos opponimus genuinum Clem. Alexandrinum lib. 3. pædagogi cap. 12. in fine, quem §. 29. citavimus, qui per Sp. Sanctum intelligit supremum & æternum Deum. Adjicit his Tertullianum, qui lib. de præscript. ait, *Christum*

sum misisse vicariam vim Spiritus Sancti (ut & autorem libri de Trinitate editum sub Tertulliani nomine) qui dicat magnam vim Spiritus Sancti: Tales autem, inquit Auctor problematis, locutiones apud Latinam linguam autores pluralitatem & multitudinem denotant. Rhenanus scribit, Tertullianum Spiritum S. appellare membra, pignora & instrumenta; at Pamelius ea verba ad angelos refert. Nos de illâ vicariâ vi Sp. Sancti jam egimus §. 29. Magna vis Spiritus Sancti quomodo dicatur in auctore libri de Trinitate, non possum dicere, cum tædeat ob istam phrasin totum illum librum perlegere; addenda erant capita vel aliz distinctionis notæ. Mihi tamen non videtur absolum, si magna vis Spiritus Sancti dicatur de multis Sp. S. donis, quæ collata sunt credentibus; ut non necesse sit hic angelos intelligere. Nec Rhenanum, nec Pamelium possum perolvere, ut ad ista citata respondeam, quæ tamen non adeo profunt auctori. Sed Auctor problematis eodem modo pergit citare Tertull. de Baptismo non indicato capite, quod est quartum: *Supervenit enim statim Spiritus de celis, & aquis superast, sanctificans eas de semetipso, & ita sanctificata vim sanctificandi combibunt.* Sed hic nihil de angelis; vis illa sanctificandi, quas com-

combibunt aquæ, quando sanctificantur à Sp. S. sanè non sunt angeli, nec vis illa est physica, sed moralis tantùm, sive potius Sacramentalis. Quod verò postea dicitur: *Igitur medicatis quodammodo aquis per angelum interventum*, & cap. 5. *ne quis durius credat angelum Dei Sanctum aquis in salutem hominis temperandis adesse*, id fortè non necesse est ut putemus, Tertullianum eo sensu dixisse, quasi existimarit Spiritum Sanctum esse angelum, sed, quòd Spiritus Sanctus interventu angeli aquas sanctificet; si tamen omninò velis, illum Spiritum Sanctum dixisse angelum, non sententiæ Auctoris problematis consentit propterea, cùm hic per Sp. Sanctum non *Angelum* sed *Angelos* numero plurativo intelligat; & Angelus, qui Sp. Sanctus, non erit necessariò creatus, sed increatus, qualis etiam est Angelus fœderis & Angelus faciei Dei, de quo sæpe legimus sub V. T. & quales fuerunt duo angeli, qui descendunt Sodomam ad Lothum liberandum, qui tamen Dominus fuerunt. Sic enim Gen. XIX. 18. *Et dixit Loth ad eos, ne quæso* אלהי, quæ vox sic punctata constantè denotat Deum; atque ita constantè postea illi duo loquuntur ut Deus, idque in numero

mero singulari vers. 21. & 22; & vers. 24. *Iehova* dicitur à *Iehova ex cœlis pluuisse sulphur & ignem*, quod sanè non potest commodius intelligi, quàm si dicamus, illos duos angelos fuisse *Jehovam*, & unum illum ex 3. viris, qui apparuerant Abrahamo fuisse quoque *Jehovam*, qui absoluto colloquio cum Abrahamo discesserat Gen. xvii. 33. & in cœlos ascendisse, atque sic ab illo *Jehovâ* pluuisse *Jehovam* sulphur & ignem. Possunt enim duæ illæ personæ S. S. Trinitatis Filius & Sp. Sanctus appellari angeli, id est, nuncii, quia missi leguntur, solus Pater nunquam missus dicitur, nec mitti potest. Nihil ergo hucusque habuit Auctor problematis ex Tertulliano pro suâ sententiâ stabiliendâ.

XXXV. Progrediamur nunc cum ipso ad Origenem, qui hom. 6. Numer. inquit: *Non enim potest Spiritus Sanctus consortium pati & societatem Spiritus mali*, quod quomodo pro sententiâ Auctoris problematis faciat, non apparet. Non enim quodcumque sit oppositio inter Sp. Sanctum & Sp. malum necessariò per Sp. Sanctum est intelligendus angelus vi oppositionis. Etiam Deus opponitur Satanæ & sic Regnum Dei regno Satanæ. Et sanè in antecedentibus Origenes per Spiritum Dei

Dei non intellexit angelos, & ne quidam ejus significatus est in antecedentibus. Loquitur de Spiritu prophetico, qui cum prius esset super Mose, postea etiam concessus fuit septuaginta lenioribus. Ita Origenes in antecedd. *Sed hoc modo figuram mystici hujus sermonis adverte, quasi Moses & Spiritus, qui erat in Mose, clarissimi cujusdam luminis fuerit lucerna, ex qua alias septuaginta lucernas accenderit Deus, ad quas ita principalis illius luminis splendor pervenerit, ut origo ipsa luminis nihil damni ex commercio derivationis acceperit. Et hoc modo pie intelligitur, quod Scriptum est: quia abstulit Dominus de spiritu Moyse & dedit Septuaginta Senioribus.* En Spiritum Mosis tanquam lucernam clarissimi cujusdam luminis! lumen istud clarissimum est persona Spiritus Sancti, lucerna est donum Spiritus Sancti, quod in Scripturis sæpe nomine Spiritus indicatur, dona similia concessa dicuntur LXX. Senioribus, nihil propterea imminuto dono, quod acceperat Moses. Quid hæc ad angelos?

XXXVI. Citat postea verba quædam Orig. ex hom. 11. ubi conqueri iterum debet de nimia negligentia in citando, nec enim loco dicto illa leguntur. Dum verò

istam homiliam prelego, reperio quædam planè adversantia Auctori problematis, quæ hîc referre visum: Puto ergo, quòd Sanctus Spiritus ita sanctus sit, ut non sit sanctificatus. Non enim ei extrinsecus & aliunde accessit sanctificatio, qua ante non fuerat, sed semper fuit sanctus, nec initium Sanctitatis ejus accepit. Similique modo de Patre & Filio intelligendum est. Sola enim Trinitatis substantia est, qua non extrinsecus acceptâ sanctificatione, sed sui naturâ sit sancta. Omnis verò creatura vel dignatione Sancti Spiritus, vel meritorum ratione sanctificata sancta dicetur. Quæ videat Auctor problematis, an cum suâ sententiâ, quæ Spiritum Sanctum pro angelis, adeoque creaturis habet, conciliare possit. Quicquid tamen sit de citatis ab Auctore, ubicunque illa habeantur, videamus, an multum juvent ipsius causam. Magorum ministri angeli sunt refuga, & Spiritus maligni, & damonia immunda. Nullus enim Sanctorum Spirituum obtemperat mago. Non potest invocare magus Michaelem, non potest invocare Raphaelem, neque Gabrielem. Qui Sancti Spiritus particeps factus est, ad immundos ultra Spiritus accedere non debet. Si enim invocaverit immundos Spiritus, Sanctus ab eo Spiritus refugit. Quid verò ex his colligit Problematis Auctor? hoc nempe:

Adco

Adeo quem nunc vocat Spiritum Sanctum, paulo ante pluraliter vocaverat Spiritus Sanctos. Quid inde? Nemo negat, quin Angeli boni, cum sint Spiritus, & sint Sancti, possint vocari in plurativo numero Spiritus Sancti. Sed de hoc non est quaestio, sed de eo: An Spiritus Dei vel Spiritus Sanctus, quando in Scripturis commemoratur, & opponitur Patri & Filio, vel ab eis distinguitur tanquam persona, designet Angelorum genus? Hoc non dixit Origenes, sed ejus contrarium planè, uti superius vidimus. Pergit Auctor Problematis: In Esaiâ Seraphim idem Origenes fertur exposuisse Spiritum Sanctum, teste Haymono in Christ. rerum memoriâ lib. 6. cap. 3. sunt autem Baphim (Seraphim puto scripsisse) Spiritus creatus. Sit hoc ita: non enim Haymo ad manus mihi est, quid inde? Seraphim sunt Spiritus creati, sunt angeli, possunt dici Spiritus Sancti in plurativo numero, atque ita Spiritus Sanctus, si voce Spiritus Sanctus tanquam colectivo velis uti. An inde sequetur, non esse alium Sp. Sanctum istorum omnium Dominum, qui Esaiâ locutus est, qui ipsum misit, qui jussit, ut faceret pinguescere cor populi Judaici &c. quem esse Spiritum illum Sanctum, qui à Patre & Filio quidem tanquam alia persona distinguitur,

tur, sed tamen ita, ut idem cum ipsis sit substantia una, quod satis ostendit Paulus Apostolus A^Q. xxviii. 25. Adhuc hæret in Origenis auctoritate, & citat homil. i. Ezech. quæ plane ἀνεγείνωσα. Videamus illa: *Clausi erant cæli: & ad adventum Christi aperti sunt, ut reseratis illis veniret super eum Spiritus Sanctus in specie columbæ.* Hæc verba laudat Auctor problematis, sed omittit, quæ paulo post sequuntur, & è quibus mens antecedentium & consequentium patescit. Sic ergo immediatè subsequitur apud Origenem: *Nèquē enim poterat ad nos commearē, nisi primum ad suā naturā consortem NB. descendisset. Ascendit Iesus in altum, captivā duxit captivitatem, accepit dona in hominibus. Qui descendit ipse est, qui ascendit super omnes cælos, ut impleret omnia. Et ipse dedit alios apostolos, alios prophetas, alios evangelistas, alios pastores & magistros in perfectionem sanctorum.* Jam demum sequuntur ea, quæ recitat Auctor problematis: *Aperi sunt cæli Non sufficit unum cælum aperiri: aperiuntur plurimi, ut descendant non ab uno, sed ab omnibus cælis angeli ad eos qui salvandi sunt. Angeli qui adscendebant & descendebant super filium hominis, & accesserunt ad eum & ministrabant ei.* Dum sic legebam priora Origenis verba &

po-

posterioræ, detruncatis illis intermediis, putabam primo adspectu, invenisse illum apud Origenem, quæ secum concordarent, sed ubi totum legebam contextum, suspicabar, quare illa voluerit detruncare. Ille enim Sp. Sanctus, qui in specie columbæ dicitur venisse super Christum, mox in omissis dicitur esse *consors natura Christi*, quod procul dubio eodem modo intelligendum est, quo supra vidimus ex Orig. hom. 11. in Numeros, Spiritum esse eodem modo Sanctum, quo est Pater & Filius, atque opponi creaturæ, quæ sanctificata dicitur. Cum verò secundâ vice consideraret, apertos esse cælos, agit demum de angelis, qui adscendebant & descendebant super filium hominis, qui ut in Scripturâ à Spiritu S. sub specie columbæ descendente distinguuntur, ita etiam ab Origene ut distincti considerantur. Pergamus ad librum 1. Origenis contra Celsum, ubi hæc lego juxta editionem Spenceri p. 37. *Et Iesu quidem aperti sunt cæli, nemine, quantum è Scripturâ colligi potest, præter Iohannem vidente apertos. Servator autem discipulis prædixit futurum, ut cælum aperiretur ipsis inspectantibus. Amen amen, inquit, dico vobis videbitis cælum apertum & angelos Dei ascendentes & descendentes super filium ho-*

hominis. Ex quibus apparet, falsum esse, quod dicit Auctor Problematis, *Origenem de Spiritu Sancto descendente super Christum in baptismo* explicare locum Joh. I. 51. *Videbitis cælum apertum* &c. si scilicet id eo sensu accipiat, qui solus facere potest ad ipsius scopum, quasi angeli Dei adscendentes & descendentes super filium hominis sint idem, quod Spiritus Sanctus, qui in Baptismo Christi descendit sub specie columbz. Sed Origenes duo diversa loca Scripturæ inter se invicem comparat, & ostendit, quod antea fuerat factum inspectante uno Johanne Baptistâ ut cœli aperirentur, postea futurum iterum inspectantibus discipulis; sed ad priorem aperturam dicit descendisse Sp. Sanctum, ad alteram verò dicit, descensuros esse angelos. Ex Origene laudat quoque Hom. 4. Luc. sed non majori cum successu, quàm antea. Verba, quæ commemorat, reperiuntur in fine homiliæ: *Usque hodie adventum Domini Salvatori Spiritus Iohannis virtusque præcedit. Omnia magna mysteria Domini & dispensationis ejus. Angeli præcurrunt Iesum. Angeli quotidie aut ascendunt aut descendunt super salutem hominum in Christo Iesu.* Observat autem Auctor problematis, & inquit: *Spiritus verò Elia & Ioannis paulò ante scripsisse*

fuisse Spiritum Sanctum, qui etiam fuerit in Christo, & qui supervenerit in Mariam; quibus reor significare velle, Origenem in antecedentibus per Spiritum Sanctum, qui in Eliâ & Johanne fuerit, intellexisse Angelos, quod planè secus se habet. Sic habent verba Origenis, ad quæ respicit: *Fuit in Eliâ virtus & Spiritus, sicut in omnibus prophetis, & secundum dispensationem corporis in ipso quoque Salvatore, de quo post paululum ad Mariam dicitur: Spiritus Sanctus superveniet in te, & virtus altissimi obumbrabit tibi. Spiritus ergo, qui fuerat in Johanne, & virtus, quæ in illo erat, in hoc quoque apparuit. Ille translatus est, hic verò præcursor domini fuit. In his sanè nihil est, quod nobis persuadeat, per Spiritum illum qui in Eliâ, in omnibus prophetis, in Johanne fuit, intelligi angelos. Dum verò in fine homiliæ dicit: Angeli præcurrunt Iesum, non hoc intelligendum est de Spiritu Johannis, sed de ipso Johanne, quem Malachias appellat angelum. Dicitur autem in numero plurativo, Angeli præcurrunt Iesum, ut respondeant antecedentia sequentibus: Angeli ascendunt aut descendunt.*

XXXVII. Consideremus nunc ea, quæ ex Lactantio producit. Primum allegat
ex

119 *Causa Spiritus Sancti.*

ex Lib. II. Instit. §. 9. sed leguntur §. 8. Cum esset Deus ad excogitandum prudentissimus, ad faciendum solertissimus, antequam ordiretur hoc opus mundi: quoniam plenus & consummati boni fons in ipso erat, sicut est semper; ut ab eo bono tanquam rivus oriretur, longeque proflueret, produxit similem sui Spiritum, qui esset virtutibus Dei Patris praeclatus. His subjungit Auctor problematis, quae apud Lactantium, saltem in exemplari meo à Gallæo edito, non exstant: Postea autem multos genuit alios operum suorum ministros, quos Graeci ἀγγέλους nominant, quae propterea unde habeat nescio; fortè ex Lib. IV. 6. quae postea allegari irrepleverunt, quae nos subjungemus, antequam ad ea respondeamus: Deus igitur machinator confitutorque rerum, sicut in secundo libro diximus, antequam praecelrum hoc opus mundi adoriretur, sanctum, inextinguibilem Spiritum genuit, quem Filium nuncupavit. Et quamvis alios postea innumerabiles per ipsum creavisset, quas angelos dicimus, hunc tamen solum primogenitum divini nominis appellatione dignatus est, patriâ scilicet virtute ac maiestate polentem. c. 8. Quomodo igitur procreavit? Primum nec sciri à quoquam possunt, nec narrari opera divina; sed tamen sancta li-
tera

tera docent; in quibus cautum est illum Dei Filium Dei esse sermonem, sive etiam rationem; itemque ceteros angelos Dei spiritus esse. Nam sermo est spiritus cum voce aliquid significante prolatus. Sed tamen quoniam spiritus & sermo diversis partibus proferuntur, siquidem spiritus naribus, ore sermo procedit, magna inter hunc Dei filium, & ceteros angelos differentia est &c: Constat ex his, Lactantium per Spiritum Dei intellexisse Filium Dei, & ab eo distinguere alios Spiritus, quos angelos dicit, nullam verò mentionem facere Spiritus S. tanquam distincti à Patre & à Filio. Non putem tamen multum præsidii esse Auctori problematis in hoc scriptore; non enim dicit, Spiritum Dei esse angelos, sed angelos à Spiritu Dei manifestè distinguit. Sed Spiritum Sanctum in suis libris, qui exstant, nequidem nominat; & notat Scultetus Medul. Patrum P. I. p. 432. quòd in epistolis ad Demetrianum, autore Hieronymo, Spiritus S. substantiam negavit, & errore Iudaico dixit, eum vel ad Patrem referri vel ad filium, & sanctificationem utriusque personæ sub eius nomine demonstrari. Quod si etiam hunc patronum haberet Auctor problematis, non tamen multum in eo posset gloriari, qui ex gentili Christianus factus

non

non potuit eo usque emergere, quin multis erroribus adhuc scateret, quorum varios annotavit Scultetus Med. Theol. Patr. lib. x. cap. 12.

XXXVIII. Quos his nunc addit scriptores Ecclesiasticos, eos tanquam heterodoxos facile possemus hoc in negotio negligere. Talis est Eusebius Cæsarensis Episcopus, de cuius orthodoxiâ valde dubitatur. Citat eum de Eccl. Theol. quod *abi dixerat, Filium semper esse presentem cum Patre suo, qui deinde emissum à Patre venisse in mundum, subiungat*; secundum eandem rationem Spiritus Sanctus semper adstans throno Dei, siquidem & myriades myriadum adstiterunt ei juxta Danielem. Missus etiam ille est, aliquando quidem in specie columbae super filium hominis, aliquando verò super unumquemque Prophetarum & Apostolorum: propterea idem etiam ex Patre procedere vel egradi dicitur. Deinde, probet ex sacris etiam diabolum, (quem vocat πνεύμαλα κατὰ τὴν φύσιν Spiritus contrarios) à Deo egressum esse, vel existisse dios. Sed non videmus, Eusebii verba necessario sic exponenda, ut faveant sententiæ Auctoris problematicæ. Dicitur Spiritus Sanctus semper adstare throno Dei secundum eandem rationem, quâ Filius semper est præsens cum Patre suo.

Æqui-

Equiparatur ergo Filio, & ejusdem dignitatis atque essentiz cum eo censetur, non igitur in angelorum ordinem potest redigi, quod etiam apparet ex Symbolo, quod ipsemet stante Synodo Nicænâ conscripsit, ubi dicit: *Credimus etiam in unum Spiritum Sanctum. Et istorum quemque esse & existere credimus: Patrem verè Patrem esse, Filium verè Filium, & Spiritum Sanctum verè Spiritum Sanctum.* Quando ergo dicit, & *myriades myriadum adstitisse ei juxta Danielelem*, per id non denotat, illas myriades myriadum esse Spiritum Sanctum, cum illæ expressè à Spiritu Sancto distinguantur, hic verò sic adstet throno Dei semper, sicut Filius semper est præsens cum Patre suo. Non intelligo, quare Auctorem operis imperfecti inter testes suos recenseat, cum initio dixerit, se tantum consentientes adducturum Patres Ante-Nicænos: cum enim Auctor ille operis imperfecti in Matthæum nomen Chrysostomi assumeret, saltem antiquior Chrysostomo non fuit, adeoque post Synodum Nicænam vixisse est censendus. Citat homil. 20. in quâ hæc verba nec in Græcâ editione, quæ Etonæ est, impressa, nec in Latinâ Basileensi 1557. deprehendo: *Spiritus Sanctus vel Angeli.* E contrariio in fine homiliæ hæc *δαδολογία* le-

H

gitur

gitur: *Qua omnibus nobis contingat assequi, gratiâ, & misericordiâ domini nostræ Jesu Christi, per quem & cum quo Patri gloria simul & Spiritui Sancto, nunc & semper, & in secula seculorum, Amen;* in quâ Spiritus Sanctus non habetur pro angelis, quibus non est exhibenda gloria communis cum Patre & Filio, quæ hîc exhibetur Spiritui Sancto, cum potius ipsi angeli unâ cum hominibus istâ gloriâ debeant glorificare Deum, adeoque Patrem, Filium & Sp. S. eodem honore afficere. Neque etiam in hom. 47. nec juxta Græcam nec juxta Latinam editionem quicquam horum verborum reperio, quæ hîc laudat: *Tollam ex eâ pignora veritatis meæ*, id est, Spiritum Sanctum. Tandem, quid ultima §. 19. verba ad rem præsentem faciant, non capio: *Per Melchisedecum etiam aliqui intelligant Spiritum Sanctum, ut Author quæst. Vet. & Novi Test. 109. sub nomine Augustini statuit*, Melchisedecum esse Spiritum Sanctum, & esse sacerdotem, sed non summum: alii cœlestes angelos atque virtutes. *Utraque autem pars ex hypothesi nostrâ facillimo negotio conciliatur.* Nam an inde sequetur, Auctorem quæstionum V. & N. T. per Spiritum Sanctum intelligere angelos, si dicat, Melchisedecum esse Spiritum

tum.

tum Sanctum? quia alii per Melchisedecum intelligunt angelos. Quid, si & ego per Melchisedecum intelligerem Sp. Sanctum & alii intelligant per illum angelos; an inde sequetur, me Sp. Sanctum habere pro angelis, quia hæc est sententia Auctoris problematis, per quam hypothesin facile ego cum illo possim conciliari? Quis ferat ita argumentantem? Atqui, quod ego de me falsò supposui, id verè facit Auctor Quæst. V. & N. T. per Melchisedecum intelligit Sp. Sanctum. Sic ille circa finem 109. quæst. *Similis autem Dei Filio non potest esse, nisi sit ejusdem nature. Et quid inenodabile videtur, si Melchisedech ut homo apparuit, tunc intelligatur tertia esse persona.* Et paulò post: *Similiter & Spiritus S. quasi antistes sacerdos appellatus est excelsi Dei, non summus, sicut nostri in oblatione præsumunt.* Quia quamvis unus sit substantia Christus & Spiritus Sanctus, uniuscuiusque tamen ordo observandus est. Sed, uti apparet ex laudatis, per Spiritum Sanctum intelligit tertiam personam Trinitatis, ejusdem nature, cujus est Filius, qui sane non est in ordine Angelorum; an ergo dici poterit ullo jure, ipsum per Sp. Sanctum intelligere Angelos?

XXXIX. Sed ne conqueratur forte Au-

H 2

ctor

Auctor problematis, à nobis quicquam esse om-
 missum eorum, quæ ex antiquitate addu-
 xit aliâ occasione, examinemus & illa quæ
 habet p. 7. si fortè putet, & hæc ad suam
 opinionem confirmandam quicquam face-
 re posse. Sic ille p. 7. *Vox Spiritus Sancti,
 aut Spiritus Domini quandoque unum denotat
 individuum, aliquando individuum vagum.*
 Supponam, rectè citata esse quæ sequuntur,
 quamvis antehâc aliquando contrarium de-
 prehenderim (neque enim res ista tanties-
 se videtur, ut otio meo in inquirendis &
 inspiciendis locis abuti debeam, nisi ubi id
 opus fuerit ad mentem auctorum depre-
 hendendam.) Citat *Origenem vel quisquis
 alius potius Auctor* hom. 2. Cant. tract. prior.
*Similis Spiritui ei, qui in specie descende-
 bat columba audias, quia oculi tua columba
 sunt.* Hîc fanè non puto individuum vagum
 designari, sed unam personam, quæ tertia
 est in S. S. Trinitate. Sic verò idem ille
 hom. 3. initio: *Et ibi dicat esse oculos ejus
 columbarum: ut duorum oculorum columba
 dua intelligantur esse filius & Spiritus San-
 ctus. Et ne mireris, si columba simul dica-
 tur, cum uterque similiter advocatus dica-
 tur.* Ex lib. 1. contra Celsum totum allege-
 mus locum, qui legitur p. 34 & 35. edit.
 Cantabrigiensis 1658. *Quin & hodie ve-*
stiagi

figia Spiritus illius Sancti, qui columba specie apparuit, servantur apud Christianos; excantantur damonia, multas sanationes perficiunt, praevident voluntate Dei futura. Irrideat licet Celsus quod dicetur, aut introductus ab colubaeus, dicetur tamen; multos penè invitos attractos esse ad Christianam religionem, Spiritu quodam repente mutante intellectum eorum ab odio, quo erga Verbum detinebantur, ita ut ipsius gratiâ non cunctarentur mortem oppetere. Unde apparet, illum quendam Spiritum esse Spiritum illum Sanctum, qui columbae specie apparuit, adeoque satis determinari ab Origene certam ejus personam, non individuum vagum designari. Citat postea ex lib. 3. contra Celsum ea verba, quæ paulò post principium p. 113. leguntur: Πῶς ἔχῃ ἐξ εἰνότων κατασκευάζει τοῖς ἀπιστοῖς ὅτι πνεῦμα δόξης ἰσοείας ἔχει μετὰ τῆς φύσεως, ὅτι τὰ ποιῶντα ἡ πᾶσι μαρτυρεῖται, ἀλλὰ τὸ θεῖον πνεῦμα. Qui sit ut isti, qui non dignantur historiarum & Prophetiarum miraculis credere, figmenta hæc putent potius, quàm divino Spiritu afflatus fuisse vatum illorum sanctissimas animas. Ubi illud τὸ θεῖον πνεῦμα rectè putamus verum per divino Spiritu, ut non individuum vagum designetur, sed illa persona, quæ est tertia in S. S. Trinitate, unius ejusdemque essentix cum Patre & Filio, non minus ac p. 112. præ-

cedente initio l. 3. hæc verba in Objectione Celsi πιστύντων μὲν ἀμφοτέρων ὅτι ἀπὸ τοῦ πνεύματος προφητεύουσι περὶ ἐπιδημιῶν Σωτῆρος τοῦ γίνεσθαι τῶν ἀνθρώπων, rectè sunt versa, utrisque credentibus prænunciatum per afflatos divino Spiritu vates adventum Servatoris humani generis, cùm in Græco sit περὶ Σωτῆρος, quod est ad verbum aliquis servator. Particula enim illa περὶ indefinitè sumpta aliquando περίλαμψις & ornamentum causâ tantum additur, uti de similibus Græcis particulis obtinere solet.

XL. Pergit Auctor Problematis p. 8. atque putat, vocem hanc *Spiritus Sancti* sæpius usurpari pro septem Spiritibus principalibus, vel, ut videtur, pro omni Sanctorum Spirituum exercitu & multitudine: ad quod probandum facere debet id, quod citat p. 10. ex Auctore, uti dicit, incomparabili Operis imperfecti homil. 30. (quæ tamen non reperi) *super te requiescent septem Spiritus Dei: septem dicuntur, quia ex illis septem omnes Spiritus virtutum procedunt.* Sed nos hujusmodi septem Spiritus principales nullos novimus ex sacris, in quibus etiam non putamus hoc reperiri significatum, ut *Spiritus S.* designet omnem Sanctorum Spirituum exercitum & multitudinem. Provocat ad Origenem testantem
in

in sacris numero plurali dici Spiritus Sanctos. Ad id adducit lib. 1. in Esai. citante Pamphilo in Apolog. Tanti per singulos dicuntur Spiritus S., quanti sunt hi, qui habent in se Spiritum Sanctum. Hermas simil. 9. Virgines hæ, quæ sunt, Domine? Et dixit mihi, Hæ, inquit, Spiritus Sancti sunt. Adducit etiam Orig. hom. 13. Numer. Nullus Sanctorum Spirituum obtemperat Mago. Non potest invocare Magus Michælem, non potest invocare Magus Raphaëlem, neque Gabriëlem &c. Ex quibus testimoniis fatemur constare, ab illis in numero plurali angelos dici Spiritus Sanctos, quod fieri posse non refragatur, sed id nihil facit ad rem præsentem. Sic fatemur, Lib. 9. cap. 14. in epist. ad Rom. in plurali mentionem fieri Sanctorum Spirituum; ad quod probandum etiam faciunt citata ex Lactantio Divin. Instit. lib. 4. 6. Eusebii Dem. Euang. 6. 16. De Eccles. Theol. 2. 20. & 3. 3. & ex Macario homil. 14. item ex eodem homil. 15. & hom. 22. & ex Didymo lib. 3. de Spiritu S. quæ videre potest lector apud Auctorem problematis p. 8. & 9. & 10. Quod verò putet hæc conferenda cum Es. XI. 2. ἡπανάσθη ἐπ' αὐτοῖς πνεύμα ὑψίστου. Requiescet super eos Spiritus Domini & 1 Pet. 4. 14. ἡ ἁγία πνεύμα ἐπ' ὑμᾶς ἀνα-

αὐτῶν: *Dei Spiritus super vos requiescit*, quasi in illis locis Spiritus Dei denotet angelos Sanctos creatos, in eo totum cælo aberrat. Non dicam, quod in versione Græcâ non legatur ἰσ' αὐτῶν, sed ἰσ' αὐτῶν, quod & cum Hebræo fonte concordat, tantum observo, Es. XI. 2. planè contrarium supra à nobis evictum, atque ostensum, Spiritum illum Domini non creaturam esse, sed ipsum Creatorem, atque operationes, quæ illic ipsi assignantur, planè divinas esse. Hinc quoque lux affulget 1 Pet. IV. 14. Spiritus enim ille idem Dei, qui requiescit super Christo, capite fidelium, ab hoc etiam cum fidelibus tanquam cum ipsius membris communicatur. Quod autem citat Origenem in epistolam ad Romanos in illud, *Habemus primitias Spiritus*, ita commentantem: *Quid ergo, sicut primitiæ area & primitiæ torcularis ejusdem liquoris est, cujus est torcular, itane & videbitur id quod dicit Primitias Spiritus, ex multis reliquis Spiritibus Sanctis & beatis unus aliquis esse præcipuus?* quasi sentiret, Spiritum Sanctum in illo loco ad Romanos denotare angelos, in eo an satis sincerè egerit meritò dubitari potest. Si enim inspicatur contextus, apparet Origenem varias explicationes istius loci proponere;

ac

ac primùm quidem hanc quam vidimus, quam interrogativè tantùm proponit, &, uti statim ostendit, planè rejicit. Altera est, quòd cum multi sint Spiritus ministeriales ministrantes in ministerio propter eos, qui hereditatem capiunt salutis, sub quibus agens unusquisque credentium velut sub tutoribus & procuratoribus instruitur usque ad præfinitum tempus à Patre, id est, usque quo ad legitimam ætatem animæ perfectionis advenerit, ubi quis jam supergressus Spiritum servitutis, quem acceperat in timore, à quo velut pædagogus servaretur, dignus efficitur accipere Spiritum adoptionis, primitias Spiritus, per quem adoptatus in filium possit primitivorum ecclesiæ, quæ in calis est, sociari, ita multum differt NB. à ministerialibus Spiritibus Spiritus Sanctus, cujus primitias Paulus cum suis similibus habere se dicit. De hâc autem interpretatione subjungit: Unus hic modus sit quo sermonis hujus intelligentiam potuimus indagare: unde apparet, priorem expositionem susque deque habere. Alius modus exponendi plenius in seqq. ab ipso deducitur, cujus summam his comprehendit verbis: *Dona ergo diversa Spiritus à Paulo multi Spiritus appellantur. Horum autem & multorum donorum quicquid est summum & magnum.*

sine dubio Apostoli consecuti sunt, ut idonei essent, (sicut & ipse Paulus dicit) ministri Novi Testamenti, & ut repleti possint euangelio ab Hierusalem in circuitu usque ad Illyricum, hoc quod in eos præ cæteris sublimius & præclarior collatum est Sancti Spiritus donum, merito primitias Sancti Spiritus appellavit. Tertium postea modum Origenes addit prioribus, his verbis: *Alius hic nobis ordo de primitiis Spiritus videtur, si probandus occurrit adhuc, addemus & tertium. Item ipse Apostolus dicit de Domino Iesu Christo, quia sit primogenitus omnis creatura. Ne forte ergo, ubi ille dicitur primogenitus omnis creatura, tali quâdam ratione etiam multorum Spirituum primitia dicatur Spiritus Sanctus. Sit ergo iste expositionis tertius modus. De his tribus expositionis modis dicit: Probet autem qui legit, quid horum magis sensui conveniat apostolico; neglectâ sic illâ interpretatione, quam Auctor problematis tanquam Origenis adducit. Quod si hæc, quæ sequuntur apud Origenem, non legit, negliger admodum tractavit causam tanti momenti, si legit, neglexit officium sinceri viri, dum lectori tanquam Origenis sententiam tradit, quam ipse planè rejecit. Ne tamen ab hoc tertio interpretandi Origenis modo*

modo forte posthac quasdam petat suppetias, cogitandum est, Christum, dum dicitur *primogenitus omnis creatura*, non referri in ordinem creaturarum, sed dici genitum esse antequam creatura ulla esset condita, hoc est, ab æterno, quemadmodum id explicat Scriptura alibi, ita etiam quando Spiritus Sanctus dicitur *primitia multorum Spirituum* ab Origene, non illi Spiritus creati sunt censendi ejusdem ordinis, cujus est Spiritus infinitus, qualem esse Spiritum Sanctum in superioribus evicimus.

XLI. Tandem his annectit p. 10. quod imprimis notandum censet, quod Spiritus Sanctus cum articulo eoque duplici legitur Ioh: 14. vers. 26. τὸ πνεῦμα τὸ ἅγιον. Enallagen autem dicit, teste Grotio in Append. de Antichr. p. 26. esse frequentem, ut nomen singulare cum articulo ponatur pro universitate, quod nemo paulo eruditior nesciat. Sic ὁ ἀνθρώπος est genus humanum, ὁ Σατανᾶς universitas diabolorum &c. Hinc autem colligit Auctor problematis: *Quid ergo obstat, quo minus τὸ πνεῦμα τὸ ἅγιον sit universitas sive tota multitudo Sanctorum Spirituum.* Dicam quid obstat; primum obstat, quod non liceat sic colligere: *Frequentèr nomen singulare cum articulo ponitur pro universitate: Ergo semper, ergo ubique; et*
go

go nunquam nomen singulare cum articulo positum denotat singularem personam; est argumentum ex meris particulatibus. Dein obstant illa, quæ dum hunc locum Joh. 14. 26. comparavimus cum cap. xv. 26. & cap. xvi. 13. & 14. observavimus, ex quibus probavimus ibidem per Spiritum Sanctum designari tertiam personam S. S. Trinitatis, quæ eandem cum Patre & Filio habeat divinam essentiam. Videat lector superius §. 16.

XLII. Nihil nunc restat, nisi ut ad examen revocemus rationes, quibus paradoxam hanc & novam suam opinionem conatur stabilire. Ea videtur proponere §. III. p. 13. & seqq. postquam præmisisset §. II. *reliquum esse, ut videamus, an cum aliquâ verisimilitudine dici possit, eos actu ipso Spiritum Sanctum vocari.* Primum autem argumentum desumit ex illis locis Scripturæ, in quibus Spiritus Sanctus effundi dicitur, cujusmodi sunt Es. 32. 15. *Donec effundatur super nos piritus de excelso.* 44. 3. *Effundam aquas super sitientem, & fluentia super aridam, effundam Spiritum meum super semen tuum.* Zach. 12. 10. *Effundam super domum David, & super habitatores Hierusalem, Spiritum gratiæ & precum.* Ezech. 39. vers. ult. *Effudi Spiritum meum super omnem*
do-

domum Israël, ait Dominus Deus. Es. 20.
 19. *Fudit super ipsos Deus spiritum dormien-*
di. Observat autem, hanc phrasin non everti *Sp.*
S. personalitatem, quod velint Sociniani, cum
de animâ, quam personam esse alibi probave-
rit (quod ubi factum non dicit, nec quibus
 argumentis) eadem phrasis usurpetur 1. Reg.
 15. *Effudi animam meam. Ps. XLI. 5. Ef-*
fudi in me animam meam, & Es. 58. 10. Cum
effuderis esurienti animam tuam. Ubi quod
 dat, accipimus, nempe personalitatem non
 everti per istiusmodi phrasin, etsi animam
 cum corpore conjunctam non possimus
 pro personâ agnoscere, & putemus, id ma-
 nifestam implicare contradictionem: ratio
 autem nostra hæc est, quod vox Spiritus
 Sancti sæpe improprie & metonymicè pro
 donis Spiritus Sancti, quæ varia sunt, acci-
 piatur. Manifestus in eam rem est locus
 Ps. XLV. 3. *הוצק חן בשפתותי* *gratia fusa*
est in labiis tuis, & Act. 2. 38. *Accipietis do-*
num Sp. Sancti, hoc autem ordinariè ipse
 Spiritus Sanctus dicitur alibi, ut Act. X. 44.
Illapsus est Spiritus Sanctus in omnes, qui
audiebant hunc sermonem. Sic Exod. xxx. 3.
 Deus dicit: *Betzalecem implevi spiritu Dei,*
 quod explicat in seqq. *sapientiâ, intelligen-*
tiâ & scientiâ. Sic Num. x. 17. quem su-
 pra vidimus. Joh. VII. 38. 39. *Qui credit*

in

in me, sicut dixit Scriptura, flumina aquæ vivæ ex ventre ipsius fluent. Hoc autem dixit de Spiritu illo, quem accepturi erant credentes in eum; ubi per flumina aquæ vivæ, quæ Sp. Sanctus appellantur, non potest aliud quid intelligi, quàm fructus & dona Spiritus, quæ primis credentibus solebant concedi in ædificationem & conversionem aliorum; atque hoc modo explicari posse putamus priora quatuor loca, quæ ab Autore hîc sunt adducta. Quid verò ille? Post citata illa loca, in quibus phrasis effundi usurpatur de animâ, dicit: Hinc itaque apparet, neque contra eos qui statuunt Spiritum Sanctum unum individuum personale, me ex hac phrasi probare posse, Spiritum Sanctum esse omnem collectionem Spirituum Sanctorum. Sed immediate his subjungit: Ne quis vero putet, Socinianorum tantum ac Bidelli hypothesein cum hac phrasi salvari posse, meam vero conjecturam cum eadem vel non convenire vel eidem potius refragari, dicam Cicero, Livio, aliisque civitatem, multitudinem aut frequentiam effundi dici. Sic Cicero: in me carcerem effudistis, id est, homines qui erant in carcere. Alia his adjungit loca ex Virgilio & Curtio. Hoc vult, phrasin illam, effundi Sp. Sanctum non repugnare suæ sententiæ, quod equidem concedo, si ea abstractè

abstractè & in genere sumatur; sed si attendatur ad loca citata, cum in iis sermo sit de Spiritus Sancti donis, quæ non possunt dari, nisi ab eo, qui sit Supremus & æternus Deus, qui sit formator cordis hominum, qui sit auctor omnis luminis & omnis boni, quod desuper & cœlitus descendit, quod facile ex locis Esai. 32: 15. c. 44: 3. Zach. 12: 10. & Ezech. 39. vers. ult. posset evinci, omninò repugnabit, ut illa loca de missione angelorum creatorum intelligantur. At El. 29: 10. dum effusus dicitur Spiritus soporis in Judæos, docetur, eos induratos esse, sic traditos Satanæ, qui illos excæcaverit; idque ita, ut gravis & vehemens sit illa excæcatio, quasi magnâ copiâ effusa. His sic præmissis stringere conatur argumentum, & vult, hic notandum, quod ad divisionem Spiritus Sancti clarius insinuandam de suo Spiritu Deus effundere dicitur Joel. 11: 28. 29. & Act. 2: 17. 18. Conf. Tit. cap. 3. vers. 6. & 1 Joh. 4: 13. legitur ἐν τῷ πνεύματι αὐτοῦ δίδωμεν ἡμῖν, ex Spiritu suo dedit nobis. Hac verò de unâ personâ dici posse minimè videntur: quippe istis significatur, quandam quasi partem Spiritus effundi; mitti, dari: aliam continue Deum collaudare. Neque tamen ita obtinere potest institutum. Fateor, sic quandam partitionem

nem

nem & divisionem significari, quod optimè de donis Spiritus Sancti potest intelligi; quatenus Deus aliis hæc, aliis illa Sp. S. dona confert, & aliis majori gradu, copiâ & abundantia, aliis minori; nihil ergo nos cogit, ut id de parte angelorum accipiamus. Spiritus Sanctus sæpe cum aquâ comparatur, quæ propriè dicitur effundi, tunc ergo in illâ metaphorâ Sp. Sanctus dicitur effundi, quando dona ipsius communicantur.

XLIII. Sequitur §. 4. aliud argumentum, quod tamen à priori non differre non injuriâ quis dixerit, cum utrumque sit desumptum à phrasibus illis Scripturæ, in quibus Spiritus Sanctus divisus dicitur, & inter alia loca Scripturæ iterum citatur 1 Joh. 4: 13. Urget etiam illud eodem modo: *Ea autem, inquit, de unâ personâ, eâque immateriali non videntur dici posse, sed potius de multitudine seu exercitu Sanctorum Sp., qui in sua ministeria distribuitur, prædicanda imprimis cum phrasis ista solemnis sit scriptoribus istius temporis. Nam Casar ait, exercitum per plures Civitates distribui. Plinius Junior in ministeria distribui exercitum scribit. Unde etiam similia exempla adduci vidimus. Alia quædam adjecit loca Scripturæ, quæ de divisione & partitione Sp. Sancti loquuntur, ut sunt Hebr. 2: 4. & Numi*

11: 17. 25. Joh. 3: 34. Act. 11: 17. 18. 2 Reg. 2: 9. ubi Eliam orat Elisæus, ut duplex portio Spiritus ejus super se sit. Verum operæ pretium est observare, quòd locus ille Act. XI. 17. non tantum nullo modo inserviat causæ Auctoris problematis, sed eam planè destruat, & nostram responsionem præced. articulo datam confirmet. Postquam enim dixisset Petrus vers. 15. quòd ceciderit Sp. S. super illos, qui erant in familiâ Cornelii, sicut & olim super Apostolos, sive, quod idem est, quòd fuerit effusus super illos, explicat id de dono Sp. Sancti, & quod antea appellaverat Spiritum Sanctum, nunc *δωριον* donum dicit Spiritus Sancti; *si igitur æquale donum dedit eis Deus sicut & nobis, qui credidimus in Dominum Iesum Christum, quis verò ego eram ut possem prohibere Deo?* Hæc si cum attentione legit Auctor problematis, quidni potius istam effusionem explicavit cum Apostolo de donis Sp. Sancti, quàm ut *ιδίαν ἐπίλυσιν* contra monitum Petri 2. Pet. I. 20. introduxerit? Quæ postea citat ex Clem. Alex. Strom. 5. ubi dicit præfecturas angelorum esse distributas per gentes & civitates, de iis agendi postea commodior erit locus.

XLIV. Nos progredimur ad argumen-
I tum

tum ejus Tertium, quod habet §. 5. & operosè admodum deducit: Sic illud proponit: *Omisso Spiritu Sancto in pluribus S. Scriptura locis, in quibus minimè conveniens videri possit eum omitti, in illius, vel potius ipseus nominis Spiritus Sancti locum, post Deum Patrem & Filium subnectuntur Angeli. Unde apparet, per angelos intelligi Spiritum Sanctum.* Vis igitur istius argumenti videtur consistere in his duobus, & quod omittatur nomen Sp. Sancti in quibusdam locis Scripturæ, in quibus non est conveniens illud omitti, & quòd in ejus locum, post Deum Patrem & Filium, ponantur angeli. Vide verò ô homo, ne nimium præsumas de tuâ sapientiâ, nec, quod tibi videtur conveniens, censeas sic quoque debere visum fuisse Deo. An non nôsti sapientiam Dei longè majorem esse quàm sapientiam hominum, & ubi nullas videt rationes homo, videre tamen Deum. Scilicet videbatur Auctori problematis minimè conveniens, ut Marci 13. 2. omitteretur Spiritus Sanctus, nisi per Sp. Sanctum intelligantur Angeli. Sic enim ille p. 12. *Ita Marci 13. 32. Christus dicit, neminem scire diem judicii, nec angelos cælestes, nec Filium, sed solum Patrem suum. Nam si Spiritus Sanctus illum scivit, im-*
merito

Causa Spiritus Sancti. 131

merito itaque Christus suum solum excepit Patrem , si nesciret adjunxisset sibi & angelis Spiritum Sanctum , nisi forte eum nomine angelorum expressum voluit. Qui si collationem instituisset Scripturarum debitam , vidisset , omninò scivisse Sp. S. diem judicii. Dicitur enim 1 Cor. II. 10. Spiritus Dei scrutari omnia , id est , perfectè cognoscere (prout superius ostendimus debere hæc verba accipi) etiam profunditates Dei. Qui sic novit profunditates Dei , qui Deum infinitum infinito suo intellectu comprehendit , is etiam novit Dei consilia , adeoque diem judicii. Dicitur porrò vers. 11. quòd , sicut nemo hominum vidit ea quæ sunt hominis , nisi Spiritus hominis , qui est in ipso , ita nemo novit ea quæ sunt Dei , nisi Spiritus Dei ; unde necessariâ consequentiâ colligitur , Sp. S. esse ipsum Deum , qui sic sit conscius sui ipsius , sicut hominis Spiritus est conscius de se ipso ; & cùm Deus noverit diem judicii , certum quoque est Sp. Sanctum , qui omnia novit , quæ sunt Dei , eum non ignorare. Potest igitur responderi , quando solus Pater dicitur nosse diem judicii , non nomen Patris sumi personalitèr , sed essentialitèr , prout æquipollet nomini Deus aliquoties in scripturis ; quæ loca cuivis sunt obvia.

Perperam verò admodum citat auctor locum Marci 13. 32. addens de suo illud Pronomen *suum*, cum Christus non dicat, *solum Patrem suum* nosse diem judicii, sed *solum Patrem*. Hæc responsio si fortè non arrideat, dabimus aliam, nimirum, Christum hîc nullam facere operationem Sp. Sancti, quia ille tunc nondum missus erat, quæ missio demum facta in festo Pentecostes. Quamcumque quis præferat, certum est, illam notitiam diei judicii non assignari Patri ad excludendas reliquas personas S. S. Trinitatis, sed tantum in oppositione ad creaturas. Quòd si hoc *Auctoris* argumentum procederet, an non eodem jure licebit colligere ex Matth. XI. 27. *Nemo novit Filium nisi Pater, neque Patrem quis cognoscit nisi Filius, & si cui Filius voluerit revelare*. Si nemo novit Patrem nisi Filius, Ergo Pater se ipsum non novit, & si nemo novit Filium nisi Pater, non Ergo Filius se ipsum novit. Cogitandum ergo, multa dici de Deo vel etiam de personâ aliquâ S. S. Trinitatis ad excludendum creaturas, quæ non sunt trahenda ad excludendam unam vel alteram S. S. Trinitatis personam. Ita hîc Marci x 11 r. 32. negatur angelis scientia diei judicii, quia sunt creaturæ: negatur ea Filio, quod procul dubio non

non potest intelligi de utrâque naturâ, cum secundum divinam *noverit Patrem*, Matth. x 1. 27. adeoque omnia quæ sunt in Patre, inter quæ referendus quoque est dies judicii, & *scrutetur corda & renes* Apoc. II. 23. quod solent Deo assignare sacrosanctæ literæ, & *noverit omnia* Joh. x x 1. 17. atque ita sequitur, id intelligendum esse de humanâ ejus naturâ, cui Deus revelaverat tunc ea mysteria, quæ revelare Ecclesiæ debebat, inter quæ non referendus est dies judicii. Unde manifestè apparet, dum hîc à notitiâ diei judicii tantum creaturæ excluduntur, non excludendum esse Sp. Sanctum.

XLV. Videamus nunc alia *Auctoris* loca, in quibus minimè conveniens ipsi videtur omitti Spiritum Sanctum, nisi statuatur, angelos, de quibus ibidem est mentio, in ejus locum supponi. Producit ea p. 16. Marci 8. 38. *Veniet & Filius hominis in gloriâ Patris sui cum Angelis Sanctis*, quibus paralleli sunt Luc. 9. 24 & 1 Thess. 3. 13. *Inde autem sibi videri dicit, in seqq. locis Archangeli, angelique vocem etiam synecdochicè numero singulari pro plurali poni, inprimis 1 Thess. c. 4. vers. 16. Ipse Dominus in jussu & in voce Archangeli, & in tubâ Dei descendet de cælo* Es. 63. 9. *Non angelus, ne-*
I 3 *que*

que legatus , sed ipse Dominus salvos eos fecit. Gal. 4. 14. sicut Angelum Dei excepisti me , sicut Christum Iesum. Eccl. 43. 13. δι' αὐτὸν ἰουδοῖι ὁ ἄγγελος αὐτοῦ, καὶ ἐν λόγῳ αὐτοῦ συγκαθ' τὰ πάντα. Hic scire vellem, quare ipsi non visum fuerit conveniens omitti Spiritum Sanctum ? Mihi verò id omnino conveniens videtur propterea , quòd quamvis opera omnia S. S. Trinitatis ad extra , juxta communem & verum canonem Theologorum, sint indivisa, adeoque Judicium extremum, quatenus est opus ad extra, sit commune toti S. S. Trinitati , tamen , quantum attinet ad modum operandi, nulla hinc possit considerari operatio, quæ certâ quâdam & peculiari ratione queat appropriari Spiritui Sancto. Joh. V. 22. dicitur, quod *Pater omne dederit judicium Filio*, quatenus sine Filio neminem judicat. Est hinc operatio quædam Filio appropriata, quæ ad *Redemptionem* pertinet, quod opus proprium est Filii, sicut *Sanctificatio* est opus proprium sive appropriatum Sp. S. Hoc opus censendus est peregisse & absolvisse plenissimè Sp. Sanctus ante judicium extremum, ubi nempe ultimi electorum fuerint vocati per fidem, in cujus donatione, conservatione & augmento consistit & absolvi-

tur

tur Sanctificatio, quâ perfectâ & consummatâ, quod fit in morte, intromittitur fidelis tanquam omninò purus in regnum cœlorum. Et opus Redemptionis includit etiam redemptionem corporis, quam adhuc exspectamus Rom. vii. 13. At illa redemptio corporis nostri fit per resurrectionem & adjudicationem ad vitam, quę particularis est Christi, juxta Joh. V. 22. Sic I Cor. XV. 24. dicitur, quòd ubi fuerit *finis*, *Christus sit traditurus regnum Patri, ut Deus sit omnia in omnibus*. Finis erit in judicio extremo, quod datum est Filio. Post hoc nihil aliud exspectandum, quàm ut Christus tradat regnum Patri, hoc est, ut illi quos hâctenus defendit contra hostes, nunc liberati ab omnibus hostibus, à peccato, à morte, à miseriâ omni, sistantur sic Patri, ut imposterum nihil sit in ipsis, nisi quod est à Deo, nullum peccatum, nulla mors, nulla planè miseria, sicque Deus sit omnia in omnibus. Sic puto constare, quare in his locis non fiat mentio Sp. S. particularis, quia nullum in judicio extremo opus peculiaritèr Sp. S. appropriatum occurrit. Angelorum verò fit mentio, quia illi tanquam ministri Filii Dei spectantur, quorum operâ vult uti ad colligendos suos electos, prout clarè admodum

docetur Matth. xxiv. 30, 31. *Videbunt Filium hominis venientem in nubibus cœli cum potestate & gloriâ multâ. Et mittet angelos suos cum tuba vocis magna & colligent electos suos à quatuor ventis, ab extremitate cœlorum ad eorum extremitatem; & qui etiam ad manifestationem gloriæ ipsius hujus Regis æterni J. Christi sunt quàm maximè facturi.* Miror autem Auctoris consequentiam, quam ex illis locis necit, quòd nimirum inde sequatur, ut in locis 1 Thess. 4. 16. Es. 63. 9. Gal. 4. 14. & Eccl. 43. 13. per archangelum & angelum synecdochicè intelligantur angeli. Locorum istorum diversa planè est ratio, & sermo non est ubivis de re eadem. 1 Thess. IV. 16. agitur quidem de iis, quæ spectant extremum judicium, quâtenus agitur de resurrectione, quæ extremum judicium antecedit, sed per archangelum non intelliguntur angeli, sed ipse Christus, qui dicitur de cœlo descensurus tali voce, quæ sit instar tubæ, quâ demonstret se esse archangelum, quæque deceat eum, qui est archangelus, nempe Christum, qui est princeps angelorum, qui est angelorum caput. Neque mentio fit in sacrâ paginâ plurium quàm unius archangeli, neque plures esse possunt, quia nec plures esse possunt

sunt Mediatores. Locus Ef. LXIII. 9.
perperam vertitur; Sic habent Hebræa:

בכל-צרתם לא צר ומלאך פניו הושיעם

In omni angustia eorum non arctavit eos, sed angelus faciei ipsius servavit illos, quibus additur: in dilectione sua & in clementia sua ipse vindicabat eos, & bajulabat illos, & ferebat illos omnibus diebus seculi. Et hæc omnia talia sunt, ut in angelum creatum cadere non possint. Quis enim est Angelus faciei Dei, nisi is qui est imago Dei invisibilis, quo vilo videmus Patrem, Filius Dei qui est in sinu Patris? qui utique non est angelus creatus, sed ipse Deus. Quis est Servator nisi Filius Dei? quis salutem æternam conferre potest, nisi qui est ipsa vita, adeoque fons & origo vitæ? quis bajulare, quis conservare potest, nisi is qui omnia fert verbo suo potente? quoniam igitur quæso jure nomine *Angeli faciei Dei* intelligamus angelos? Gal. IV. 14. fatemur, per angelum Dei posse intelligi angelum creatum, sed non apparet necessitas ulla, ut illud vocabulum synecdochicè interpretemur. Docet Apostolus, quanti olim æstimaverint se, & quo in pretio apud ipsos fuerit, nimirum, quòd ab ipsis fuerit non secus æstimatus ac angelus aliquis,

138 *Causa Spiritus Sancti.*

imò ac ipse Christus Jesus, quatenus nempe sciebant verbum, quod prædicabat Paulus, esse verbum Christi Jesu. Locus Eccles. 43. 13. ex libro Apocrypho cum sit, possemus illum jure præterire; attamen vers. 13. nihil his simile legitur. Sed verba ista vers. 26. in plerisque libris leguntur, in aliis tamen habetur *Δε' αὐτὸν διόδια τίλαται αὐτῷ*, quam lectionem Londinensis editio præfert. Sed retineamus vulgarem lectionem, quid verò inde conficietur? non enim necessariò angelus Dei synecdochicè hîc debet sumi, cum possit denotare iadividuum vagum; &, si synecdochicè accipiamur, nihil tamen inde lucrabitur, cum hîc sit quæstio, an per Spiritum Sanctum intelligantur angeli, quod sanè hinc nullo modo potest concludi.

X L V I. Pergit Auctor & majori efficaciam urget argumentum suum. *Sed omis-
sis obscurioribus, inquit, & incertis, ad
certiora, à quibus initium fecimus, redeamus.
Luc. 12. 8, 9. Filius hominis confitebitur
& negabit coram angelis Dei, & Apoc. 3. 5.
Confitebor (dicit Christus) nomen ejus co-
ram Patre meo & coram angelis ejus, &
1 Tim. 5: 21. Obtestor, inquit Apostolus,
coram Deo, Domino Iesu Christo, & electis
angelis. Videamus jam robur istius argu-
menti:*

menti: In testimonium hîc vocantur, ait, *Pater, Filius & Angeli.* Aut ergo h. l. *Spiritus S. testimonium*, aut 1 Joh. 5: 7. (alloquor nunc eos, qui hunc locum genuinum agnoscunt) *Angelorum omissum esse dicendum*, qui tamen non semel testati sunt, Iesum esse Christum, nisi per Spiritum Sanctum intelligantur *Angeli, & per angelos Spiritus Sanctus.* Planè alius est scopus 1 Joh. V. 7. alius reliquorum locorum. 1 Joh. V. 7. testantur tres illi testes, fidem vincere mundum, sive cupiditates, quæ sunt in mundo, ut ubi est fides ibi illæ locum habere nequeant, quòd ea corda purget, prout à nobis paulo ante ad §. 23. plenius fuit ostensum. At Luc. XII. agitur de sententiâ judiciali, quam Christus coram angelis Dei sit pronunciaturus, ipsis nempe præsentibus & testibus; & Apoc. III. angeli iterum tanquam testes istius sententiæ adducuntur, sed adjicitur Pater, qui non tantum consideratur ut testis, sed etiam ut Auctor Judicii illius, quod exercebit Filius, utpote qui Filio omne dedit judicium. Tandem 1 Tim. V. 21. advocat Apostolus Paulus testes angelos, qui Ecclesiæ sunt præsentibus, atque ea, quæ in illâ fiunt, semper observant, sicut & Pater & Filius suâ Omniscientiâ omnia nôrunt, quæ in Ecclesiâ contingunt. Hoc argumen-
tum

tum si ullam vim habeat, disjunctivum ut sit oportet. Hoc ergo modo erit formandum: Aut Luc. XII. 8. 9. Apoc. III. 5. & 1 Tim. V. 21. omissum est Sp. Sancti testimonium, aut 1 Joh. V. 7. omissum est testimonium angelorum, aut per Sp. S. sunt intelligendi angeli: Sic verò subsumentum, si quid debeat concludi: Atqui non omissum est Luc. XII. 8. 9. Apoc. III. 5. & 1 Tim. V. 21. testimonium Sp. S. nec 1 Joh. V. 7. omissum est testimonium Angelorum E. per Sp. S. sunt intelligendi angeli. Supponit hoc argumentum, semper & quovis in loco omnes eos, qui testimonium possunt dare alicui veritati, debere conjungi, quod utique gratis dicitur & sine probatione. Nos verò poterimus eodem argumentandi genere ex Luc. XII. 8. 9. conficere, Patrem esse angelos & Spiritum Sanctum, cum & ibi omissum sit nomen Patris, quod positum est Apoc. III. 5. Sp. Sanctus in verbo suo non semper omnes conjungit, qui quidem conjungi possunt, quia unus sufficit testis, sufficit Sp. Sanctus, sufficiunt istæ 3. personæ Trinitatis, vel conjuncti inter se invicem, vel seorsim producti, quia unaquæque harum personarum est supremus atque æternus Deus. Sufficiunt etiam sancti angeli tanquam

quam testes, quia ita sunt confirmati in veritate, ut decipere non possint. Coniunguntur aliquando in Scripturis Deus & Spiritus Sanctus, nulla mentione factâ vel Patris vel Filii Dei. 1 Chron. XXVIII. 12. *Tradidit David structuram omnium, quae penes eum erant per Spiritum de atriis domus Iehova & de omnibus domibus circumquaque.* Aliàs commemoratur Filius & Sp. Sanctus nullâ mentione factâ Patris. Sic Matth. XII. 32. *Quisquis locutus fuerit adversus Filium hominis remittetur ei: quisquis autem locutus fuerit adversus Spiritum Sanctum, non remittetur ei, neque in hoc seculo, neque in futuro.* Rom. XV. 30. *Precor autem vos, fratres, per Dominum nostrum Iesum Christum & per charitatem Spiritus, ut mecum certetis pro me apud Deum precibus.* An verò inde conficietur, non posse hominem loqui adversus Patrem, vel precandum esse tantum Iesum Christum & Sp. Sanctum, non etiam Patrem? Plura afferri possent, sed hæc impræsentiarum sufficiunt ad denudandam imbecillitatem istius argumenti. Legat Auctor Problematis epistolam Athanasii ad Serapionem, & videbit hoc suum argumentum ante aliquot secula jam esse elilum. Testes esse angelos non negamus, nec id opus erat probari ex Origene

gene vel quisquis est auctor lib. i. in Jobum aliisque.

XLVII. Adducit tamen p. 17. caput ad Hebr. 12. vers. 21, 22, 23, 24, ad quem locum observat, quòd ibi *Apostolum recenseat Deum, Spiritum & Iesum, vel omnes cum quibus communionem habeamus, inter quos tamen nulla mentio injicitur & nò patet ipsum Spiritus Sancti*, atque inde colligit, *videri ipsum intelligendum per civitatem Dei viventis, Hierusalem cœlestem*. Sed supponit, necessario isto in loco debuisse mentionem fieri Spiritus Sancti, vel expressam vel saltem implicitam, non probat; & jam antea robur istius argumenti elisum fuit. Sic qui pugnat, numero pugnat locorum Scripturæ, non robore, non pondere. Nec opus est, ut si implicita mentio fiat isto in loco Sp. Sancti, ut is designetur per Hierosolyman cœlestem & per Spiritus: longè enim commodius nomine *Θεὸς ζῶν*, qui non tantum est Pater, sed tota S. S. Trinitas adeoque & Sp. Sanctus potest intelligi. Non intellexit Auctor problematis istum locum, & confundit, quæ distinctè erant considerata. Opponitur ibi monti Sinai, ad quem steterunt Judæi, accipientes tabulas fœderis & postea etiam jugum illud *ἀσθενήσαντες*, quod ferre non potuerunt, mons Sion,

Sion, adeoque Ecclesiæ illi, quæ erat sub jugo, Ecclesia N. T. quæ libertate ab illo jugo gaudet; sicque agitur de Ecclesiâ non triumphante, de quâ in seqq. fit mentio, sed de Ecclesiâ militante in his terris. Agitur enim de fidelibus conversis, quos alloquitur Apostolus, qui, dum vivebant, dicuntur accessisse ad montem Sion & Hierosolymam cœlestem, oppositè ad montem Sinai, ad quem steterant Judæi. Hæc dicitur Ecclesia Dei vivi, & Hierosolyma cœlestis hoc ipso nomine, quòd ab isto jugo, iisque omnibus, quæ cum illo erant conjuncta, sit liberata, & modo quodam planè cœlesti regatur: appellatur illa congregatio & Ecclesia primogenitorum, qui descripti sunt in cœlis, quâtenus significatur, Ecclesiam nunc non esse certo cuidam loco, qualis tabernaculum, templum, aut certo cuidam cœtui, ut erat Ecclesia Judaica, alligatam, ut, qui velit esse membrum Ecclesiæ, debeat cum illâ Ecclesiâ necessariò habere communionem externam in ritibus & ceremoniis, adeoque servitute umbrarum, sed eam nunc esse universalem & comprehendere cœtum primogenitorum Dei, eorum nempe fidelium, qui, cum sub N. T. vivant, majoribus privilegiis fruuntur, quàm illi, qui olim vivebant
sub

sub Veteri. Hæc est Ecclesia Dei in his terris degens, quæ non confundenda est, uti fit ab Auctore, cum angelis, quippe quæ expressè distinguitur à myriadibus angelorum, nec etiam confundenda est cum Ecclesiâ triumphante in cælis, quam denotat per πνεύματα δικαίων τετελειωμένων *Spiritus iustorum consummatorum*, qui consummati dicuntur, sed sine nobis Heb. XI. 40. Probet igitur Auctor problematis, Spiritus illos esse angelos, probet civitatem Dei viventis, Hierusalem cœlestem, esse cætum angelorum, (quod si fecerit, eâdem operâ probaverit Apostolum confundere ea, quæ quàm maximè voluit distincta,) probet debere hîc mentionem fieri Spiritus Sancti, probet non posse eum intelligi sub nomine Dei viventis; sic his omnibus evictis, quorum nullum probare vel tentavit, confecerit demum suum institutum.

XLVIII. Sed ille maluit locorum Scripturæ multitudine obruere lectorem, quæ pro lubitu explicat citra ullam adjectam suæ explicationis rationem. Supposito igitur, quod Heb. XII. 22. per Hierosolimam cœlestem intelligantur angeli in cœlis, similiter explicat alia loca, quæ de eâdem loquuntur, nullâ tamen probatio-
ne

ne adjectâ. Sic inquit: *Id ipsum verò confirmatur ex Apoc. 3. 12. ubi Christus dicit; Scribam super eum nomen Dei mei (id est, Patris) & nomen civitatis Dei mei, novæ Hierusalem, quæ descendit de cælo à Deo meo (id est, Spiritus Sancti, qui procedit ex Deo, & descendit de cælo) & nomen meum novum (id est, Filii Dei Jesu Christi) & ex Apoc. 22. 23. ubi legitur: Dominus Deus Omnipotens templum illius (Hierosolymæ) est, & Apoc. 22. 3. Sedes Dei & Agni in illa (Hierosolymâ) erit.* Promittitur Apoc. III. 12. vincenti, inter alia, quòd Deus sit ipsi inscripturus nomen civitatis Dei; novæ Hierosolymæ, quæ descendit ex cælis. Quid quæso hoc erit, si per Hierosolymam illam sint intelligendi Angeli? An ergo sumus denominandi ab angelis? an sumus angelorum? an non illi sunt οὐράνιοι nostri? an ergo denominabimur à nostris οὐράνιοις? an verò dicemus, propterea nomen angelorum sive Hierosolymæ cœlestis nobis esse imponendum, quia simus nos futuri angelorum socii in cœlesti beatitudine? hoc fortè voluerit designare Auctor problematis; sin minus, non capio, quomodo possit explicare, vincenti inscribendum nomen multitudinis angelorum. At, si illud vo-

K

luisse

luisset designare Sp. S., dixisset potius, illum, cui sit inscripturus nomen civitatis Dei, adscensurum ad Hierosolymam cœlestem, quam ut illa dicatur descendere de cœlo. Hoc significat, vincentem mansurum in terris, & sic in terris manentem communionem habiturum cum illâ Hierosolymâ cœlesti, hocque præmium habiturum in terris: at fidelis manens in terris & subiectus miseriis hujus vitæ non potest fieri socius angelorum in cœlesti beatitudine. Necessariò igitur est intelligenda illa *Hierosolyma, quæ est mater nostrum omnium* Gal. IV. 26. At illam matrem dicit liberam, quæ opponitur servæ, quæ peperit liberos ad servitutem. Duæ autem istæ matres sunt duo testamenta vers. 24. sive, duæ testamenti divini, quod promulgatum est Abrahamo, partes, in quo videre licet duplex semen assignatum Abrahamo, alterum carnis, alterum promissionis; ad illud pertinebant, qui ex lumbis Abrahami prodierunt, postquam sub servitute legis rituum fuerunt constituti, ad hoc omnes familiæ terræ, sive, omnes credentes; unde & Abraham Pater credentium fuit dictus. Istiusmodi mater nostrum sunt illi, qui non fuerunt sub iugo, cujusmodi fuerunt Patres, qui vixerunt ante legem latam in monte Sinai; hi steriles

les fuerunt toto tempore, quo duravit lex servitutis; qui enim sub hâc periodo nati fuerunt, fuerunt sub servitute: postquam autem Ecclesia N. T. libera facta est, dicuntur fideles N. T. genuisse illi Patres, qui nunquam sub servitute fuerant & quorum Spiritus consummati erant in cœlis, quia cum his habuerunt fideles N. T. maiorem similitudinem, quàm cum iis, qui sub iugo fuerunt; non ergo horum, sed illorum filii appellantur. Hæc ex cap. ad Gal. IV. & Es. LIV. constant, & facile plenius deduci & confirmari possent. Sic descensus ille è cœlo designat istam communionem in libertate, quâtenus sic suo sensu & modo fit unum cœlum ex fidelibus in terrâ viventibus, quorum Spiritus sunt in cœlis, dum in libertate communicant. Sic de angelis non potest cogitari, nec *descendere è cœlu*, quod angelis alibi tribuitur, debet confundi cum Sp. S. processione ex Deo. Ille sic procedit à Patre & Filio, ut sit Spiritus veritatis, qui nos ducat in omnem veritatem, tanquam auctor omnis veritatis, quod de angelis non potest dici; qui ipsimet ex Ecclesiâ debent cognoscere quasdam veritates, uti superius est evictum. Ille sic mittendus erat à Patre in nomine Filii, ut Apostolos doceret omnia, & in memoriam iis revocaret,

caret, quæ dixerat Servator Joh. XIV. 26. quod in angelos cadere nequit, qui ut doctores Apostolorum nullibi constituuntur. Nee intelligi potest, quomodo angeli arguerint mundum de peccato, de justitiâ & de judicio, quod facturum esse Sp. Sanctum prædixerat Christus Joh. xvi. 8. Quæ citat ex Philone & aliunde p. 18. ad probandum, quòd inter cœlestes Spiritus sit quædam politia, ea prætermittimus, cùm id non sit in controversiâ, sed an in locis ab ipso adductis per Hierosolymam cœlestem denotetur multitudo angelorum?

XLIX. Sed ad hoc probandum regreditur ad Heb. xii. dicens: *At civitas Hierosolyma describitur Hebr. 12. d. vers. per ἡν διὰ δυοῖν per frequentiam myriadum angelorum, quæ est Ecclesia primitivorum, qui conscripti sunt in cœlis. Et ratio est, quia civitas est multitudo seu collectio civium.* Sed de illâ confusione Auctoris, quâ ista, quæ manifestè apud Apostolum distinguuntur, commiscet, jam conquesti fuimus præced. art. quæ hîc perperam excusatur per ἡν διὰ δυοῖν, juxta quam omnia illa τρία Ἱερουσαλὴμ ἐπερὶ τοῦ, μυριάδες ἀγγέλων & παύλαις καὶ ἐκκλησία πρωτόκλων ἐν ἱερατοῖς ἀπολαύουσι, idem planè significare debent.


bent. Sic verò *παυτολογία* verbis Scripturæ affingitur, quæ à Deo sapientissimo, cujus nullum verbum excidere potest, vel frustra dictum videri debet, est inspirata. Ipsa illa vocabula in se spectata diversa inferunt. Hierusalem cœlestis quæ sit, explicatur utique ad Gal. IV. *πρωτότοκος* sunt non *primitivi*, quod vocabulum solet denotare eum, qui non est genitus, sive, qui ex alio originem non habet, sed denotat primogenitos, per quos non angeli, sed homines intelliguntur; nec enim angeli hoc nomine vocantur, sed eo appellantur homines. Mirum verò est Auctoris ratiocinium: Civitas est multitudo seu collectio civium: Ergo per eam sunt intelligendi angeli. Quidni enim ego eodem jure colligam: Civitas est multitudo seu collectio civium: Ergo per eam sunt intelligendi homines? Hinc adfert varia testimonia eorum, qui Hierosolymam cœlestem intellexerunt angelos, Hermam, Eusebium, Origenem, Clementem, Tertullianum, p. 18. & 19. de quibus non est, quòd simus solliciti, cùm non quæzatur, quid illi per Hierosolymam cœlestem intellexerint, sed quid in Scripturis per eam sit intelligendum, nec velimus negare, posse istam appellationem Hiero-

Iolympæ cœlestis usurpari de angelis, etsi negemus, eam à Scripturis sic adhibitam. *At alii Patres* (ait p. 19.) *inter quos C. Marius Victorinus Afer & Hieronymus ex Euangelio secundum Hebraeos, docuere Sp. S. esse Christi matrem & ob id* **III** *Hebraeis esse fœmininum.* Sed loca Patrum istorum non adducit, & ipse hoc deserit, unde & nos præterimus. Sed, sic pergit, *quicquid sit de istâ sententiâ (quæ fuit hæreticorum Gnosticorum & Valentinianorum hæresis, impugnans illud Ioh. cap. 1. vers. 3. per ipsum omnia facta sunt, & Coloss. 1. vers. 15. &c.)* certè *Patres prædicti & inter se & cum sacris literis non meliori ratione conciliari poterunt, quàm si statuatur, Angelos esse Spiritum Sanctum.* Sic multa movet, nihil promovet; nec possum satis mirari istum desultorium modum agendi. Dicit hoc tantùm, non ostendit, unde nec ullam mihi video impositam necessitatem Patres inter se & cum Scripturâ conciliandi, præsertim cùm nihil repugnèt, ut dicantur Patres inter se invicem aliquando sententiis dissidere, vel contradicere Scripturis. Si ille tamen clarè ostendisset, Patres eosque probatos per Hierosolymam cœlestem in illis locis Scripturæ, in quibus de eâ fit sermo, intelligere angelos, &, si de-

demonstrâset, Patres non posse conciliari cum Scripturâ aliter, nisi statuatur, Angelos esse Spiritum Sanctum, nos eam fuissemus infumturi operam, ut ad examen ista revocâsemus, à quo labore nunc video nos posse supersedere.

L. Jubet nos conferre Exod. xxiii. 20, 21. cum Esai. 63. Puto autem inde ipsum conficere velle, Angelos esse Spiritum Sanctum. Videamus, an ex collatione istorum locorum id elici queat. Exodi xxiii. 20. 21. sic habetur: *Ecce ego mitto angelum coram facie tuâ ad custodiendum te in viâ, & ad ducendum te in locum quem præparavi. Cave tibi à facie ejus & auscultia voci ejus, ne te amarum facias coram eo, nam non feret defectionem vestram, quia nomen meum est in medio ipsius.* Et Es. lxi. 9. 10. *In omni angustia eorum non coarctavit: at angelus faciei ejus servavit eos; in dilectione suâ & in clementia suâ ipse vindicabat eos, & bajulabat illos, & ferebat illos in omnibus diebus seculi. Nam ipsis rebellantibus & dolore afficientibus Spiritum Sanctitatis ejus, ipse quidem mutabatur illis in inimicum, pugnabat contra eos; addam vers. 11. Sed recordabatur dierum seculi, Moysis, populi sui, ubi qui eduxit ipsos e mari cum pastore gregis sui, ubi qui posuit in medio ejus Spiritum San-*

Ætatis sue? Sed in illis locis nulla est mentio Angelorum, Exod. xxiii. 20. 21. agitur de Angelo, in cujus medio nomen Dei dicitur esse; quo vel ipso fit manifestum, non esse Angelum creatum, sed increatum. Non est nomen Jehova in medio angeli creati, cum creatura à Creatore infinità differat distantia. Quid sit illa phrasis, nomen Jehova esse in medio alicujus, expendendum. Cogitandum autem, Deum mandare Israëlitis ut caveant sibi, ne offendant vel exacerbent angelum illum, adjectâ comminatione, quod ille angelus non sit laturus eorum defectionem, hoc est, quod sit gravissimè in eam animadversurus, idque eum facturum docet, quia nomen Dei est in medio ipsius: quæ ratio non desumitur à naturâ angelicâ in genere, sed ab eo, quod huic angelo est particulare & speciale; debet ergo angelus intelligi non quivis, sed singularis cujusdam dignitatis & excellentiæ. Nomen Dei est omne id, quod de Deo cognosci ex naturâ & credi ex revelatione potest atque debet. Hoc nomen qui usurpat temerè, dicitur illud non impunè laturus in præcepto III. Sic hîc non dicitur laturus defectionem iste angelus, in cujus medio est nomen Dei, sed in eam gravitèr animadversurus, idque propterea, quia

quia nomen Dei est in medio ipsius, quod ideo censetur temerè usurpari, si illum quis exacerbaverit. Sic ergò intelligitur, contra Deum immediatè peccari & temerè Dei nomen usurpari, quando peccatur contra illum angelum. Oportet igitur illum angelum esse Deum. Quod & ipsa illa phrasis, *nomen Dei esse in medio ipsius*, videtur inferre. In medio alicujus esse est intimè esse cum illo conjunctum, quod pro diversâ subjectâ materiâ diversimodè debet applicari. Christus de se dicit Pl. XL. vers. 8. *Lex tua est in medio*  *viscerum meorum,* quòd illa quasi ad substantiam suam pertineat, atque ita firmissimè cordi suo inhæreat. Sed quando nomen Dei dicitur esse in medio illius angeli, docetur, id omne, quod de Deo cognosci & credi potest, esse in ipso, adeoque etiam justitiam Dei, propter quam fiat, ut non possit impunitum relinquere eum, qui se exacerbaverit. Quæ exacerbatio singulare quoddam peccati genus videtur designare, quale nempe est blasphemia in Spiritum Sanctum & impœnitentia finalis ac finalis apostasia à Deo. Hoc est sumere peccatorem nomen Dei in vanum. Confer Pl. L. 16. 17. ubi improbo exprobratur, quòd *scelus Dei sumat in os suum & projiciat verba Dei post*
K 5 *se.*

¶ 54 *Causa Spiritus Sancti.*

se. Hoc est peccatum hypocriseos, quando quis præ se fert Dei cultum, & profitetur veram religionem, sed præcepta Dei contemnit. Et sanè hic Angelus manifestè distinguitur ab eo, quem Moses deprecatur à Deo ne mittat, estque ille idem cum Dei facie; unde & Es. L X I I I. angelus Dei faciei appellatur, sicut mox videbimus. Et observandum, quòd, postquam Israëlitarum irritum fecissent fœdus Dei faciendo sibi vitulum eique se incurvando sacrificantes Exod. x x x I I. 7. 8. Deus jusserit, ut *Moses deduceret populum*, & promiserit simpliciter, *angelum suum præiturum*, sicut & cap. x x x I I I. 1. 2. de eo dicitur, quòd sit *expulsurus Canaanæum, Emoræum & reliquas gentes*; quibus verbis creatum tantum angelum designabat, nihil ipsi divini tribuendo; cumque id agnosceret Moses, sic Deum allocutus fuerit cap. x x x I I I. 12. 13. *Vide tu dicis ad me, deduc populum istum, & tu non notum facis mihi, quem missurus sis mecum, tu tamen dixisti, agnosco te nomine tuo, atque etiam invenisti gratiam in oculis meis. Nunc ergo, si modo inveni gratiam in oculis tuis, indica mihi quæso vias tuas & agnoscam te ut inveniam gratiam in oculis tuis: considera etiam gentem hanc populum tuum esse.* Quibus verbis cum prioribus collatis videtur signi-

significari, quòd Deus mittendo angelum aliquem, quem non opus sit cognoscere, nisi quòd sit angelus ministrans Deo & iussa ipsius exsequens, non possit videri sic gratiolè agere cum Mose, contra quàm promiserat, nec etiam vias suas patefaciat, quod se facturum antehàc promiserat, mittendo Angelum eum, in cuius medio sit nomen Jehova, quod nomen qui cognoscit, vias Dei cognoscit; petit igitur ut Deus cogitet, hunc populum esse populum suum, cum quo fœdus pepigerit gratiæ, adeoque sic agat cum eo ut decet Deum fœderatum, quem decet mittere eum, per quem se revelet tanquam Deum istius populi, adeoque non sic agat cum populo suo, quemadmodum cum aliis populis agere consuevit, coram quibus alios populos expellit, ita ut per quem hoc-faciat ignorent, neque unà cum isto beneficio habeant conjunctum beneficium cognitionis Dei. Ad hæc verò cum Deus respondisset, vers. 14. *faciem suam ituram cum ipsis, & se quietem illis daturum*, hoc procul dubio idem est, ac si repetiisset illam promissionem Exod. 23: 20, 21, quòd angelus ille sit iturus cum ipsis, in cuius medio est nomen Jehovæ, qui Es. LXIII. dicitur Angelus faciei Dei, quem qui videt, videt

videt Deum, quoniam est unum cum Deo. Non potest ergo Angelus ille esse angelus creatus. Idem verò est, uti jam ostensum, cum eo, qui Es. L XIII. dicitur angelus faciei Dei; neque ullâ ratione existimandum, quòd Angelus faciei sit Spiritus Sanctitatis Dei, de quo vers. 9. et si Es. 63: 9. is dicatur exacerbari, sicut & Exodi 23: 21. Angelus ille, in cujus medio est nomen Jehova, dicitur exacerbari posse, quo argumento conjicio niti Problematis auctorem; hoc enim cadere potest in qualvis S. S. Trinitatis personas. Nec tamen hoc concessio sequeretur, Sp. Sanctum esse angelos in pluralivo numero, cùm de uno angelo in singulari numero sit mentio.

LI. Sequitur nunc alia classis locorum, in quibus unâ cum Patre & Filio angelorum fit mentio, quos purat per septem Spiritus designari. *Loca illa sunt Apoc. I. 4. Gratia vobis & pax à Deo, qui est, & qui erat, & qui venturus est; & à septem Spiritibus, qui sunt coram throno ejus, & à Jesu Christo.* Similiter & septem Spirituum fit mentio c. IV. 5. & V. 6. Hinc argumentum diversis modis videtur stringere velle. Idque primùm sub personâ Fr. Riberæ, Blasii Viegæ & Corn. à Lapide, qui agnoscant *nè stare coram throno* more loquendi

di Scripturæ esse subditorum & ministrorum, qui adstant parati ad capeſſenda exequendaque juſſa ejus, cujus in conſpectu ſtant, quique ideo per *ſeptem Spiritus* h. l. intelligant *angelos ſeptem* magnos, primarios, ſupremos Spiritus, vel archangelos principes aulae cœleſtis & inter cœteros dignitate excellentes, divinae providentiæ circa eccleſiæ gubernationem miniſtros &c. p. 19. 20. Cum his dicit conſentire Irenæum, Clementem Alexandrinum, Juſtinum, Origenem, Cyprianum, Auctorem Operis Imperfecti in Matthæum. His ſubjungit Salmeronem, Suarezium, alios Pontificios Doctores. Nos, quid Ribera, Blaſius, alii Pontificii Doctores hoc in negotio ſentiant, parum movet; nec etiam video, quare multum debeamus hîc affici auctoritate Patrum quorundam diſſidentium tûm à ſe invicem tûm ab aliis, uti ipſe conſitetur *Auctor problematis*, dum dicit p. 22. *Per ſeptem Spiritus loco Apoc. cap. 1.4. Spiritum Sanctum intellectum volunt Juſtinus, Origenes, Victorinus, Beda, Eucherius, Ioachim Abbas, Rupertus Tuitienſis, Anſbertus, Haymo, Primafius, Aretas, Catharinus, Wiſelius, Antiochus Brondus, Perrerius, Gagnejus, Alfenuſus, Conradus,*
qui

qui posteriores Pontificii sunt Doctores. Meum otium non fert, nec operæ pretium esse videtur auctores citatos introspicere, cum nihil utilitatis hic ad lectorem redire posse videatur. Sed phrasin urget cum Pontificiis, quæ in loco illo non reperitur, neque enim ibi lego, Spiritus illos *stare coram throno*, sed, *esse coram throno*: ὅτι ἐστὶν ἐνώπιον τοῦ θρόνου αὐτοῦ. Coram throno Salomonis etiam regina Sabæ esse potuit, quæ tamen non stetit coram throno, eo saltem sensu, quo istud stare coram Rege vel throno regis significat illi ministrare, quo sensu angeli dicuntur alibi in scripturis coram throno Dei vel coram Deo stare. Patri appropriatur nomen Dei, quod *ex ipso sunt omnia* 1 Cor. VIII. 6. *Nobis unus Deus Pater, ex quo omnia, & nos ad ipsum.* Nam ex Patre etiam Filius est, per æternam generationem, & Sp. Sanctus, per æternam inspirationem. Et sanè, ut per septem Spiritus intelligantur hîc angeli, non permittit formula illa precatationis, quæ reperitur isto in loco. Precatur enim Johannes gratiam & pacem non minus à septem illis Spiritibus, ac à Iesu Christo & à Deo Patre, qui dicitur ὁ ἀνὴρ, καὶ ὁ υἱός, καὶ ὁ πνεῦμα. Atqui non possumus precari gratiam, nisi ab eo, qui est

est auctor gratiæ, qui solus est Pater ille lumininum Jac. I. 17. frustra enim precaremur ab eo, qui non habet. Et ejusmodi precatio est invocatio, & cultus religiosus, quem angeli creati noluerunt suscipere à Johanne. Septem ergo illi Spiritus dicuntur Sp. Sanctus, qui hîc convenienter admodum stylo prophetico, qui ex variis tropis & figuris est confectus; sub nomine septem Spirituum introducit, ut vel numerus certus & definitus sumatur pro numero incerto & indefinito, vel intelligatur septiformis gratia Spiritus Sancti. Et non malè Grotius hîc observat: *Sed rectè omnia qui expendet, & conferet locum, qui infra 5, 6. ubi itidem Spiritus dicuntur oculi Dei, per quos oculos diximus in Zach. 4. 10 significari multiformem Dei providentiam, è potius feretur, ut hîc existimet denotari septem illa velut membra divina providentiæ, qua nominantur infra 5, 12. & 7, 12. Et sic erit in diâ duor. Optatur enim pax à Deo & septem Spiritibus i. à Deo per septem hos modos operante. Firmat hanc interpretationem, quòd infra cap. 5. distinguuntur Spiritus & angeli. Similia habet Paræus: Septenario igitur perfectionis numero loquitur de uno Spiritu Sancto vel communi metalepsi effectorum pro causâ effundente septem,*

septem, hoc est, multifaria dona in Ecclesiam; vel quia B. Iohannes gratiam precatur septem Ecclesiis, quibus singulis unum eundemque Spiritum Sanctum, quasi septem in solidum tribuit.

LII. Videtur deinde ex aliis locis Scripturæ probare velle, quòd per 7. Spiritus in Apocalypsi sint intelligendi angeli, pag. 20. nempe ex *Tobia* 12, 16. ubi dicuntur septem angeli, quorum è numero *Raphael* etiam angelus dicitur, cap. 5. 4. 5. Atqui hic auctor Apocryphus apud nos non magnæ admodum est auctoritatis, ita ut quod habet de 7. Angelis assistentibus, è quorum numero dicit esse *Raphaëlem*, possit videri pretitum ex somniis Judæorum. Et tantum abest ut hic locus nos moveat, ut vel ex hoc ipso loco auctorem ejus libri convincamus falsitatis. Ita enim Junius: *Si unus hic locus exstaret ad revincendam libri istius impuritatem, mihi quidem satis futurus esset; nihil enim profecto in toto orbe terrarum magicum dici potest, aut hoc ex principiis magia petatum est, quorum doctores primarii ex Indiâ & Bactrianâ profecti cum Iudæis suum virus commutarunt. Nam statuunt illi angelos horarios, diarios, & alios cæli regionibus attributos, principes, ministros &c. ex quibus Zoroastres Bactrianus,*
Me-

Menastor Indus & alii scelerum concinnatores suas magia observationes elaboraverunt. Atque hoc quidem vitio Iudæos fuisse non mediocriter inquinatos ostendit Epiphanius tomo 1. Panarii, ubi de Phariseis agit; & ipsorum quoque libri diurnæque observationes testantur, quibus diem Solis Raphaëli, diem Luna Gabriëli, diem Martis Sammaëli, diem Mercurii Micaëli, diem Iovis Izidkiëli, diem Veneris Hanaëli, diem Sabbati Kephariëli tribuunt, eosque dominos statuunt totius administrationis in diem illum necessaria. Quamobrem ita statuimus, qui ex hoc libro veritatem petunt, aut se confirmaturos putant, eos perinde facere, atque si molem gravissimam statuminare velint arundine. Tribuit enim Angelis honorem soli Christo debitum, cujus unius est, Deo hominum preces offerre, cum Deus eas gratas & acceptas habeat hoc unico & solo intercedente & mediante. Est enim solus sacerdos noster in æternum, qui semper apparet coram facie Patris pro nobis interpellans.

LIII. Sed relicto loco Apocrypho, consideremus potius, si quæ ex Canonicis scripturis producit ad stabiliendam suam sententiam, quâ vult Apoc. I. 4. *per Septem Spiritus, qui sunt coram throno, intelligi angelos.*

L

gelos. *Apoc.* 4. inquit, *memorantur septem lampades c. 3. septem stellæ angeli sunt septem c. 8. 2. 6. seqq.* Vidi septem angelos stantes in conspectu Dei, & datæ sunt illis septem tubæ; & septem angeli, qui habebant septem tubas, præparaverunt se ut tubâ canerent &c. *Conf. cap. 15, 16, 17, 21. Zachar. cap. 3: 8. 4: 7. & Apoc. 5: 6. Oculi septem sunt Domini qui discurrunt in universam terram, vel Oculi septem sunt septem Spiritus.* Ex his locis quidam sunt paralleli loco *Apoc. I. 4.* de quo controvertitur, alii nullo modo. Paralleli sunt *Apoc. IV. 5.* ubi *septem lampades ignis dicuntur ardentes coram throno, quæ septem sunt Spiritus Dei,* item *Zach. IV. 6.* ubi dicitur, quod Zerubabel sit perfecturus domum Dei, *non strenuitate, neque vi, sed per Spiritum Dei,* & *Apoc. V. 6.* Sed his omnibus in locis non est sermo de angelis, sed de Spiritu Sancto, cujus septiformis gratia & gubernatio pro ratione septem Ecclesiarum hîc describitur. At reliqui loci paralleli non sunt. *Cap. III. Apoc.* Angeli septem sunt Ecclesiarum istarum gubernatores, adeoque homines. *Apoc. VII. 2.* agitur de septem angelis, quibus datæ sunt 7. tubæ, qui dicuntur stare coram throno, per quos
non

non necesse est septem illos Spiritus intelligere, de quibus Apoc. I. 4. cùm possit id sumi de septem modis executionis iudiciorum divinatorum, possint etiam intelligi angeli septem creati. Capp. 15, 16, 17, 21. de illis ipsis angelis agunt, sed ut habentibus septem plagas Dei. Et quoniam Cap. XXI. 9. unus ex illis angelis locutus dicitur Johanni, videtur probabilius fore, si per illos septem angelos intelligamus illa πνεύματα λειτουργικά, quorum operâ Deus sua judicia exsequi paravit. Zach. III. versu; non 8, sed 9. dicitur: *In lapidem unum septem sunt oculi*, quod nihil facit ad præiens negotium. Agitur de Christo manifestando mundo, qui *Lapis* hîc dicitur, sicut & Ps. CXV III. 22. & Daniel. II. 24. In eum dicuntur conversuri se septem oculi, hoc est septiformis illa Ecclesia Novi Testamenti, cui ipse est revelandus. Sunt ergo hi oculi alii ab illis septem oculis, de quibus sermo est Apoc. V. Sed Auctor problematis loca, quæ citavit, non explicat nec urget. Citat tantùm auctores p. 21. dicitque, quomodo illi ista loca intelligant, & interpretentur, qui tamen inter se invicem non in omnibus conveniunt. Unde nescio, quo scopo illos adducat: si enim eorum

auctoritate consentiente velit suam sententiam confirmare, de consensu prius debebat constare; nec tamen consensu hoc sententia ejus reverâ stabiliretur, cum pro nostrâ sententiâ contrarius consensus ab ipso p. 22. agnoscatur, quod & supra jam observavimus. Huc verò omnia, quæ usque ad 23. paginam ab illo urgentur, videntur facere, quòd, *si per Sp. Sanctum intelligantur angeli, facillimè omnes prædicti auctores conciliabuntur: imò eandem veritatem omnes dicere deprehendentur, qui nunc extremè dissidentes sententias tueri videntur; quasi necessarium sit conciliari semper dissidentes inter se scriptores, & quasi possint conciliari auctores, qui contradictoria loquuntur; Protestantes enim omnes exceptis paucissimis, quos inter auctores dissidentes refert, per Sp.S. intelligunt tertiam Trinitatis personam, eundem essentiâ & naturâ Deum cum Patre & Filio, at qui angelos intelligunt, utique non per eos intelligunt Deum supremum & æternum. Mirum est, si sic inter me & se conciliationem non sit impofterum instituturus. Proponit porrò §. 6. testimonia ex antiquissimis quibusque Ecclesia doctoribus collecta, qui post Patrem & Filium omissio nomine Spiritus Sancti non raro memorent angelos:*

los : sed irritò conatu & effectu. Nos enim in antecedentibus evicimus , non posse ex illis scripturæ locis demonstrari, Sp. S. & Angelos pro iisdem esse habendos. Omittimus igitur horum testimoniorum examen , cùm parum ad rem nostram faciant illa, sicque illa non inspecta planè præterimus, nisi quod non possimus sicco pede transire Macarium. 1^a homil. 26. non longè à fine docet, in civitate sanctorum esse regem & Deum Iesum, tyrannum verò Satanam, & velle Deum & angelos ejus habitare in regno, similiter & diabolum & angelos ejus velle eum secum habitare. Nec mentionem facit Patris, sed tantùm Jesu, quem Deum & regem appellat, non à Deo distinguit, & angelorum ejus, item diaboli & angelorum ejus. Miror ergo quò tendat illa exclamatio Auctoris Problematis: *En Trinitatem!* cùm tantùm unius Jesu & angelorum ejus faciat mentionem. Et injuriam facit Macario, qui illum dicit per angelos intellexisse Sp. S., cùm passim in homiliis doceat, quòd glorificandus sit Pater, Filius & Spiritus Sanctus; vide finem homiliæ 3. Δοξάζωμιν πατέρα καὶ υἱὸν καὶ ἄγιον πνεῦμα εἰς τὰς αἰῶνας, ἀμήν. & homil. 6. πρὶ δὲ τῷ ἐκδύματι ὃ φορεῖσιν οἱ χριστιανοὶ, δηλονότι αὐτὸ τὸ πνεῦμα ἀμφοτέρω αὐτὸς εἰς τὸ ὄνομα τῷ πατρὶ καὶ

ὁ ἢ ὅς τις ἢ ἀπὸ τοῦ αἵματος, ἀπὸ.
 Et Auctor Problematis miram Trinitatem fingit inter eos, qui totâ naturâ differunt, ita ut Angeli tertiam personam S. S. Trinitatis juxta ipsum constituent, quâ ratione vel Creator in eundem ordinem cum creaturis redigitur, vel creaturæ finitæ in dignitatem & excellentiam divinam summâ cum Creatoris injuriâ eleventur.

LIV. Sequitur §. 7. novum idque IV. argumentum ad probandum, Sp. S. denotare Angelorum genus, quod sumit ex Apoc. xxi. 1. *Ostendit mihi purum fluvium aquæ vitæ, splendidum tanquam crystallum, procedentem de Sede Dei & Agni.* Per illum probat p. 29, 30. aliquot argumentis, esse intelligendum Spiritum Sanctum, de quo Orthodoxi non dubitant, sed non admittunt, quod per flumen istud etiam sancti Angeli indicentur, quod sibi *verissimile videri* dicit: Probat istud 1. quia pluraliter dicuntur flumina aquæ vivæ Iob. 7: 38. Es. 44: 3. Eccles. 24: 31. pluraliter etiam dicuntur aquæ vivæ civitatis Hierusalem Zach. 14: 8. Es. 44: 3. Apoc 7: 17. Hinc concludi posse videtur Flumen purum aquæ vitæ constare ex multitudine Spirituum Sanctorum. Sed hæc probatio non differt à primo argumento, quod refutavimus §. 40. ubi etiam

etiam eundem locum Joh. vii. 38, adduxerat, quem ibidem explicuimus de Sp. Sancti donis, quæ in mentibus hominum efficit & producit, ut mirandum sit, hunc Auctorem toties eâdem voluisse oberrare chordâ. Nullo vero modo probabile est, *flumina aqua viva*, quæ dicuntur *fluere ex ventre eius*, qui crediderit in Christum, denotare angelos, cum id nullâ ratione queat intelligi. Sic ergo dicendum, ex ipso tanquam ex fonte prodituros angelos, id enim infert vis phræseos, *flumina ex ventre alicujus fluere*; quod si admittas, dicendum foret, credentes habere auctoritatem in angelos, ut eos possint mittere, quò voluerint. At commodè intelligitur, si explicetur de donis illis, quæ collata sunt credentibus in usum & ædificationem Ecclesiæ. Qui enim credebant in Christum, illi accipiebant ea Sp. S. dona, quæ ex iis erant redundatura ad usum aliorum & ædificationem, quâtenus illis donis erant instruendi & sic ad Christum adducendi; quò faciebant donum linguarum, donum sanationum & imprimis donum prophetiæ. Locus Es. 44: 3. etiam antehâc adductus fuit & visus à nobis 9. 40. Eccles. 24: 31. præterquam quod sit auctoris apocryphi, Sapientia sic loquens introducit: *Irrigabo*

hortum & inebriabo areolam & ecce facta est mihi fossa in fluvium, & fluvius factus mihi est in mare. Quibus verbis nihil aliud designatur, quàm quòd Sapientia illa fructus produxerit plurimos ex horto suo, maximo proventu & augmento, quæ nihil attinent ad angelos. Zach. XIV. 8. *Et erit in die illo, exhibunt aqua viva ex Hierosolyma: media pars illarum ad mare anterius, & media pars illarum ad mare posterius. Æstate & hyeme id fiet;* quæ iterum de donis Sp. S. in ecclesiam effundendis, quæ in ubertate agnitionis Dei, fidei, charitatis consistunt, intelligi debent, ut nihil attineat hîc de angelis somniare. Et absurdius adhuc Apoc. 7: 17. ad angelos trahitur: *Agnus, qui est in medio throni pascet & ducet eos ad vivos fontes aquarum, & absterget Deus omnem lacrymam ab oculis eorum.* Nam ducuntur ad pascum, de quibus hîc est sermo, ducuntur ad refectionem, quæ fit cibo & potu, adeoque agitur de cibo & potu Spirituali, quem esse angelos ex analogiâ formularum loquendi in scripturis receptarum dici non potest. Christus suum cibum dicit, *facere voluntatem Patris sui*, hic etiam noster cibus est; hæc autem est voluntas Dei, quam à nobis vult præstari, ut Christo tanquam capiti nostro constantè & indivulso nexu adhæ-

rea-

reamus, quod dum facimus, ab illo pascimur
& potamur ad vitam æternam.

LV. Probat *id 2. auctoritate Origenis*, quem insigni cumulat laude, dicitque, illum per *flumina aqua viva* *Iob. 7: 38. manifestè interpretari Angelicas virtutes* *Homil. 17. Num.* Quæ qui contulerit cum iis, quæ hîc Origenes habet, mirabitur certè hujus hominis præcipitantiam, quâ, verbis auctorum obiter & cursim fortè inspectis, ausus est illis sententias attribuere, de quibus non cogitârunt. Sic habent verba Origenis in medio ferè istius homiliæ, *Isti enim Paradisi super flumina similes & cognati sunt illi Paradiso, in quo lignum vitæ est. Flumina verò possumus vel scripturas euangelicas atque Apostolicas accipere, vel etiam angelorum, vel cœlestium virtutum erga hujusmodi animas adjutoria: rigantur enim ab illis & circumdantur, atque ad omnem scientiam & agnitionem rerum cœlestium nutriuntur.* Manifestum est, ipsum in his loqui de fluminibus paradisi, illa tamen dubitanter explicare vel de Scripturis, vel de adjutoriis angelorum & cœlestium virtutum. At locum *Iob. 7. in seqq.* aliter & in oppositione ad hæc explicat in iis, quæ immediatè sequuntur. *Quamvis & Salvator noster fluvius sit qui latificat civitatem Dei & Spiritus Sanctus*

Et non solum ipse fluvius sit, sed & iis, quibus datus fuerit, flumina de ventre eorum procedant, & Deus Pater dicat, me dereliquerunt fontem aqua viva, ex quo scilicet fonte ista flumina procedunt. His igitur inundata fluminibus tabernacula Israël fiunt tabernacula, sicut sunt illa, quae fixit Dominus. Ex quibus apparet, flumina Paradisi illi varia significare, Scripturas, angelorum adiutoria, item Deum Patrem, ut & Spiritum Sanctum, quae omnia ut diversa & distincta proponit. Nullibi verò dicit, vel angelos esse flumina, multo minus Joh. 7. per flumina intelligi angelos. At inquit Auctor problematis: Quia verò Iohannes d. l. aperte de fluminibus istis aqua viva dicit, Hoc autem dixit de Spiritu, quem accepturi erant credentes in eum; inde mihi videtur luce meridianâ clarius Origenem sensisse, οὐρανὸν predicari Spiritum Sanctum & Angelicas virtutes. Quae adhuc meam admirationem augent. Quomodo enim luce meridianâ clarius esse potest, eadem esse illa apud Origenem, quae Origenes ut diversa observat? Putavit Origenes, uti ex ipsius commentariis observare licet, Scripturam plures habere sensus mysticos, idque hic applicat fluminibus Paradisi, diversos eorum sensus adducens: nisi ergo quis

quis putaverit, *diversa esse eadem*, adeoque, *diversa non esse diversa*, non poterit dicere, Origenem sensisse, *οὐκ ἴδιον* prædicari Spiritum Sanctum & Angelicas virtutes. Quod jam adjungit Auctor pag. 32. *per aquas Gen. I. 6 7. 8. angelos intelligere multos Scriptores Ecclesiasticos*, quorum quosdam nominat, alios etiam allegat notatis locis, id cum ad præsens nostrum negotium nihil faciat quicquam, suo relinquitur loco.

LVI. Probat 3. sed eadem soliditate ut antea: *Fluvius ignis procedens ex sede Dei Daniel 7: 10. describitur per millies mille ministrantes, & myriadem myriadum stantem: & Pseudo-Dionysius Areopagita de Cal. Hierarch. c. ult. Fluvium hoc loco adaptat angelis Dei.* Attende quæso, quisquis es Auctor Problematis, & circumspice prius omnia, antequam præcipites iudicium. Daniel cap. VII. 10. distinguit planè fluvium ignis, ab illis qui stabant coram throno, à millies mille ministrantibus & à myriade myriadum stante. Quare ergo tu confundis, quæ Sp. Sanctus expressè distinguit? Sic habent verba: *Fluvius ignis manabat & exhibat ab ipso, ab eo nempe, qui dicitur* *יְהוָה קַיָּם* permanens dierum, *millies milleni serviebant ei, & myrias myriadum*
fla

stabant coram eo. Quidni ergo potius per fluvium ignis intelligamus Spiritum Sanctum, qui procedit à Patre & à Filio, planè contradistinctum ab angelis, qui dicuntur ei servire? vel, si id nolueris, interpretemur fluvium ignis non de aliquâ substantiâ, sed de actione Dei, de executione judiciorum Dei, quæ sunt instar fluvii ignis, quæ omnia prosternunt & rapiunt, ita ut nulla vis eis resistere possit, & quæ Deus sæpe exsequitur per angelos, qui ipsi ministrant. Sed videtur Auctor ille prius excogitâsse illam opinionem, quòd per Sp. Sanctum in Scripturis possint intelligi angeli, eam sic inventam valdè amâsse eâque delectatum, hocque amore raptum quævis quæsisse, quæ quovis modo videri possent factura ad eam stabi-
liendam, cujus varia jam in antecedentibus vidimus specimina & postea videbimus. Sic hîc arripit dictum auctoris, quem ipse Pseudo-Dionysium Areopagitam agnoscit, cujus propterea non magna potest esse auctoritas, quem vix videtur expendisse, cùm verba ipsius hanc sententiam nihil juvent. Sic ille cap. ult. de cœlesti hierarchiâ §. 9. *Considerandum modo quid sibi velint flumina, rota ac currus, quæ cœlestibus essentiis* (per quas procul dubio
an-

angelos designat) adjuncta perhibentur. *Ac flumina quidem ignea divinos illos latices significant, largissimam illis ac perennem inundationis copiam suppeditantes, vitalisque fecunditatis altores.* Quæ sic explicat Pachymeres ejus Paraphrastes: *Ignæ proinde flumina divinos rivos declarant, quæ largum perennemque fluxum cœlestibus virtutibus suppeditant. Cum autem ignis sit vivificus, non quidem in quantum ignis est, sed in quantum calidus & nutritivus existit, divini quoque ætus istiusmodi atque inundationes vivificant simul ac nutriunt fecunditatem angelorum.* Considerat flumina ignea tanquam adjuncta cœlestibus essentiis si-
ve angelis, & quidem talia, quæ vitalem eorum fecunditatem alant: distinguit ergo planè ab angelis, sicut is qui rem conservat ab ipsâ re conservatâ distingui solet. Videtur ergo per illa flumina ignea denotare vim Spiritus Sancti angelos conservantem, ipsisque vires ad agendum sufficientes suppeditantem.

LVII. Probat 4. ex testimonio Titi Bostrensis 3. contra Manichæos: *Quid commune est Spiritibus cum fluminibus? quis angelus, quæ virtus, quæ dominatio, quis principatus, quæ potestas ad lavacrum descendit, & aquas experta est? Quod si neque*
po:

*pateſtas, neque thronus in aquas deſcendit, his ſubjicit Auctor problematis vocem &c. unde fit ut Lector ſenſum Titi non poſſit cognoscere. Ego verò ubi inſpexi Titum illum & verba ejus reperi in fine libri, neſcivi an impudentiam Auctoris, an ſupinam incogitantiam ejusdem potius accuſarem, qui citare auſus eſt pro ſua ſententiâ verba, quæ nihil minus docent, quàm hoc ipſum cujus rei gratiâ ea producit. Diſputat Titus hoc in loco contra Manichæos, quibus adſcribit, quod dicant: *Hominem à diabolo formatum, atque animam quidem à Deo, eſſe tamen corpori à diabolo aptatam, & factum hominem, qui ſubſtantiam quidem corporis ex ſubſtantiâ diaboli acceperit, ſubſtantiam verò animæ tanquam ſpolium & exuvias ex Deo ſumſerit.* Argumentum contra illos vibrat ex eo, quod ſic ſit dicendum, etiam Chriſti corpus formatum à diabolo, vel negandum, ipſum verum corpus habuiſſe. Probat autem, Chriſtum verum corpus habuiſſe, inter alia argumenta etiam ex eo, quòd in Jordane fuerit baptizatus. Sic habent verba: *Salvator autem baptiſmo etiam in Jordane abluebatur, & aquis aſpergebatur, quis erat? & quid erat? Si enim corpus non geſtabat, neque corpus habebat.* Nunc ſequuntur ea, quæ citat Auctor*

Pro-

Problematis: *Quid commune est Spiritibus cum fluminibus, quis angelus, qua virtus, qua dominatio, quis principatus, que potestas ad lavacrum descendit, & aquas experta est? quod si neque virtus neque potestas, neque thronus in aquas descendit, extra quaestionem posita est res. Ex quibus apparet manifestè cuilibet attendenti, opponi Christi corpus rebus Spiritualibus, quales sunt angeli, sive virtutis, sive dominationis &c. nominibus appellentur, adeoque Titum concludere, Christum habuisse verum corpus, eò quod fuerit baptizatus, cùm angeli & spiritus nequeant baptizari vel in aquas descendere, nixum illo communi axiomate ex naturæ lumine noto: *Tangere vel tangi nisi corpus nulla potest res.* Non ergo Titus per flumina denotavit angelos, ad quod probandum hæc verba adducuntur, sed è contrario flumina & angelos inter se quàm maximè opposuit, tanquam talia, quæ nihil inter se invicem habeant commercii. Fidamus Auctoris istius citationibus non inspectis ipsis scriptoribus, unde ea depromsit.*

LVIII. Subjungit loco probationis 5tz: *Vox procedere ἐκ τοῦ ὕδατος & etiam in sacris literis de Angelis predicatur, ut Zach. 2: 3, sic citat juxta versionem vulg. cum sit vers. 7. Et ecce an-*

angelus loquens ad me exhibat, & angelus alius exhibat obviam ei. Et dicebat ad illum, Curre, loquere ad puerum hunc. Scilicet hæc probatio procedet, 'quando argumentum affirmativum in secundâ figurâ erit legitimum; Spiritus Sanctus ἐκπορεύσθαι exit: Angeli ἐκπορεύσθαι exeunt. Ergo Angeli sunt Spiritus Sanctus. Omnis qui missus est exit ab eo à quo mittitur: At Pater mittit Filium & Spiritum S. qui proinde exeunt ab ipso; mittit etiam Pater angelos, sed alio modo ac Filium & Sp. Sanctum; hujus missionis fundamentum est æterna & ineffabilis generatio & spiratio, at illius divina jussio, quæ in tempore ipsis obvenit. Si ergo Zach. 11: 7. intelligamus cum ipso per angelos illos duos angelos creatos, apparet quàm infirmum sit istud argumentum; sin duas personas S. S. Trinitatis cum Cl. Coccejo, Filium & Sp. Sanctum, minus adhuc habebit roboris; sicque quocunque ex latere adspiciatur undique ejus fragilitas pellucebit.

LIX. Pergamus ad V. argumentum, quod §. 8. proponit, cujus vis in eo consistit: Spiritus erroris seu mendacii, Satanas, calumniator &c. collectivè sumitur pro multitudine malorum angelorum: Ergo eâdem ratione capiendæ sunt voces oppositæ,

fitæ, Spiritus veritatis, παράκλητος, Con-
 lator seu advocatus & Spiritus Sanctus.
 Adjungit loca Scripturæ, in quibus cogno-
 minationes illæ occurrunt. Adducit p. 33.
 Clement. Rom. in Constit. & Ignat. ad
 Philadelphienſes, qui tamen nihil aliud
 docent, quàm quòd Sp. Sanctum Spiritui
 malo opponant. Addit Auctor Problema-
 tis p. 34. *Reverâ videri opponi impios piis,*
ut & obsessos à Spiritu impuro Prophetis
(qui visiones viderunt) obsessis à Spiritu San-
cto. Comprobat istam oppositionem p. 34.
 35. 36. testimoniis Tertulliani, Origenis,
 Auctoris operis imperfecti, Lactantii &
 aliorum. Et p. 35. denuo repetit vim sui
 argumenti: *At Spiritus immundus multi-*
plex est in subsistentiis: Ergo & Spiritus
Sanctus. Quæ profecto milera est admo-
 dum consequentia & nullarum planè vi-
 rium. Eodem genere consequentiæ lice-
 bit quoque colligere, voces *Deus* & *Fi-*
lius Dei I. Christus esse collectivè accipien-
 das. Opponitur enim *Deus* *Diabolo*, &
Satanæ, ubi voces illæ collectivè accipi
 possunt. Sic Zach. III. 1. 2. *Et fecit me vi-*
dere Iosuum Sacerdotem maximum stantem
coram Angelo Iehova, & Satanæ stabat ad
dextram ejus ad eum infestandum: Et dixit
Iehova ad Satanam: Increpet Iehova te, Sa-

M

tanæ:

tanat: increpet, inquam, Iehovah te, qui eligit Hierosolymam. Rom. XVI. 20. Deus pacis conteret Satanam sub pedes vestros citò. Sic & opponitur Filius Dei, sive Christus, Diabolo, ubi vox illa planè collectivè accipitur 1 Joh. III. 8. Ad hoc manifestus factus est Filius Dei, ut dissolvat opera Diaboli. Sed quoniam nos antea §. 26. de hoc argumentandi modo egimus, ejusque vitia ostendimus, lectorem nostrum eò ablegamus. Tantum hîc circa testimonium Origenis observamus, quòd, cùm ille, prout citatur p. 35. Tomo 15. in Matth. reprehendat hæreticos, quòd Spiritus erroris & demonia magno Paracleti nomine appellent, satis hoc loquendi modo videatur demonstrare, se per Paracletum non intelligere creaturam, adeoque Paracletum nolle exponi collectivè sive numero multitudinis; ne nunc repetam ea, quæ in superioribus ex Origene adduximus, quibus manifestè testatur, se Spiritum Sanctum pro Deo non pro creaturâ habere.

LX. Proponit §. 9. argumentum VI. non majoris ponderis, quàm prius fuit p. 36, 37. *Qui Actor. 8: 26. dicitur Angelus Domini N. 29. Spiritus & N. 39. Spiritus Domini audit. Est autem communis sententia, Spiritum Sanctum esse intelligendum, ubi-*

ubicunque Spiritus vel simpliciter, vel Spiritus Dei aut Domini dicitur. Sic est, communis sententia est, (non ideo tamen vera quia communis est, sed quia in Scripturis est fundata) quòd Spiritus Sanctus sit intelligendus, *ubicunque Spiritus vel simpliciter, vel Spiritus Dei aut Domini dicitur*; sed eadem illa communis sententia etiam hoc pro certo habet, quòd ille *Spiritus Sanctus*, qui vel simpliciter *Spiritus* vel *Spiritus Dei* aut *Domini* dicitur, sit verus, æternus & summus Deus, quæ propterea non potest censere, eum denotare Angelos. Neque necesse est, ut dicamus, de eodem sermonem esse Act. 8:26. ubi Angelus Domini dicitur, & vers. 29. & 39. ubi Spiritus aut Spiritus Domini vocatur, cum diversæ possint designari personæ. Angelus Domini iussit Philippum proficisci in viam, quæ Hierosolymis Gazam ducit: postea demùm, cum jam eò se contulisset, Spiritus iussit ipsum accedere ad currum, in quo sedebat Eunuchus, qui alius potuit esse ab isto angelo; & phrasis illa videtur designare, quòd Spiritus ille intrinsecus moverit Philippum interno instinctu, eo modo, quo Spiritus Sanctus solitus est agitare Prophetas; actio etiam alia fuit Spiritus sapientis Philippum, ab actione angeli;

quæ in solâ jussione proficiscendi fuit absoluta. Beza observat: *In uno codice legimus Πνεῦμα ἅγιον ἔπαιον ἐπὶ τὸν ἐνέχον, ἄγγελος ὁ Κυεῖς ἤρπασε τὸν Φίλιππον*; quam lectionem *Rabanus in glossâ Ordinariâ annotavit*; & *ms.* illum veterem sic habere, & sic citare ipsum Hieronymum Dialogo Orthodoxi & Luciferiani, observat Grotius; hæc lectio si obtineret, manifestius adhuc appareret, Angelum & Spiritum à se invicem posse distingui. Saltem demonstrandum incumbbat Auctori Problematis, eundem esse qui Angelus dicitur vers. 26. cum illo, qui Spiritus aut Spiritus Domini appellatur vers. 29. & 39, quod supponit quidem, non probat. Quod si probasset, nondum tamen obtineret, Sp. Sanctum esse angelos, cum hîc non plurium, sed unius tantum angeli fiat mentio; sit jam Sp. S. idem cum illo angelo Domini, dicam illum esse angelum increatum, cum Sp. S. sit increatus, quippe æternus & supremus Deus, ut pluribus initio hujus tractatus est evictum; qui tamen potest dici angelus sicut & Filius Dei, quia personæ illæ duæ à Patre mittuntur. Fuerit jam Didymus in illâ sententiâ, ut Spiritum illum Domini intellexerit de angelo creato, non tamen inde sequitur, quod putaverit, Spiritum Domini,

ubi-

ubique in Scripturis memoratur, denotare angelum, multo minus, per Spiritum S. intelligi genus angelorum, quæ Auctoris problematis est sententia. Et nihil certius est, quàm Didymum de Spiritu Sancto rectè sensisse, cùm habeat illum pro Deo, ejusdem planè naturæ, cujus est Pater & Filius, prout apparebit ei, qui initium lib. 3. de Spiritu Sancto legere voluerit. Neque dubitandum est, quin Didymi, quo præceptore usus fuerat Hieronymus, eadem de Sp. Sancto fuerit sententia, quæ & Hieronymi. Quod autem Hieronymus à cogitato opere de Sp. Sancto destiterit, hujus rei hanc rationem reddit in præfatione, quòd *Pharisaorum conclamaverit senatus, & nullus scriba vel fictus, sed omnis, quasi indicto sibi pralio doctrinarum, adversum se imperitia factio conjuraverit.* Unde tamen non puto necessariò colligendum, quod existimat Auctor problematis, *vel Hieronymum, vel clerum Romanum illo tempore malam de Spiritu Sancto opinionem fovisse,* quum verba illius non necessariò de toto clero Romano sint intelligenda, nec de dissensu vero in doctrinâ, sed de calumniis adversariorum, & insidiis eorum, qui cum Ariani essent, falso nomine se Origenistas nominabant, possint exponi.

LXI. Aliud habet argumentum §. 10. quod VII. fuerit, in quo multa supponit & mixta habet vera cum falsis. *Lex Moſis*, inquit, *ſcripta eſt digito Dei* Exod. 31. Deut. 9. Hoc admittimus, verba enim ſunt Scripturæ. *Digitus autem Dei habetur ab omnibus pro Sp. Sancto.* Quod verum non eſt, ſi eo ſenſu id intelligas, quaſi ubicunque in Scripturis mentio fit digiti Dei, per illum omnes Theologi Orthodoxi intelligant Spiritum Sanctum. Per digitum Dei intelligi Sp. Sanctum Luc. XI. 20. *Si verò per digitum Dei ejicio demonia, pervenit utique regnum Dei ad vos*, patet ex collatione cum Matth. XII. 28. *Si verò ego per Spiritum Dei ejicio demonia, nonne pervenit regnum Dei ad vos?* Sed quando Exod. VIII. 19. Magi dixerunt, productionem pediculorum **וַיִּבֶן** eſſe digitum Dei, non intellexerunt Sp. Sanctum, unde non exiſtimant Theologi, hoc in loco per digitum Dei designari Spiritum Sanctum; ſed ibi vox digiti Dei uſurpatur ad denotandam Dei immediatam actionem ab infinità ejus virtute & omnipotentiâ productam. Sic quando lex Moſis ſcripta dicitur digito Dei, non intelligitur Sp. Sanctus per digitum Dei, ſed immediata & divina operatio, quâ impreſſit tabulis illis lapideis ſuâ
omni-

omnipotentiam & virtute illam Scripturam, sive characteres, quibus lex Dei decem verbis comprehensa exprimebatur. Usitata autem hinc est Synecdoche agnoscenda, ut digitus Dei dicatur pro digitis, sive, pro manu Dei, quod exinde patet, quia cœli, qui dicuntur opus digitorum Dei Ps. viii. 4. vocantur opus manuum ejus, Ps. xix. 2. quæ manus Dei recepto in sacrâ paginâ loquendi modo potentiam Dei designare solet. Citat mox Auctor problematis Cyprianum lib. de Spir. S. (vel quisquis est ejus auctor) qui dicat: *Factum est mirabili dispensatione superni judicii, ut Lex, quam Sanctus scripserat Spiritus, deleteretur, ex quo loco patet, sensisse illum auctorem, quod digitus Dei, quo Lex Moysi scripta est, habeatur ab ipso pro Sp. S.; quod nihil facit ad nostrum negotium, tantum ostendit, non omnes convenire in explicatione Exod. 31. & Deut. 9. Addit lib. 3. ad Quirin. 10, ubi dicat: Spiritum S. Moysi apparuisse in monte Sina, quod nihil nobis incommodat. Quando enim apparet Deus, apparet Sp. Sanctus, quia illæ tres personæ sunt unus idemque Deus. Sed videamus, quid tandem conetur conficere. Nempe inquit p. 38 Ille dicitur Angelus, qui in monte Sina Moysi apparuit Act. 7. 38. imò*

184 *Causa Spiritus Sancti.*

Lex Moſis tradita eſt miniſterio Angelorum
Act. 7. 53. Galat. 3. 19. quod confirmat
Cyprianus in quâdam epistolâ. Citat etiam
OEcumenium. Quæ tandem Conclusio eſt
Ergo digitus Dei, vel Spiritus Sanctus ſunt
Sancti Angeli. Nos obſervamus, Scriptu-
ram accuratè diſtinguere Angelum illum,
qui eſt Legiſlator, ab iis, qui ſunt illius mi-
niſtri. Angelus Legiſlator eſt is, qui An-
gelus Jehovæ dicitur, & apparuit Moſi
Exodi III. 2. qui Jehova dicitur verſ. 4. &
Deus, item Deus Abrahami, Iſaaci & Ja-
cobi verſ. 6. qui juffit Moſen, ut educe-
ret populum ex Ægypto verſ. 10 qui hoc
ſignum ſtatuit Moſi, quòd Deo inſervitu-
ri ſint ad montem Sinai verſ. 12. quod
factum legitur Exodi xxiv. Is ergo eſt,
qui Act. vii. 38. legem tuliffe dicitur.
Sic & Dei adventus promiſſus fuerat Exod.
xix. 9. Ego, dicebat Jehova, veniam ad
te in denſâ hâc nube, ut audiat hic populus
cùm alloquar te. Angelus ille Deus ſive
Jehova Deut. xxxiii. 2. venit ex myria-
dibus Sanctitatis, hoc eſt, mediò angelo-
rum Sanctorum, cinctus Sanctis angelis;
hi miniſtri fuerunt iſtius Angeli, qui Prin-
ceps eſt exercitus Dei & qui eſt ipſe Jeho-
vah & legiſlator; unde Lex lata dicitur
per Angelos Gal. iii, 19. qui & vindi-
ces

ces ejus fuerunt constituti, & Angelo illi
 fœderis omne ministerium, quod ab iis
 postulabat, exhibuerunt. Digitum Dei,
 quo scripta est Lex in tabulis lapideis, nul-
 libi dicitur fuisse angelos, sed Dei virtutem
 & potentiam, sicut Exod. VIII. 19. digi-
 tus Dei eam designat. Si verò quis per di-
 gitum Dei, quo scripta est Lex, velit de-
 signare Sp. Sanctum, nondum tamen po-
 terit conficere, Spiritum Sanctum esse
 Sanctos Angelos. Non enim procedit ra-
 tiocinium Auctoris problematis, quod
 habet p. 38. *Quòd autem Digitus Dei et-
 iam synecdochicè, numero singulari pro plu-
 rali posito dicatur, clarissimè apparet in Ps.*
*8: 4. Videbo cœlos tuos, opera digitorum tuo-
 rum:* (hactenus quidem rectè, quatenus, ut
 supra annotavimus, digitus Dei pro digitis,
 h. e. manu Dei sumitur, sed quæ sequuntur,
 gratis sumit:) *id est, angelorum: nam mun-
 dum per Verbum angelorum ministerio dispo-
 situm sentiebant antiqui. Hieronymus verò
 & b. l. per digitos intelligit Spiritum San-
 ctum. Ratio autem nominis quâ angeli di-
 cantur digiti Dei, hac videtur commodè dari
 posse, quia Angeli sunt virtutes Dei, per quas
 operatur ipse Deus. Hîc autem assumit pro
 certo quod est falsissimum: cœlos esse opera
 angelorum. Quid Veterum quidam sense-*

rint , quorum tamen nullum hîc allegat, parum nostrâ refert , nec enim cum Veteribus hîc disputamus.

LXII. Si credit Auctor problematis, angelos esse creaturas , non debet illis opus Creationis assignare. Creaturæ enim quovis momento dependent à Creatore , nihil habent nisi quod perpetuò accipiunt ab ipso , vires earum , omnis virtus , omnis potentia est dependens planè ; nullam ergo habent ad creandum : ea enim independens ut sit oportet ; per eam datur & confertur omnis realitas , quam habet res, quæ creatur : quod autem continuo totam suam realitatem accipit aliunde ; quomodo conferat alteri omnem realitatem intelligi nequit. Sed & angeli si possent creare res alias , eas quoque possent conservare , cùm Creatio & Conservatio ejusdem potentiæ sit opus , & tantùm ratione distinguantur : at si possent res alias conservare , possent sibi ipsis quoque sufficere ut porrò sint ; quod si possent , nihil obstat , quo minus etiam à se ipsis possent existere , & sic possent esse Deus. Creatio ergo ita connexa est cum divinitate , ut nulli alii , qui non est Deus , assignari queat. Ex Creatione cœli Deus vult colligi à gentibus : cùm dii sui , quos colebant , non fec-

cerint cœlos, eos non esse veros Deos; pro certo ergo habet, Creatorem cœlorum non posse esse, nisi verum Deum, adeoque, Creationem non posse assignari angelis. Legimus Jobi XXXVIII. 6, 7. quando fundata est terra, cecinisse & acclamasse Deo angelos, qui nomine *stellarum matutinarum & filiorum Dei* exprimuntur; non legimus, illos terram fundasse, unde nec cœlorum creatio iis assignari potest. E contrario creatio cœli & terræ in solidum Deo assignatur in Scripturis. Jer. X. 11. *Dii, qui cœlum & terram non fecerunt, peribunt à terrâ.* Es. XL. 26. *Tollite in altum oculos vestros, & videte, quis creaverit illa; qui educit in numero exercitum eorum, omnes eos nomine vocat.* Neque verò Angelis hîc usus est Deus tanquam suis instrumentis, quod fortè vellet Auctor problematis; nec in Creatione, in actione illa omnipotente, instrumentis locus esse potest. Instrumentum à principali causâ dirigitur & adhibetur ad perficiendum id quod jam est, cui modificationem aliquam inferre potest, sed ubi nihil est, in quod agat instrumentum, non potest intelligi ejus usus. Quid verò ageret instrumentum in nihil? Si Deus producit ex nihilo, id fit in momento, *Dixit & facta sunt*; nullo molimine hîc opus

188 *Causa Spiritus Sancti.*

opus est: nullum ergo potest intervenire instrumentum. Dum Deus agit, statim res ipsa est; vocat ea quæ non sunt ac si essent; omnipotens ejus jussu momento ex nihilo facit aliquid; jam res facta est, antequam instrumento possit esse locus, qui illic concedi tantum potest, ubi res successive producit. Si Hieronymus per digitos Dei, quorum opera sunt cæli, intellexit Sp. Sanctum, non ergo Spiritum Sanctum habuit pro angelis. Virtus Dei est ipse Deus, non ergo angeli; potest illa in numero plurativo dici *virtutes*, quatenus varia sunt in quæ operatur, sed per illas non possunt intelligi Angeli. Possunt illi dici virtutes, non quia Dei sunt virtutes vel virtus, sed quoniam fortes sunt robore, & quoniam eorum potentia magna est, quæ sic virtutibus potest æquipollere.

LXIII. Quod annotatur ad hunc §. 10. ad firmandum argumentum, quod in illo urserat, non majorum est virium. Sic ille: *Cum in precedenti argumento demonstratum sit ex Act. 7. 38. 53. Gal. 3. 19. Legem per Angelos fuisse datam: Isti autem Heb. 3: 7. 9: 8. 10: 15. coll. cum 1 Pet. 1: 11. Spiritus Sanctus appellantur: ex eo evidenter apparere videtur, Spiritum Sanctum Angelos esse. In quem sensum Esai. 63: 9. 10.*

II.

II. JEHOVA cum Iudæis anxius fuisse, nec non Angelum faciei ipsius, illos per solam charitatem servasse &c. ipsosque nihilominus Spiritum illius Sanctum contristasse, & Jehovah suum Sanctum Spiritum inter illos constituisse. Quod iidem arguit eum, qui versu 10. Spiritus JEHOVÆ Sanctus appellatur, nullum fuisse præter Angelum ipsius faciei, sive, quem ad sui ministerium, quasi præcipuum inter reliquos Angelos coadjutores ministrum, adhibuit. Supponitur, non probatur, angelos appellari Spiritum Sanctum in locis citatis Heb. 3: 7. & cæteris. Heb. 111. 7. Propterea sicut dicit Spiritus Sanctus: *Hodie si audiveritis vocem ejus Ne obdurate corda vestra sicut in exacerbatione in die tentationis in deserto &c.* probabile non est, Sp. Sanctum denotare angelos. Respicitur procul omni dubio ad historiam illam, quæ describitur Num. xiv. ubi Deus juravit, eorum, qui nati fuerant 20. annos & ultra, cum educerentur ex Ægypto, nullum intraturum in terram Canaan, solo Caleb & Josuâ exceptis, prout legere licet vers. 22, 23, 24, 28, 29, 30. Qui ergo hæc dixit, fuit Jehova vers. 20, 21, 28, non fuerunt Angeli, de quibus nulla fit mentio in istâ historiâ: Inde ergo rectè colligitur, Sp.
San-

Sanctum esse Jehovam., sicque ille locus tantum abest ut sententiæ *Auctoris* velificetur, ut eam potius planè evertat. Heb. 1 x, 8. *Hoc significante Sp. Sancto nondum manifestatam esse viam Sanctorum, dum stationem haberet tabernaculum prius. cap. x. 15. Testatur verò nobis etiam Spiritus Sanctus, postquam enim dixisset: Hoc est testamentum quod disponam cum iis post dies istos &c. in quibus locis cum mentio fiat Sp. Sancti, nulla angelorum, nescio, quâ tandem consequentiâ possit inferri, Sp. Sanctum esse angelos: nam & 1 Pet. I. 11. cum quo hos vult conferri, de Sp. S. tantum est sermo, non de angelis. Dicitur ibi de Prophetis, quod scrutati fuerint, in quod & quale tempus Spiritus Christi, qui in illis erat, præsignificaverit passiones Christi & gloriam post illas futuram. Nisi forte putavit Annotator istam gubernationem Israëlitarum in deserto fuisse factam per solos angelos, non fuisse eorum gubernatorem ipsum Jehovam, quod planè repugnat historiæ Israëlitarum in deserto rectorum, quæ Jehovam introducit Regem & gubernatorem populi Israëliti, qui non in omnibus, sed tantum in quibusdam usus fuisse dicitur operâ angelorum. Si enim Jehova fuit Gubernator Israëlitarum, & angeli tantum in quibusdam*

dam ejus fuerunt ministri, dum Spiritui S. ista gubernatio assignatur in locis ad Hebræos, non magis inferri potest, Sp. S. esse angelos, quàm Sp. Sanctum esse Jehovah, cùm præsertim illa ipsa, quæ non potuerunt dicere angeli, quæ potuit dicere solus Jehova, Spiritui Sancto adscribantur, uti in antecedd. est abundè demonstratum. De loco Es. LXIII. 9, 10, 11. actum est superius §. 43. & 48. ubi ostensum, Angelum faciei esse ipsum Jehovah, non angelum creatum. Introducuntur ibi 3. personæ divinæ S. S. Trinitatis, Jehovah, cujus benignitates commemorat Propheta, Angelus faciei Dei, & Spiritus Sanctitatis Dei. Angelus faciei dicitur eos servasse, eos vindicasse & bajulavisse omnibus diebus seculi, Spiritui autem sanctitatis dicuntur rebellasse & eum affecisse dolore. Hæc cum sic distinctè dicantur, quare ergo Angelus faciei Dei & Spiritus Sanctitatis Dei haberentur pro iisdem? Pro distinctione istarum personarum militant distincta prædicata, nihil autem est, ex quo conficiatur eisdem esse, nisi quòd ita voluerit sine ullâ probatione Annotator.

LXIV. Ad VIII. ordine progredimur argumentum, quod sumitur ex 2 Pet. I. 21. *Non ab hominis voluntate facta prophetia;*

192 *Causa Spiritus Sancti.*

*sia; sed sancti viri scripserunt ductu Spiritus Sancti. Hunc locum sic urget Auctor Problematis §. II. ut dicat: Videri hic Spiritum esse creatum, cum & de malo Spiritu dicatur: Invasit Spiritus Dei malus Saul, & prophetabat in medio domus sue 1 Reg. 18: 10. Ita etiam c. XIX. de Spiritu bono legitur scriptum: Factus est Spiritus Domini in illis, & prophetare ceperunt etiam ipsi. Nos verò planè negamus, Spiritum Sanctum, cujus ductu scripserunt Prophetæ V. T. esse Spiritum creatum. Spiritus enim ille prophetavit ea, quæ post multa secula erant eventura de Christo, ejus beneficiis & regno, ita ut & tempus, locum, alias particulares varias circumstantias denotaverit; prædixerunt prophetæ ejus ductu præcurso-rem ejus, qui in virtute & Spiritu Eliæ illi sit complanaturus viam, matrem Christi futuram virginem, moriturum Christum, quando domus Davidis non erat germi-
natura; tempus ejus adventus adhuc alio modo determinatur per LXX. septimanas annorum, quando sceptrum vel tribus fue-
rit remota à Judæa & legislator è medio pe-
dum ejus, nominatur locus ejus nativitatis, Bethlehem Ephrata; docetur, illum tem-
plum secundum intraturum, sicque illud
gloriâ repleturum, prædicatur illum Hie-
roso-*

rosolymam intraturum ut Regem sedentem super asino, verba acclamationis, quibus à populo esset excipiendus, præformantur, describitur is qui erat ipsum proditurus, quod sit futurus unus ex discipulis, conspiratio contra illum futura Judæorum & gentium annotatur, prolixè commemorantur ejus dolores & passionēs, genus supplicii prænunciatur, felle & aceto dicitur potandus, latus ejus perforandum, verba, quæ clamaturus esset in cruce pendens, expressè recitantur, sepultura cum divite annunciat, resurrectio post triduanam detentionem in sepulchro memoratur, ascensus in cælum, sessio ad dextram Patris, & regnum sine fine expresse delineantur. At impossibile est, angelos ea posse prædicere, quæ in causis secundis tot seculis nullo modo poterant prævideri, quæque dependebant à causis secundis liberis planè & contingentibus. Adde, quòd totum illud mysterium salutis per Christum procurandæ tale sit, ut non ex naturâ rei, neque ex naturâ Dei possit derivari, sed totum dependeat ex arcano ejus consilio, quod nemo habet cognitum, nisi qui scrutatur profunditates Dei. Si dicas, Spiritum creatum hæc quidem ex se non habere cognita, sed ea revelata esse ipsi, ut illa revelaret

N

laret Prophetis dices aliquid, quod nuspiam docet Scriptura, adeoque loquēris ubi tacet Scriptura, & pronunciabis aliquid *ἀντὶ γένους*; quin imò dices contra Scripturam i Pet. I. 12. ubi ipsi angeli cupiunt intrōspicere illa, quæ revelaverat Sp. Sanctus Prophetis, prout plenius ostendimus in antecedentibus. Si objicias, Spiritum Sanctum de Christo accipere, adeoque hæc omnia illi revelari; cogites loco illo Joh. XVI. 15. simul doceri, *omnia quæ habet Pater esse Christi, & propterea Christum dixisse, quod ex meis accipiet & vobis annuntiabit.* Non ergo potes ex his inferre, Sp. S. accipere per revelationem, cū possit accipere per scrutationem profunditatum Dei, quod argumentum esse Omniscentiæ ex superioribus constare potest. Et cū ex tam multis Scripturæ clarissimis testimoniis in superioribus laudatis constet, Spiritum S. esse ejusdem essentiæ cum Patre & Filio, ea loca Scripturæ, in quibus ostenditur distinctio quædam inter personas, non sunt explicanda aliter, quàm ratione ordinis & originis. Neque est, quod urgeat, Spiritum malum etiam agitare quosdam & facere illos prophetare; hoc enim nihil facit ad rem præsentem. Pauca illa sunt quæ prædicunt, plurima ex illis
men-

mendacia, quæ vera prædicunt ea vel ~~scilicet~~ & contingentèr affecti sunt mali angeli, quòd jam præpararentur per causas secundas, vel quòd ipsi illa machinarentur, vel quòd penetrarent consilia & deliberationes Regum talia molientium, vel etiam, quòd Deus ipsis ut executoribus iudiciorum suorum quædam revelet. Nec tamen locus I Reg. xviii. 10. hoc est, I Sam. xviii. 10. causam ejus juvat. Saul actus malo Spiritu à Domino prophetare dicitur in domo suâ, non quòd futura prædiceret, quo modo in hoc nostro negotio de prophetis est sermo, sed quòd furore correptus esset. Sic enim Hebræi illud hîc exponunt pro delirare & insanire. Kinchi exponit, *loquebatur verba insanie*, & Chaldæus paraphrastes vertit, *desipiebat*. Non malè hîc Martyr annotat: *Hoc est iudicium hominum, ut insanos putent prophetare, & rursus veros prophetas insanire. Nam in lib. Regum 4. cum famulus Elisai unxisset Hiehu regem, qui illi asidebant, quid sibi vult, inquiunt, iste insanus? Cum esset propheta, tamen ab illis insanus iudicatur.* At cap. xix. cœtus ille prophetantium erat cœtus laudes Dei canentium, quibus, moti Spiritu Dei, se adjunxerunt nuncii Saulis, & postea quoque Saul ipse;

at nos negamus, Spiritum illum bonum esse creatum. Nam actio, quæ illi tribuitur, talis est, ut in creaturam cadere nequeat. Potest diabolus, intervientibus sensibus tum externis tum internis, agere in filiis inobedientiæ, exhibendo malis objecta mala, ad quæ postea ex propriâ malitiâ feruntur suâ sponte; potest etiam quædam futura manifestare hominibus, quæ aliis prædicant, sed ad id non necessaria est actio immediata in animam, per quam illa immutetur: at Spiritus ille bonus planè immutavit animum Saulis, fuitque actio illa in ejus mente terminata. At supra jam ostendimus, talem immutationem cordis esse solius Dei, qui formator cordis hominum propterea appellatur.

LXV. Sic verò pergit Auctor problematis, & conatur probare, per *Spiritum Sanctum*, cuius ductu scripserunt *Sancti viri*, teste Petro, *synecdochicè Sanctos angelos esse intelligendos*, ut nempe singularis numerus pro pluralivo usurpetur. *Id probabile videri* dicit 1. ex 1 Cor. 14. 32. Spiritus Prophetarum Prophetis subiecti sunt; tum quia pluralitèr dicuntur Spiritus, tum quia subiecti dicuntur prophetis, de quo ego secus judico. Duplex est istius loci interpretatio, quæ inter orthodoxos con-

trover-

trovertitur: alii enim ita verba ista intelligunt, ut putent designari, debere quemlibet Prophetam subjici collegio & judicio aliorum prophetarum, alii verò hæc verba ita interpretantur, ut existiment, his docere Apostolum, Spiritum Sanctum, qui agitet Prophetas, non ita eos agere, ut violentis rapiat motibus, nec possint continere Spiritum, hoc est donum suum à Spiritu S. acceptum, & expectare opportunitatem loquendi, sed esse in eorum potestate, ut possint differre usum sui doni divinitus accepti, donec cessantibus aliis prophetis, commodus sibi detur dicendi locus, quæ sententia tempore Martyris communis erat. Quamcunque sequamur sententiam, certum est, per Spiritus prophetarum non intelligi angelos, quorum non est ea potentia, ut corda Prophetarum queant immutare, juxta ea quæ antea fuerunt dicta; potest Sp. Sanctus, qui in se est unica persona, dici Spiritus in pluralivo numero ratione pluralitatis & diversitatis donorum, uti jam supra observavimus, quâtenus, prout numero differunt Prophetæ divinitus inspirati, ita & dona illis collata saltem numero & modo, si non & gradibus distinguuntur, sicque Spiritus appellantur; hæc dona sic possunt dici sub-

N 3

jecta,

jecta, adeoque hoc sensu ipsi Spiritus sunt
 subjecti, Prophetis. Ita prima probatio
 concidit. Putat, probabile esse, quòd
 per Spiritus Prophetarum intelligantur
 Angeli 2. *quia Spiritus (pluraliter) prophe-*

tarum habent Dominum Deum Apoc. 22: 9.

ἡμεῖς ὁ Θεὸς καὶ πνεύματων τῶν προφητῶν: ubi

Pseudo-Alexander P. P. epist. 1. per Spi-

ritus Prophetarum intelligit Spiritum San-

ctum: ex loco illo probare volens Trinita-

tem in Deo Ad quæ observo, communem

lectionem habere καὶ κύριος ὁ Θεὸς τῶν ἀγγέλων

προφητῶν, quam si sequamur, planè nullum

est hoc argumentum. Fateor, sic habere

vulgatam versionem, & Bezam in uno ma-

nuscripto codice sic legisse, unde non

multum admodum de illâ lectione volu-

mus contendere, quæ tamen si admit-

tatur, non plus proderit Auctori proble-

matis, quàm profuit prius locus 1 Cor.

xiv; eodem enim modo hîc possumus

interpretari Spiritus Prophetarum de Spi-

ritus S. donis, ac fecimus in loco 1 Cor.

xiv. Ita numero argumentorum maluit

niti quàm pondere Auctor problematis.

Nam 3. probatio adhuc levioris est com-

matis. Citat verba quæst. 1. ad Orthod.

Vetus Testamentum primum predicatum est

verbis divinarum potestatum testimonio con-

fir-

firmatis. Quid verò ad rem, si Auctor quæst. 1. ad Orthod. (in operibus Justini Martyris) Spiritum S. hoc loco vocaret divinas potestates, an nostra fides niteretur hoc auctore? Sic est in Græco: *ἐκ τῶν μὲν κερυθισμένων λόγους θείας δυνάμεις μαρτυρούμεναι*, quod sic potest reddi: *Vetus Testamentum primum predicatum est verbis comprobatis divinis virtutibus*, ubi non est opus, ut per divinas virtutes *θείας δυνάμεις* intelligamus angelos, cum sæpe *δυνάμεις* designent miracula sive operationes mirificas, quæ Verbum divinum sunt comitata, quales fuerunt operationes Moïsi in Ægypto, ad quas hunc respicere auctorem dubium videri non potest, cum in seqq. dicat, *deinde*, nempe sub N. T. *operibus, quæ itidem virtutibus divinis edita sunt, Deum imposturam in hominibus & demonibus omnem radicatus evellere.* Tædet reliqua ad examen revocare, quæ undique corradit, modò judicet suam ullâ ratione posse stabilire causam; sed tamen devorabimus illud tædium, quia breve erit, quum ad finem vergat nostrum responsum. Dicit p. 40. *se non facile credere Simonianos in eo ab Irenæo I. 20. reprehensos, quod dicerent, Prophetas ab angelis inspiratos dixisse prophetias; sed quod angelos istos dicerent mundi fabrica-*

tores. Irenæus tamen hoc dogma Simonis refert illic & improbat: *Prophetas à mundi fabricatoribus angelis inspiratos dixisse prophetias, quapropter nec ulterius curarent eos hi, qui in eum & Selenen ejus spem habeant*; nam propterea Simon magus nolebat, curandas esse prophetias, quòd inspiratæ essent ab angelis mundi fabricatoribus, quod sanè Irenæus rotum ibi improbat. Auctor libri de Trinitate in operibus Tertulliani singularitèr legit: *Spiritus prophetarum prophetis subiectus est*, an ergo inde elicies: Ergo per Spiritum prophetarum intellexit angelos? an non, si Spiritus prophetarum intelligamus in plurativo numero de donis Spiritus, poterimus commodè dicere in singulari, ratione habitâ uniuscujusque prophetæ in particulari, unicuilibet illorum suum donum sic subiectum esse, ut habeat potestatem eo utendi, quando opportunitas id requirit vel permittit; vel, si alteram interpretationem malis sequi: quemlibet prophetarum debere suum donum subicere collegio fratrum prophetarum, sicque Spiritum uniuscujuslibet prophetæ subiectum esse prophetis. Dictum Origenis, quod ex tomo 7. in Johannem citat, si tamen ejus hi sint tomi, non infert, illum

illum putâsse, quòd Sp. Sanctus denotet Angelos : potuit enim Origenes per Spiritus prophetarum, quorum usus concessus esset Prophetis, intelligere dona Spiritus Sancti. Et quid si putâset? an ejus verba nobis sunt habenda pro normâ veritatis? De iis quæ citat ex lib. 3. contra Celsum jam superius egimus §. 39. quæ nolumus cum ipso repetere, ne crambe sit bis cocta. De Eusebio eadem responsio est cum illâ, quam antea dedimus ad Aut.lib. de Trinit. in operibus Tertulliani, sic ut nihil amplius superlit ex §. 11. ad quod non sit responsum.

LXVI. Subjungitur argumentum IX, quod nititur 2 Cor. 11: 14. αὐτὸς ὁ Σατανᾶς μεταχρυσάζεται εἰς ἄγγελον φωτός: ipse *Satanas transfiguratur in angelum lucis*. Atque inde hoc modo infert: *Quem hic Apostolus Angelum lucis vocat, Origenes appellat Spiritum S. tr. 1. in Matth. ita scribens: Tertiâ die surrexit à mortuis, ut eripiens à maligno & à filio ejus, in quo mendacium erat & injustitia, & prælum, & omnia contraria eis, in quibus Christus habetur, adhuc autem & à Spiritu immundo, qui transfiguratur in Spiritum Sanctum.* Fatemur, hoc in loco dum dicitur, Spiritum immundum transfigurari in Spiritum Sanctum, alludere Origenem

ad 2 Cor. 11: 14. quod sæpe solet fieri, ita tamen ut propterea non sit dicendum, Origenem illud, quod Paulus dicit de Angelo lucis, interpretari per Spiritum Sanctum. Quod si concederemus, probandum adhuc restaret, & Origenem mentem Apostoli rectè esse assecutum, (non enim credo vellet, nos omne id debere admittere quod scripsit Origenes) & si jam etiam illud concederemus, ulterius foret demonstrandum, Spiritum Sanctum denotare Angelorum genus. Addit Autorem Operis Imperfecti hom. 4. *solam Charitatem Sancti Spiritus non potest immundus Spiritus imitari*; unde hoc reor velle inferre: reliqua Sancti Spiritus posse imitari Spiritum immundum solâ charitate exceptâ, adeoque per Angelum lucis ipsum intellexisse Spiritum Sanctum; ad quod responsio eadem applicari potest cum illâ, quam antea dedimus ad Origenem. Quod subjungit adeò ineptum est, ut an vigilans an somnians scripserit jure queat dubitari. *Vice versâ*, inquit, *quem Christus Luc. 11: 13. Spiritum S. vocat, jubens nos petere Spiritum Sanctum, cum Cyprianus Angelum lucis nominat, quando Orat. sub die passion. ita ait: Angelus tuus lucis protegat me, quoniam tu dixisti quod credentes petieritis per orationem,*
da-

dabitur vobis. Petit Cyprianus custodiam angelorum bonorum, quos nomine angeli lucis indefinitè accepto designat. Quis sub ullâ rationis specie vel umbrâ inde conficiet, ipsum per Angelum lucis intelligere Sp. Sanctum? Si eum compellaret, si hoc ab ipso Angelo lucis flagitaret, si eum invocaret, putari posset, quòd ipsum intellexisset Spiritum Sanctum, at nunc Deum invocat, petitque à Deo sibi concedi custodiam angeli lucis. Quòd si tamen id concederetur, adhuc duo illa restarent demonstranda, quæ circa Origenis observavimus testimonium, nimirum, & respexisse Cyprianum ad locum Luc. II. 13. & mentem Christi apud Lucam rectè assecutum, & Spiritum denotare angelorum genus.

LXVII. Sic transitur ad argumentum X. quod ex Joh. 16: 7. 13, 14, 15. nectitur. Ita habet Auctor problematis: *Christus ait:* Ego mittam vobis eum (scilicet *Paracletum*) qui non à se ipso loquetur, sed quæcunque audierit, loquetur, & de meo accipiet & annunciabit (*ἀπαγγελεῖ*) vobis, & futura vobis annunciabit (*ἀπαγγελεῖ*.) *Ergo Spiritus S. officium est esse legatum, nuncium vel angelum.* Hanc Conclusionem lauo sensu possumus ad-
mitte-

mittere , adeoque Consequentiam argumenti concedere. Quòd Sp. S. sit legatus Patris eo nihil est certius, cùm Scriptura id nimis manifestè doceat , dum dicit , eum à Patre mitti. Atque ita potest dici quoque nuncius & angelus , quâtenus hæc tria inter se invicem æquipollent , modò cogitur , non esse angelum vel nuncium vel legatum creatum , sed increatum. Missio illa & legatio respondet æternæ processioni à Patre & à Filio , quæ ineffabilis est , sicut & Filii æterna generatio ; credenda tamen utraque propter auctoritatem Scripturæ infallibilem , atque in illâ explicandâ non sapiendum ultra id quod scriptum est. Hæc autem æterna processio est fundamentum missionis in tempore , quæ nihil aliud dicit , quàm illum distinctum modum operandi , qui nititur distinctis illis proprietatibus incommunicabilibus personalibus , quibus juxta ductum S. literarum , personæ S. S. Trinitatis inter se invicem distinguuntur. Hic modus agendi in operationibus , quæ tendunt ad extra sive in creaturas , ita distinguitur ratione Patris , Filii & Sp. S. ut Pater operetur à se ipso , sicut ratione suæ personalitatis est à se ipso ; Filius à Patre , quâtenus Pater operatur per Filium ; & Sp. S. à Patre & à Filio , ut ita Pa-
ter

ter & Filius operentur per Sp. Sanctum. Quòd si Auctor Problematis Conclusio-
nem istam intelligat, de legato, nuncio &
angelo creato, nos Consequentiam hanc,
quam ex Joh. 16. nectit, planè negamus.
Scriptura docet, Sp. S. esse æternum, ve-
rum & supremum Deum, ejusdem planè
essentiæ & dignitatis cum Patre & Filio,
quod in superioribus plenius deduximus
& demonstravimus; quæ jam porrò in Scri-
pturis de Sp. S. docentur, ea pertinent ad
personalem ejus distinctionem à Patre & à
Filio, cujusmodi sunt illa, quæ Joh. XVI.
7, 13, 14, 15. leguntur. Dicitur *ἡγεμενός*,
respectu singularis & appropriati ad suam
personam modi operandi, qui est, quòd ut
advocatus in nostrâ conscientiâ pronun-
ciet, nos esse immunes, à merito conde-
mnationis, atque ita ut consolator nos so-
letur contra omnes tentationes; est Spiri-
tus veritatis, quia quam veritatem loquitur
in suo verbo, eandem loquitur intus ad no-
stras conscientias, quòd sic nos ducat in
omnem veritatem, quòd non loquatur à
semetipso, sed quòd accipiat à Filio, quæ
loquitur, adeoque à Patre, quia omnia,
quæ habet Pater, habet etiam Filius, quod
inde est, quia Patris, Filii & Sp. Sancti una
eademque communis est essentia. Atque
hinc

hinc tantum abest, ut sequatur, Sp. Sanctum esse nuncium, angelum & legatum creatum, ut potius sit manifestum, eum verum & summum unà cum Patre & Filio esse Deum, atque quod dicatur accipere à Filio & legatus esse Patris, id non ad discrimen essentie, sed personæ tantum pertinere & esse referendum. Hæc de re ipsâ, nunc de iis, quæ citantur ex Origene tomò 20. in Johannem: *Spiritus quidem Sanctus vel angelicus Spiritus cum loquitur, non ex propriis loquitur, sed à Verbo Veritatis, & Sapientia: id quod etiam manifestat Iohannis Evangelium, in quo de Paraclete docens Servator inquit: De meo accipiet, & annuntiabit vobis; mendacium verò quando loquitur, ex propriis loquitur. Ex propriis etiam locutus est in tertio Regum ille Spiritus mendax decipiens Achab.* Ex quibus patet, scriptorem illum argumentari à Paraclete, de quo Johannes, ad Spiritum angelicum, quod sicut Paracletus accipiat à Verbo Veritatis & Sapientiæ ea, quæ loquitur, ita quoque angelicus Spiritus, si sit bonus & sanctus omnem Veritatem hauriat à Verbo Veritatis; quo non probatur, vel scriptorem illum verba Johannis intellexisse de Spiritu creato, vel illum statuisse, Paracletum sive Sp. S. genus angelorum denotare.

LXVIII. Argumentum XI. ex Act. II.
2, 3, 4. collato cum Ps. 104. 5. more Auctore Problematis consueto §. 14. concinnatur. Act. 2: 2, 3, 4. *Spiritum Sanctum effundendum, cum magno flatu, & apparituum in specie flammarum ignis* (hanc enim speciem referunt lingua divisa) *vaticinatus videri possit Propheta David, dicens Ps. 104: 5. Qui facis angelos tuos Spiritus (vel ventos, in Græco enim & Hebræo est equivocum) & ministros tuos ignis flammam.* Quod Spiritus Sanctus in festo Pentecostes pro symbolo præsentis suæ usus fuerit magno flatu & specie linguarum divinarum, instar flammarum ignis, docet historia Apostolica Act. 11. Ex Ps. 104: 5. constat, angelos non minus promptos esse ad celeriter expediendum mandata divina, ac ventus & flamma ignis, quæ celerrimo motu gaudent. Sed non docetur ibi, ipsos angelos esse ventos vel flammam ignis, uti nec Act. 11. dicitur, istas flammam ignis & magnum flatum fuisse Spiritum Sanctum; quæ tamen utrinque dici oporteret, si modo quid ex collatione horum 2. locorum pro sententiâ Auctoris problematis sit conficiendum. Citat Thom. Hobbem de Civit. Christ. cap. 34. sic dicentem: *Non dubito, quin columba & lingua ignea*

ignea in Evangelio, cum signa essent divina providentia, possent nec improprie vocari Angelis; & vult conferri caput proximè præcedens. Sed nec ille liber mihi est ad manum, nec magnæ est auctoritatis Vir ille apud pios, qui in suo Leviathanè prodidit, quantopere curet veritatem Religionis, dum eam suspendit à decreto & iudicio sui Regis. Si Auctor problematis in eadem fuit cum ipso sententiâ, & putavit, columbam & linguas igneas fuisse angelos, demonstret id ex auctoritate sacre scripturæ, quæ apud Christianos sola valere debet; & simul ostendat, Spiritum Sanctum fuisse ipsam columbam & linguas igneas; sic demum confecerit, Spiritum Sanctum genus Angelorum denotare.

LXIX. Succedit XII. argumentum quod habet *1. 5. Spiritum S. prohibemur extinguere 1 Thess. 5: 19. Verum & Diabolus exstingui dicitur Cypriano orat. pro S. S. Martyr. cum ait: Asmodæus demon nequissimus extinctus per Angelum tuum sanctum Raphaël.* Quod argumentum, præterquam quòd sit affirmativum in secundâ figurâ, etiam concludit, quod sine blaphemiâ dixerim, Diabolum esse Spiritum Sanctum. Sperem & Auctorem problematis ab istâ blasphemîâ abesse, & tantum voluisse concludere, cum

na-

natura Diabolorum & sanctorum angelorum sit eadem, Spiritum Sanctum esse genus angelorum sanctorum; sed præcipitantia hæc tamen magis sollicitè vitanda fuisset, ne talia incautè exciderent. An Oratio illa sit Cypriani dubitat Erasmus, quæ si fuerit, nititur Auctore Apocrypho libro Tobiz, de quo jam supra egimus. Si tamen dicatur *exstingui* Diabolus per alium angelum bonum, nihil aliud potest designari, quàm quod superetur, quòd vincatur, adeoque prohibeatur à nocendo. Quando autem 1 Thess. V. 19. prohibemur Spiritum Sanctum *exstinguere*, non agitur de personâ Spiritus Sancti, quæ cum sit virtutis omnipotentis non potest superari, sicque illi nequit resisti, sed de donis Spiritus Sancti, quæ, dum non excitantur & foveantur continuo usu, solent exstingui, imprimis si illa dona sint communia & externa: quantum enim attinet ad donum fidei & sanctificationis, cum sit ἀμωλύμενον, Spiritus Sanctus ejus auctor id ita fovet & refocillat semper, ut exstingui non possit.

LXX. Argumentum XIII. nititur iterum dicto Apocryphi libri Sapientiz c. 7. vers. 22, ubi *Spiritus Sanctus* dicitur *multiplex*; quod tamen parum juvat ejus causam.

O

sam.

sum. Potest enim id intelligi ratione doctorum, sicut supra ostendimus, septem illos Spiritus Apocalypticos exponi oportere. Arium quod attinet, quem putat eodem sensu statuisse Sp. Sanctum multiplicem, quo auctor ille Apocryphus, nescio, an evidentè posset probare. Hoc tamen si faceret, Arium sic rectè sensisse de Spiritu Sancto pateret. Si ex Athanasii disputatione à Vigilio compositâ, dum probat Spiritum Sanctum esse simplicem, unicum & singularem, constet, Arium statuisse Spir. Sanctum multiplicem, uti id vult Auctor Problematis, non consensit cum libro Sapientiz, & erravit gravissimè, atque ita Arii consensum non invidemus illi. Hoc certum est, quòd Spiritum Sanctum statuerit creaturam Filij, quem tamen quoque pro creaturâ habebat, adeoque quòd non potuerit aliud discrimen inter angelos & Spiritum Sanctum agnoscere, quàm quale est inter creaturas spirituales. Idem & de Macedonio censemus; & ipsemet dicit, Valentinum Spiritum Sanctum & Filium ad Angelorum naturam redegisse. Sed scire vellem, quid hoc faciat ad nostrum negotium, si Arius & Macedonius & Valentinus habuerint Spiritum Sanctum in numero angelorum; nondum tamen

men sequeretur, illos statuisse, Sp. Sanctum multitudinem vel cœtum Angelorum Sanctorum designare; neque hoc dogma sectatores Arii. docuerunt, cùm ipse Auctor Problematis dicat, nullum cœtum se novisse, qui hanc sententiam teneat. Quòd si quoque Arius, si Macedonius, si Valentinus, si Ariani, si Macedoniani, si Valentiniani hanc sententiam sunt tuiti, horum hominum manifestè hæreticorum error an nobis erit regula credendi? Quæ sequuntur non intelligo. *Minimè verò hic memorandi sunt*, inquit, *Tropici, qui seculo 4. (non secus ac nostro tempore Bidellus in Angliâ) docebant, Sp. S. esse omnium angelorum principem.* Non enim video, quare minus illos censeat memorandos ac Arium, Macedonium & Valentinum; sicut nec intelligo, quare ullum istorum hominum voluerit memorare, cùm sciat apud contra sentientes horum auctoritatem in nullo planè esse pretio. Nisi fortè hoc voluit, Tropicos istos propterea non esse memorandos, uti nec Bidellum, quia non eandem secum tenuerint sententiam. Quinam fuerint *Tropici* discere possumus ex Athanasio epist. ad Serapionem, *Sp. S. non esse creaturam.* Sic ille Tomo I, editionis Parisiensis pag. 164. *At illi qui reverà sunt Tropici, hoc est transmutabiles,*

tañiles, fœdere inito cum Arianis blasphemiam in Deitatem inter se partiti sunt, ut isti filium, illi verò Sp. S. creaturam dicerent. Ausique sunt, ut ipsi loquuntur, tropos sibi excogitare, & interpretari illud Apostoli dictum, qui rectè Timotheo scripsit, Tector, inquit, coram Domino nostro Jesu Christo, & electis angelis, ut hæc observes sine præjudicio, nihil ex affectibus faciens. Illi autem dicunt, ex eo quod Paulus nominato Christo Angelos statim subjunxerit, necessum esse, Spiritum Angelis annumerari, & ejusdem ordinis esse, (vide hîc hos homines eodem argumento utentes, quo Auctor problematis fuit usûs, & hucûsque consentientes, quamvis in eo quod sequitur sit differentia) cumque angelum esse, sed majorem cæteris. Fûerunt ergo propago Ariarum, de quorum dissensu vel consensu cum aliquâ sententiâ non multum sumus solliciti, cum veritati per hominum quorumcunque, ne dicam hæreticorum, dissensum nihil decedat, per consensum nihil planè accedat.

LXXI. Majorem speciem videtur habere XIV. Argumentum desumptum ex Act. XXIII. 8. *Sadducei quidem dicunt, non esse resurrectionem, neque Angelum, neque Spiritum, Pharisei verò utrumque confitentur.*

tur. Hinc concludit Auctor Problematis: *Ergo Angelus & Spiritus unum idemque sunt, ut alterum sit resurrectio. Synecdochicè autem dici videtur Spiritus pro angelis & spiritibus.* Nos hâctenus possumus concedere, quòd *Angelus & Spiritus* sit unum idemque, quâtenus Spiritus est quid commune Angelo, & Animæ humanæ. At hinc tamen nihil potest confici pro quaestione de quâ disceptatur; inde non sequitur, Spiritum Sanctum esse angelos. Intellexerint jam hoc loco Epiphanius, Gregorius Nazianzenus, Philastrius, Ignatius, ut ipse vult, *per Spiritum* Spiritum Sanctum, quid id faciet ad causam præsentem? an inde ergo sequetur, illos auctores per Sp. Sanctum designâsse angelos? & si hoc jam concederemus, an nos adstringemur in hâc causâ auctoritati humanæ? Verba Pauli de Sadducæis ita posunt exponi, ut dicantur Sadducæi negâsse omnes Spiritus creatos, cujusmodi sunt Angeli & animæ humanæ; sic nihil sanè roboris habebit Auctor Problematis isto in loco pro suâ causâ. Quò ultima verba hujus §. tendant non satis capio: *Idemque manifestè colligitur ex Act. 19: 2. ubi τὸ πνεῦμα additur vox αἶων.* Quid enim illud *Idem*? an purat ex Act. 19. 2. colligi, O 3 quod

214 *Causa Spiritus Sancti.*

quod Act. xxiii. 8. per *Spiritum* sit intelligendus Spiritus Sanctus? Id enim oportet ut significant verba, si ullo modo debeant facere ad ipsius institutum. At quo consequentiae genere illud conficietur? ipsemet observat inter hæc duo loca hanc distinctionem, quod Act. xix. 2. addatur *et*; quod Act. XXIII, 8. non reperitur: tantum ergo abest, ut eodem sensu utrobique vox *spiritus* debeat accipi, ut potius sit censendum, diversum esse sentum.

LXXII. Sed ad finem pervenimus, ultimum enim tantum restat *Auctoris Problematis* argumentum. Sic ille §. 18. *Cum nullo modo probabile sit, Apostolos nullam angelorum mentionem in Symbolo suo iniecisse, quando tanto studio Christus & Apostoli refutârunt Salducaeos, nullos Spiritus credentes, videntur utique sub Spiritus S. nomine Angeli intelligendi.* Supponit hîc Auctor Problematis, Symbolum illud, quod Apostolorum dicitur, ab Apostolis ipsis eâ formâ, methodo & ordine, quo habemus illud, esse conscriptum, quod à quibusdam ex nostris Theologis falsitatis evidentèr est convictum. Nec enim Lucas in Actis, ubi tam accuratè descripsit historiam prædicati Euangelii ab Apostolis tum inter Ju-

Judæos tum inter gentes, rem istam tanti momenti, qualis fuisset, quòd ab Apostolis, antequam à se invicem separarentur, istius modi formula fidei fuisset concepta, omnibusque verè Christianis tanquam norma succincta credendorum fuisset relicta, potuisset neglexisse saltem nullo modo credibile est, Paulum vel Petrum, inter quos pactum est, ut ille gentibus, hic Judæis Evangelium prædicaret, id neglecturum, quin rei istius mentionem facerent quandam: nec Patres, qui ante Concilium Nicænum scripserunt, qui particulares formulas fidei suæ reliquerunt, illam formulam potuissent omisisse; ut ita, cùm istius traditionis nullus certus exstet auctor, non appareat, quare tale quid sit supponendum. Videat qui volet hujus rei plura argumenta eaque latius deducta apud Magnum Vossium de tribus symbolis p. 22. & seqq. Interea nos libentè admittimus, Symbolum istud, tum quoad verba tum quoad rem, cum Apostolicâ doctrinâ perfectè concordare, unde & ab omnibus Christianis meritò debet magni æstimari. Et videtur successu temporis formatum & pedetentim alios atque alios articulos professioni S. S. Trinitatis, quæ istius Symboli prima videtur fuisse basis,

fuisse adjectos. Ut per Spiritum Sanctum illic intelligantur Angeli, planè nobis impossibile videtur. Proponitur enim in illo Sp. Sanctus objectum nostræ fidei & fiduciæ non minus quàm Pater & Filius; sicut dicitur: *Credo in Deum Patrem*, ita adjungitur; & *in Filium eius unigenitum*, ut &, *Credo in Spiritum Sanctum*. Maledictus autem est, qui fiduciam collocat in creaturis, cujusmodi sunt angeli, quâ de re in superioribus plenius fuit actum. Non igitur possumus in illo Symbolo per Sp. Sanctum intelligere angelos. Angelorum mentionem in illo Symbolo censemus fieri sub nomine *cæli & terra*, quando dicimus: *Credo in Deum Patrem Omnipotentem Creatorem cæli & terra*; neque necesse erat, ut particularis eorum haberet mentio. Contra Sadducæorum errorem militant scripta Euangelistarum & Apostolorum, à quibus illis est contradictum; apud quos igitur Christi & Apostolorum valet auctoritatis, imò apud quos valet auctoritas librorum V. T. non possunt negare, Angelorum existentiam.

LXXIII. Atque ita satisfactum puto Problematis Auctori, & scrupulos non tantum sublato, sed insuper demonstratum, non posse per Spiritum Sanctum,
(prout

(prout in Scripturis nobis proponitur, ut tertia S. S. Trinitatis persona à Patre & à Filio distincta) genus Sanctorum Angelorum intelligi, quorum prius fieri postulabat §. 23. An nunc se sit docilem discipulum exhibiturus, non meum, sed Christi, sed Dei in Scripturis loquentis, tempus docebit. Pauca quædam adjungenda sunt in gratiam *Auctoris addendorum*. Refutat is p. 53. sententiam Socinianam negantem, Sp. Sanctum esse personam, de quo cum hactenus utrinque sit consensus, non est quod agamus. Sed non possumus præterire, quæ p. 59. observat. Sic ille: *Præterea notandum est, quod, quemadmodum sub Novo Fædere nihil est, quod Deus & Christus per Spiritum Sanctum efficere non dicuntur, ita patet ex S. Scripturâ Deum omnia fere per Angelos efficere solere. Quod adeo est manifestum, ut ab omnibus prope modum agnoscatur id esse verum. Coniungantur itaque hæc cum illis, quæ ad Auctoris §. 10. ad marginem annotavimus. Illa huc inserviebant, ut evinceretur, Spiritum Sanctum esse Angelos, uti vidimus §. 62. ubi etiam illam Annotationem plane evertimus. Censendum ergo est, ea quæ in præsens observantur ad eundem scopum vergere. Quem tamen non video, quâ*

ratione queant obrinere. Quando Pater & Filius dicuntur operari per Sp. S. consideratur Sp. S. tanquam tertia S. S. Trinitatis persona, cui ratione originis & ordinis ejusmodi operandi modus assignatur, uti in superioribus ostendimus. Id non derogat quicquam ejus dignitati & excellentiæ, quæ æqualis est tribus illis personis; nec ille hîc consideratur ut Patris & Filii minister aut instrumentum, sed tantum ut tertia ratione originis, ordinis & modi operandi persona in S. S. Trinitate; quæ à se invicem qui non distinguit, necesse est ut pugnantia de Sp. Sancto sacris literis affingat. At si dicatur, *Deum omnia fere per Angelos efficere solere*, non dum dicitur, *Deum omnia* absolutè nullo excepto *per Angelos efficere solere*, quod & falsissimum esset. Neque enim Deus Creationem, nec Conservationem, nec Redemptionem, nec Sanctificationem efficit per angelos. Sic itaque non potest concludi, Spiritum Sanctum denotare Genus Sanctorum angelorum. Quòd si jam concederemus, Deum *fere* omnia per angelos efficere solere, si modo simul dicatur, Angelos obtinere rationem instrumentorum & ministrorum Dei in istiusmodi operibus, quod Scriptura dicit, dum Angelos

los ἀγγέλων ἁγίων appellat, Spiritum Sanctum verò ubivis considerari ut æqualem Patri & Filio, ejusdem cum iis dignitatis & excellentiæ, non poterit concludi, Spiritum Sanctum & Angelos Sanctos pro iisdem esse habendos.

LXXIV.* Videamus nunc, quomodo *Auctor Addendorum* probet, Deum per Angelos omnia, de quibus in sacris literis est mentio, perfecisse, prout loquitur p. 59. 1. dicit, id ex eo colligi, quod nullum unquam discrimen inveniamus inter Itlum, per quem Lex est lata (quem Angelum fuisse fusius ab Authore nostro demonstratum est) & Eum, qui mundum condidit, ipseque perpetuo I E H O V A, Angelus I E H O V A, Deus Abrahami, &c. Mundi Creator &c. nominetur. Vid. Gen. 2: 4. 7. &c. 11: 5. 6. 12: 1. coll. cum cap. 16: 7. 9. 10. 18: 1. & 19: 1. 48: vers. 15. 16. Judic. 2: 1. 4. 5. 13: 3. coll. cum versu 22. Zach. 3: 2. 3. & infinitis penè locis. Sed nos §. 61. ostendimus, illam Angelum, qui est JEHOVAH, esse Filium Dei, esse angelum increatum, esse summum & æternum Deum. Ibidem quoque demonstravimus, opus Creationis non posse ullo modo Sanctis angelis assignari, cum sit opus potentiæ planè infinitæ, quæ omnia
ut

ut lector hîc inspiciat & repetat, rogamus, unde sequitur, angelum illum, qui est Jehova; quique est Creator mundi, esse supremum & æternum Numen. Hoc potius debuisset inde colligere, quàm ut hinc probaret, Deum per angelos omnia, de quibus in sacris literis mentio est, perfecisse; unus enim hic est idemque Angelus, de quo in locis citatis fit mentio, isque idem qui & Jehova, adeoque Supremus Deus existit. Probat id 2. *Patet ubique*, inquit, *Angelos apparuisse, ut pios juvarent, impios punirent, arguerent, Dei decreta exsequerentur &c. Vid. Gen. 16: 7. 8. 18: 2. 22. 28: 12. 2 Reg. 19: 35. Vide etiam Dan. 10: 13. 20. 21. & ubique Tota fere Scriptura mihi describenda foret, si cuncta, quæ huc faciunt, annotare vellem. Quapropter Petrus Ravanellus Biblioth. S. S. Tom. 1. p. 161. 162. expresse fatetur, Deum illis uti, in exequendis mandatis & judiciis suis, in toto terrarum orbe, eosque res creatas, rerumque creatarum ordinem tueri & conservare, eorumque operâ eum uti, in regnis rebusque publicis confirmandis & protegendis. Ostenditque nihil ferè nisi per illos à Deo peragi, circa hominum genus. Ex quo non immerito colligi videtur, Angelos Sanctos & Sp. S., non magis differre,*

ferre, quàm homines & mortales. Ex his locis aliisque à Ravanello citatis fatemur, constare, Deum sæpissimè Sanctorum angelorum uti ministerio ad varia sua opera exsequenda, atque hoc est, quod Ravannellus quoque docet; sed is non ostendit, nihil firmè nisi per illos à Deo peragi circa hominum genus, multò minus dicit absolute omnia, de quibus in sacris est mentio, Deum per Angelos perfecisse, prout dicit Auctor Addendorum, quod etiam ex locis Scripturæ citatis non potest confici.

LXXV. De Proverb. viii. capite, ubi de Sapientiâ æternâ Patris, quæ est Filius Dei, quædam adhuc monenda. Dicit Auctor addendorum pag. 161. non satis manifestum esse, an per Sapientiam apud Salomonem non possit intelligi Angelus, sive Spiritus, cujus cura ista res commissæ forent. Quæ inconsideratè nimis sunt dicta; cùm nequeat his hominibus latere, nostros Theologos per illam Sapientiam intelligere secundam personam S. S. Trinitatis, adeoque Supremum Numen, idque variis argumentis ex visceribus textus intimis probare. Nolumus id aliter, quam obiter hîc ostendere, cùm in transitu tantum agat de illo Auctor Addendorum. Dicitur vers. 22. Jehova istam sapien-

pientiam possedisse **אֶת־חֵכְמָתוֹ קֹדֶם** *ante* molitiones suas ex tunc, liceat nobis Hebræa ad verbum transferre **קֹדֶם** significat *ante* & **חֵכְמָתוֹ** significat *molitiones*, quo nomine ipsa decreta Dei sunt intelligenda Decreta Dei æterna esse & ratio & Scriptura docet, ante illa ordine naturæ prius concipienda est æterna sapientia, quia per illam ista decreta ab æterno sunt facta. **יְנֻכָּה** est adverbium temporis, quod sic pro tempore generatim potest accipi. *Ex tunc*, quando erat tempus, sive, quando coepit esse tempus, ego jam antea fui, & possedit me Jehova. Fuit ergo ista Sapientia ante tempus eamque ante tempus possedit Jehova, estque illa æterna dicenda. Quis dicat, hoc cadere in Angelum, nisi qui angelum pro Deo habeat æternos? Quis Angelus erit, quem Deus potest dici genuisse ab æterno, & qui fuerit **יְנֻכָּה** nutritius Dei & deliciae ejus perpetuæ vers. 30. Hæc de Filio Dei, qui ipse Deus est, dici queunt, non de Angelo, qui est creatura. Neque est, quod hic forte excipiat, *librum illum Salomonis nil nisi parabolas habere* (quod observat *Auctor Addendorum* p. 60.) si hoc ita intelligas, quasi omnia ista, quæ de illâ Sapientiâ hîc di-

cun-

cuntur, improprie sint accipienda. Liber ille dicitur *ἑρμηνεύς*, quod contineat sententias egregias vim regulæ habentes, quæ vel propriis vel impropriis verbis enunciantur, quod *ἀντίφα* libri manifestè docet. Sed nolo diutius his inhzrere.

LXXVI. Adjicit Auctor Addendorum p. 61. novam argumentationem, quam censet, *non inutile videri eruditis hominibus examinandam exhibere.* Dicit: *Iudaos antiquos & recentiores, nec non antiquos Christianos, & ex recentioribus non paucos, magno consensu credidisse, vel omnibus hominum inaviduis, vel piis saltem, Angelum custodem à Deo assignari, Grotius in Matth. 18: 10. affirmat atque ostendit. Quam opinionem Christianos à Iudæis accepisse credit, atque ex dicto loco hausisse, vel in eâ confirmatos esse existimat, nec non ex Act. 12: 15. aliisque locis. Quicquid sit, urget sic argumentum Auctor addendorum, ex locis istis haud absurde sententia ista videtur hauriri. Cum enim Christus Matth. 18: 10. Angelorum excellentissimos, parvulorum Angelos appellat, innuere videtur, illos à Deo ipsius custodes aut ductores esse destinatos. Illis verò solis, non aliis piis, Angelos assignatos esse, non videtur esse vero simile.*

224 *Causa Spiritus Sancti.*

*mile. Hinc lux oritur aliis locis, videlicet I Cor. XI. 10. ubi propter Angelos faminis, velato capite frequentare cœtus injungitur. Lucem etiam fœnerabitur alius locus Ephes. 4: 30. ne Spiritum contristemus Sanctum, quo obsignati sumus, nec non Act. 12: 15. 2 Cor. 1: 22. Ephes. 1: 13, 14. Rom. 8: 16. 13. similesque. Ex quibus omnibus, quis sit Spiritus Sanctus, non obscurum esse videtur. Ego verò existimo, ex hâc sententiâ de Angelo custode vel omnibus hominibus (vel saltem piis assignato nihil accedere roboris opinioni, quam Auctor addendorum cum suo socienno propugnat, quòd per Spiritum Sanctum genus Angelorum debeat intelligi. Sententiam illam de Angelo custode antiquam admodum esse non inficiamur, sed ejus antiquitas parum auctoritatis ei conciliat. Originem illa ducit ab Ethnicis, qui magno consensu crediderunt, genios peculiare singulis hominibus & familiis, & urbibus & provinciis esse assignatos. Inde orti sũnt Penates dii & Lares, dæmonesque præstitæ, quos *ἱεῖς* appellant Græci. Ammianus Marcellinus lib. 21. p. mihi ex editione Valesianâ 198. *Ferunt Theologi, in lucem editis hominibus cunctis, salvâ firmitate fatali, hujusmodi quedam velut**

velut actus rectura numina sociari, admodum
tamen paucissimis visa, quos multiplices au-
xere virtutes. Idque & oracula & auctores
docuere praeclari: inter quos etiam est Me-
nander Comicus, apud quem hi senarii duo
leguntur: Ἀπὸ τῆς δαίμονος ἀνδρὶ συμπίπτει
Εὐδὸς γὰρ οὐκ ἔστι, πῶς αὐτῷ δὲ πῶς. Isidem ex
sempiternis Homeri carminibus intelligi
datur, non deos caelestes cum viris fortibus
collocutos, nec ad fuisse pugnantibus vel iuvaf-
se, sed familiares genios cum iisdem versatos:
quorum adminiculis freti praecipue Pythago-
ras enituisse dicitur & Socrates, Numae-
que Pompilius & superius Scipio: Quam
quidam existimant, Marius & Octavia-
nus, cui Augusti vocabulum delatum est
primo: Hermesque Terminus, & Tyar-
neus Apollonius, atque Plotinus, ausus qua-
dam super hac re disserere mystica, alique
monstrare, quibus primordiis hi genii ani-
mis connexi mortalium, eas tanquam gre-
miis suis susceptas tuentur, quoad licitum
est, docentque maiora, si senserint puras,
& à colluvione peccati immaculatâ corpo-
ris societate discretas. Centorinus: Genius
est Deus, cuius in tutela, ut quisque natus
est, vivit. Apulejus de Deo Socratis pag.
mihi 111. part. 1. edit. Basileensis: Plato
autumat singulis hominibus in vita agenda

P

testes

226 *Causa Spiritus Sancti.*

testes & custodes singulos additos, qui nemini conspicui semper adsint, omnium non modò actorum testes, verùm etiam cogitationum: Ac ubi vitâ editâ remeandum est, eundem illum, qui nobis præditus fuit, raptare illico & trahere veluti custodiam suam ad iudicium, atque illic in causâ dicendâ assistere: si qua commentiatur, redarguere: si qua vera dicat, asseverare; prorsus illius testimonio ferri sententiam. Hæc est antiquitas illius sententiæ, quæ habet auctores Ethnicos, & Judæos approbatores, qui ab his illam sententiam videntur mutuati, sicut à magis varia, quæ de angelis scribunt, hausisse censentur Junio §. 52. laudato, quam opinionem Christianos à Judæis accepisse credit Grotius.

LXXVII. Scriptura verò huic sententiæ non videtur favere, quæ in communi hominum piorum custodiam assignatam docet Angelis, dum eos *ἀγγέλους πνεύματα* vocat; sic illa docet, unī animæ Lazari angelos custodes assignatos esse plures, qui portârunt animam ipsius in sinum Abrahæ, & in communi Angelos Dei dicit gaudere super uno peccatore resipiscente. Ita circa Elizæum castra angeli metiebantur, & Jacob vidit scalam, super quâ Angeli ascendeabant & descendeabant. Neque est, quod

quòd cum Grotio dicas, *viris eximiis multos dari custodes*, quasi non dentur etiam aliis piis & fidelibus non ita eximiis. Nam de quolibet resipiscente peccatore gaudent angeli plures, & Lazarus introducitur tanquam aliquis ad communem fidelium sortem pertinens; quorum consideratione ista exceptio evanescit. Locus Actor. XII. 15. ad summum docet, fideles istos fuisse in illâ opinione, quæ inter Judæos erat communis, Angelum singulis piis custodem fuisse adjunctum, quæ, quamvis communis esset, non tamen propterea pro verâ erat habenda, quam tamen toleravit Deus in suis etsi erronea foret, cum error ille ipsorum salutis nihil quicquam obstaret; etsi ne quidem hoc ipsum necesse sit ut asseramus, cum possit etiam dici, eos hoc sensu dixisse angelum ipsius adesse, non ut designarent certum aliquem singularem tanquam custodem ipsius, sed tantum esse unum aliquem angelorum bonorum, qui omnes in universum custodiæ fidelium sunt assignati; ne nunc dicamus, quòd vox ἄγγελος etiam nuncium designet, sicque potuerint dixisse fideles in ædibus congregati, nuncium esse à Petro missum. At Matth. XVIII. 10. Christus monet, ne aliquem ex parvulis istis, qui in se credant,

scandalizent, hoc usus argumento, quòd, quamvis parvuli videri possint in oculis hominum, magnitamen fiant apud Deum, quòd ipsorum causâ angeli boni à Deo mittantur, qui curam eorum habeant, atque illorum nomine videant faciem Patris cœlestis, exspectantes ejus mandata; unde non sequitur, quemlibet fidelem suum specialem angelum sibi habere assignatum custodem.

LXXVIII. Nescio verò, qualem lucem velit oriri ex suâ, quam refutavimus, observatione, aliis locis à se laudatis. 1 Cor. XI. 10, fœminis injungitur, ut velatò capite frequentent cœtus propter angelos; quid quæso sententia illâ de angelo custode singulis hominibus assignato faciet ad loci hujus intellectum? an non possumus ergo locum istum intelligere, nisi statuamus, Angelum custodem unicuique hominum assignatum? an ergo non possunt angeli præsentes esse in Ecclesiâ, nisi quilibet eorum habeat suum fidelem, quem singillatim custodiat? Nolo nunc prolixam istius loci explicationem instituere, cum hæc sufficere ad rem præsentem posse videantur. Non plus lucis ex illâ sententiâ consequetur Eph. IV. 30. nisi statuatur, non posse intelligi, quomodo Sp. S. queat tristitiâ affici,

fici, si per eum non intelligamus angelos. Sanè Deum quoque tristitiâ affici, dicit Scriptura, an ergo ipse Deus non potest dici tristitiâ affici, nisi Deum mutemus in angelos? Quid igitur dicet de Ps. LXXVIII. 40. ubi Pfales conqueritur de Israëlitis in deserto: *Quoties exacerbârunt illum in deserto? dolore affecerunt eum* *וַיִּצְרֶנּוּ* *in solitudine?*

Quæ de Deo *ἀνθρωπίνως* dicuntur in Scripturâ, ea *διὰ τὸ ἀνθρώπινον* sunt intelligenda. Deus potest tristitiâ affici, quando id agitur à peccatore, quod Deus prohibuit, quod pugnat contra ejus voluntatem revelatam & leges ferentem. Si Deus esset ut homo, excitaretur in ipso affectus similis affectui humano, qui nomine Doloris & Tristitiæ solet insigniri, & sequeretur voluntas illum contemptum vindicandi, sicut solet fieri in parentibus, quando liberi eorum transgrediuntur mandata. Cùm autem Deus alienus sit ab omni imperfectione, sitque ille supremo modo beatus, nullaque sit penes eum mutatio, *ὁ Θεὸς ἀμεταβάτος*, non potest in ipso affectu Tristitiæ inter illum & hominem esse similitudo, sed tantùm quoad effectum, qui est vindicta istius contemptus. Eodem sensu Spiritus Sanctus tristitiâ afficitur, cùm sit Deus; quamvis

etiam hoc modo possit dici, pios tristitia afficere Spiritum Sanctum, quatenus id suis peccatis obtinent, ut ille in ipsis operari debeat tristitiam dono pœnitentiæ, qui aliàs alio dono, spiritus nempe lætitiæ, in iis fuisset operaturus. De loco A&. XII. 15. paulo ante diximus. Quis verò nisi cæcutiens putet, per illam sententiam lucem inferri 2 Cor. I. 22. *ὅς ὑς σφραγίσεν ἡμᾶς ὑς δὲς τῷ ἀρραβῶνι τῷ πνεύματι ἐν τῇ καρδίᾳ ἡμῶν*, *Qui etiam obsignat nos & dat arrhabonem Spiritus in cordibus nostris.* Meras potius tenebras offundet huic loco, qui putaverit, arrhabonem Spiritus esse angelum custodem. Illène ergo operabitur in fidelibus certam fiduciam, quâ persuadeantur, se esse filios Dei? Illène consolabitur eos in omnibus angustiis consolatione illâ internâ, & pace conscientiæ, quæ excedit omnem intellectum Phil. IV. 7? Deum, adeoque Spiritum Sanctum, hanc efficaciam operari in cordibus nostris, quæ quovis momento & quoad esse & quoad bene esse, hoc est, quoad gratiam salutarem ab ipso dependent, & conservantur, intelligi potest; atqui hanc operationem assignare voluerit angelo custodi, angelo creato, angelo bono, qui quovis momento à Deo, & quoad suum ipsius esse,

&

& quoad suum benè esse, ipse dependet, ut angelum in Deum, creaturam in Creatorem, dependentem in Independentem commutet, necesse est. Idem dicendum de loco Eph. I. 13. 14. ubi similiter fideles *obsignati* dicuntur *Spiritu promissionis Sancto*, qui est *arrhabe nostra hereditatis*. Atque ex his facile patet quoque, & Rom. VIII. 16. 23. similesque alios locos, quos non recitat, non posse intelligi, si per Spiritum Dei intelligamus angelum custodem. Appellatur ille *Spiritus Dei* vers. 15; qui eo ducuntur, dicuntur esse *filius Dei* ibid; appellatur *Spiritus adoptionis quod dicitur*, per quem clamamus *Abba Pater*; vers. 15. dicitur ille vers. 26. *unà testari cum Spiritu nostro*, quòd *simus Filii Dei*, & vers. 23. *nos* dicimur *primitias Spiritus habere*. An Angelo custodi hæc competere possent? Duci Spiritu Dei est inspirari & impleri sanctis cogitationibus, quibus fiat, ut non amplius ambulent secundum carnem, sed secundum Spiritum. An ergo Angelus custos, angelus creatus dominatur nostro cordi, ut ita illud possit ducere, ut impleat illis sanctis cogitationibus, quæ efficiant, ut ambulemus secundum Spiritum? Id nemo efficere potest, nisi is, in cujus manu sunt

corda hominum, qui illa flectit eò, quo vult, quod de Deo pronunciat Scriptura. An primitiæ Spiritus possunt esse angelus à Deo ad nos custodiendum missus? primitiæ Spiritus sunt ejusdem planè naturæ cum fructibus Spiritus. *Fructus autem Spiritus sunt, amor, gaudium, pax, longanimitas, benignitas, bonitas, fides, mansuetudo, continentia*, Gal. V. 22. 23. Hosne putabimus producere posse in agro nostrorum cordium angelum aliquem creatum, angelum custodem? Hi fructus sunt ejusmodi, ut sint quoque fructus fidei, quæ efficitur per superabundantem magnitudinem potentix Dei juxta efficaciam roboris virium ipsius Eph. I. 19. Quomodo verò Spiritus aliquis creatus potest esse Spiritus adoptionis, per quem clamamus Abba Pater? Est Adoptio opus S. S. Trinitatis, in quo concurrere non potest creatura. Filius meritis est nobis Adoptionem, conferendo nobis jus illud ad hæreditatem, quod suo sanguine acquisiverat; Pater admittit istud meritum Filii & consentit, ut jus illud in nos transferatur; Spir. Sanctus intimat istam adoptionem, dum nos facit clamare Abba Pater; nisi ergo Angelus ille custos sit Deus, non potest nomine Spiritus adoptionis

optionis intelligi. Spiritus ille testatur unà cum Spiritu nostro, quòd simus Filii Dei. Spiritus ille id testatur in Scripturâ, dum docet, eos esse Filios Dei, qui credunt in nomen Filii Dei unigeniti, adeoque ille Spiritus est auctor Scripturæ, quod angelo creato nullâ verisimilis specie potest assignari; idem & Spiritus ille testatur in cordibus nostris, in quibus & operatur, & quæ propterea intimè habet cognita, quod solius est Dei, qui *καὶ ἑαυτὸν* se dicit.

Sic ad finem decurrit noster labor, quem lubentes impendimus ad asserendam gloriam Spiritus Sancti divinam, ab hominum pari malè in ipsum animatorum infelicitèr oppugnatam. Sit tibi, ô Benignum Numen; Sancte Spiritus, Domine & Gubernator mentium tam angelicarum, quàm humanarum, gratus hic meus labor, quamvis magnâ cum imbecillitate susceptus, perficiatur tua virtus in meâ infirmitate, subjice tibi corda omnium de te malè sentientium, converte ea, inspira salutares motus,

*tus, duc me in omnem veritatem, sermo
tuus est veritas; custodi me ab erroribus,
præserva imprimis ab iis, qui saluti
damnum inferrent, facies tua gratiosa
mihi præluceat, me custodiat, non
angelus creatus, qui non satis foret po-
tens ad me ducendum in itinere recto,
ad eradicandum illud malum, quod mi-
hi ab infantiâ inhæret, ad crucifigen-
dum veterem hominem & vivificandum
novum, ad me sanctificandum & tan-
dem æternâ salute beandum. Tu verò,
ô Domine, hæc omnia potes; tua est
majestas & robur & sapientia; remitte
mihi peccata mea, ignosce lapsibus
quotidianis, sanctifica me magis magisque
in dies, fac ut tibi vivam, tibi moriar,
tuus sim maneamque in vitâ & in mor-
te. Tuum enim est regnum, tua est po-
tentia, tua est gloria in secula. Amen.*

F I N I S.



—



